

Matiyu

Matiyu belen mere igin Yesu nin yitin kayyin

*Yesuyen megen nin asem yago
(Luk 3:23-38)*

¹ Gabe Yesu Kristuyen asem wen Abraham hitte mat wan wan Israel marte doyan al kurun Dewit hitte, irde yen hitte mat wan wanbe Yesu forok yirin goyen asande katinbe gahade:

² Be, Abraham urminbe Aisak. Aisak urminbe Yekop.

Munan Yekop urmin wenbe Yuda, itin wenyabe kulin yagoya.

³ Yuda urmin waranbe Peresya kulin Seraya. Irde ire itinya gote milinbe Tamar.

Peres urminbe Hesron. Hesron urminbe Ram.

⁴ Be, Ram urminbe Aminadap. Irkeb Aminadap urminbe Nason. Nason urminbe Salmon.

⁵ Salmon urminbe Boas. Boas milinbe Rahap. Bere gobe Yuda mar bere mon.

Boas urminbe Obet. Obet milinbe Rut. Bere gayen wor Yuda mar bere mon. Munan Obet urminbe Yesi.

⁶ Yesi urminbe Yuda marte doyan al kurun Dewit.

Dewit urminbe Solomon. Solomon milinbe Batseba. Bere gayen wor Yuda mar bere mon. Dewit belen un Uria mayke kamkeb tirin.

- 7 Solomon urminbe Rehoboam. Rehoboam urminbe Abia. Abia urminbe Asa.
- 8 Asa urminbe Yehosafat. Yehosafat urminbe Yehoram. Yehoram urminbe Usia.
- 9 Usia urminbe Yotam. Yotam urminbe Ahas. Ahas urminbe Hesehia.
- 10 Hesehia urminbe Manase. Manase urminbe Emon. Emon urminbe Yosaia.
- 11 Irkeb Yosaia urminbe Yehoiakinya kulin yagoya.
- Yehoiakinya kulin wenya hinhanyabe Babilon nanare nin fulen mar belen wan gasa yirde bul yirde meten marmin yirnin yen Babilon yukamin.
- 12 Be, Babilon yukamin go mulgan hen nanamde kwamin. Irdeb Yehoiakinbe urmin Sealtiel minyan hiri. Sealtiel urminbe Serubabel.
- 13 Serubabel urminbe Abiut. Abiut urminbe Eliakim. Eliakim urminbe Aso.
- 14 Be, Aso urminbe Sadok. Sadok urminbe Akim. Akim urminbe Eliut.
- 15 Eliut urminbe Eleasa. Eleasa urminbe Matan. Matan urminbe Yekop.
- 16 Irkeb Yekop urminbe Yosep. Yosepbe Maria un. Maria binde matbe Yesu Kristu* gogo forok yirin.
- 17 Ningeb Abraham hitte mat wan wan Dewit hitte hiri goyen asi basamin yagobe tumnan 14. Irde Dewit hitte mat wan wanbe Babilon nin mar

* **1:16:** Kristu gobe Hiburu mere matbe Mesaia. Gote minbe alya bereya Al Kurun hitte Yumulgan ten ten Al.

belen gasa yirde Babilon yukamiñde goyenter wor asi basanmin yagobe 14 po. Irdeb gor mat wan wan Yesu Kristu kawan hiriñde gor wor 14 po.

*Maria belen Yesu kawan kiryin
(Luk 2:1-7)*

¹⁸ Be, Yesu Kristu kawan hiriñ gobe gahade: miliñ Mariabe Yosep niñ tubul ten untek yen merem tiyamin gega, Mariabe Yosep goya tumnan ma henya bin yan hiriñ. Irkeb Yosep belen kenen bebak tiyyin. Goyenpoga diriñ gobe Holi Spirityen tareñde Maria binde forok yirin goyen ma nurdeb kukuwamnen nuriñ.

¹⁹ Gega Maria goyen tetek al Yosep gobe al huwak uliñde merem mon geb, goyen kenenbe kawan po takira tike al budam nurkeb Maria go memya hen hen ge igiñ ma nurdeb bada hen daha mat kura balmin tubul timewon yen nurde hinhin.

²⁰ Goyenbe goke dufay hen hikeyab Al Kurunyen miyon belen mitere forok yenbe inyin. “Dewit asem Yosep, gebe Maria ten ten niñ al belen daha wet kura ginen ginen niñ kafura hen bada ma hawayin. Diriñ binde hi gobe Holi Spirityen tareñde forok yiyun.

²¹ Ningeb binde hi gobe diriñ al diriñ kawan kiryen. Yen belen gab alya bereyamin mata bulun ten han bana mat yumulgan tiyyen. Ningeb denembe “Yesu’† inayin,” inyin.

† 1:21: Deñe gote minbe “Dumulgan ten ten Al”.

²² Be, mata kurun gabe Doyan Al Kurun belen mere basan almin momon irke basan hen tagalyin goyen gogo forok yirin.

²³ Mere tiyyin gobe gahade: “Bere fonen kura alya ma kun hitin belen bin henbe dirin al dirin kura kawan kiryen. Irkeb ‘Immanuel’ innayin,” inyin. Immanuel gote minbe ‘Al Kurunbe nenya hite’.

²⁴ Be, Yosep go mite tiyyinde mat huwardeb Al Kurunyen miyon belen sanin po mere iryin gwahade po Maria goyen ten yaminde kurin.

²⁵ Goyenbe yenya ma ferde hinaryum. Kun kunbe Maria gobe dirin al dirin kawan kiryin. Irkeb Yosep belen “Yesu” inyin.

2

Nanja yenen bebak ten ten mar Yesu kinnin yen wayamin

¹ Be, Yesube Herot Yudia nanare nin doyan al kurun hinhinya Yudia nanja bana gon nin taun dirnen kura Betlehem gor kawan hirin. Be, dirin go kawan hirin kamereb nanja wan wan belen nin mar kura Yerusalem taunde wayamin. Mel gobe dinambe yenenbe kame da mata kura forok yiyyen goyen bebak ten hanyen mar.

² Be, mel go wanbe gusunan hamin. “Yudia nanare nin doyan al kurun hiyyen al gayamun ga forok yiyun gobe dare hi? Nanja wan wan belen mat dinambemin kenenbe dolon irnin yen gago wayhet,” yamin.

³ Be, Herot go mere goyen nurdeb, “Dirin gore kame kurun hen asogo nirde gasunne tiyyen,”

yenbe kafura hiriŋ. Yerusalem taunde hinhan mar wor budam wor po mere go nurdeb diriŋ goke teŋ kanduk buluŋ kura forok yiyyeŋ yen kafura hamiŋ.

⁴ Irkeb Herot belen Al Kurun dolon ird ird mata doyan marte karkuwanŋabe Moseyen saba tagal tagal marya hoy yirdeb, “Mesaiabe damde kawan hiyyeŋ?” yinen gusuŋan yiriŋ.

⁵ Irkeb wol henbe, “Yudia naŋare niŋ taun Betlehem gor kawan hiyyeŋ. Al Kurunyen mere basan al kura belenbe gahade kayyiŋ:

⁶ ‘Be, den Betlehem niŋ mar,
den hitte al kura forok yen nere alya bereya
Israel mar gote doyan al kurun hiyyeŋ.
Irkeb denŋin diriŋen goyen kurun hiyyeŋ.

Ningebe denbe Yudia naŋa bana gon niŋ al denem
yan mar gote folek,’ yitiŋ hi. *Maika 5:2*
Ningebe Mesaiabe Betlehem forok yiyyeŋ,” in-
amiŋ.

⁷ Irkeb Herot belen diriŋ gobe daha naŋa kawan hiriŋ goyen bebak tiye yenbe naŋa wan wan belen niŋ al karwo dinambe yenen bebak teŋ teŋ mar goyen balminde hoy yirdeb, “Daha naŋa wor po dinambe goyen forok yiyyeŋ?” yinkeb gwaha naŋa kintiŋ inen momon iramiŋ.

⁸ Irkeb Herot belen usi yirdeb, “Betlehem kuan. Kunbe diriŋ goke kenkela po nanŋennayiŋ. Keneŋbe aran po wan momon nirnayiŋ. Irkeb ne wor kunbe dolon ireŋ,” yiniŋ.

⁹ Be, mel gobe Herot belen gwaha yinkeb Betlehem kuniŋ yen kwamiŋ. Irkeb dinambe naŋa

wanj wanj belen kenamin goyen nana kota mehen hen kunbe dirin hinhin ya turte gor bada hirin.

¹⁰ Dinambe gore gwaha tike kenenbe mel go amanen nuramin.

¹¹ Irdeb ya bana hurkun dirinya milinya goyen yenenbe dokolhon yugulun ten dirin goyen dolon iramin. Irdeb det kura dirin go unnin yen yawayamin goyen hol yirdeb unamin. Gol horaya det kura toropa yara kake hamin ten hiyen gwahade goyabe guram hamnen igin wor po yawayamin goyen unamin.

¹² Be, Al Kurunyen miyon belen mitere, “Mulgan hen Herot hitte ma kunayin,” yinen hayhay yiriyin. Irkeb belen hoyan mat nanam kwamin.

Yosep belen Yesuya milin Mariaya yade Isip kurin

¹³ Mel go kukeb Al Kurunyen miyon belen mitere Yosep hitte forok yenbe, “Herot belen dirin gayen maymeke kami yen nankenen tiya. Ningeb huwarde dirinya milinya gayen yade busaharde Isip nanare kun gon hinayin. Irdeb ne po doyan nirde hinayin. Mulgan hena dinmeke gab mulgan henayin,” inyin.

¹⁴ Be, Yosep go bin bak yeke huwardeb wawun goyen po ire milinya go yadeb busaharde Isip nanare kwamin.

¹⁵⁻¹⁸ Irkeb Herot gobe doyan hemanbe nana wanj wanj belen nin mar gobe usi niran yen nurdeb bin ar wor po yirin. Irkeb Betlehemya tiyun muknen binyan bana gon nin al dirin dirnen damam irawa mat bam belen gobe tumnan gasa yirke kamnan yen fulen marmin hulyan

yiriyiñ. Gobe naña wañ wañ belen niñ mar belen hañkapyar wor po nañamde dinambe kenamiñde gor mat gagasiya damaya kapyar henbe gogo, “Diriñbe damam irawa mat bam belenbe gasa yirnayin,” yinyin. Go tiyyin gobe bikken Al Kurunyen mere basan al Yeremaia belen yirin goyen forok yirin. Meremiñbe gahade:

“Al belen al kura Rama taunde biñ misin katen esen obam ten epte ma ten hike nuramin. Esen gobe Resel belen diriñ wen kamde pasi hamin goke esen hinhin.

Ningeb al kura belen yolña irke bada hetek mon,” yitin hi. *Yeremaia 31:15*

Be, Yosepya diriñminminya go kuñ Isip hike hiked Herot go kamyin. Irke gab mulgañ hamin. Go tiyamin gobe Doyan Al Kurun belen, “Urnebe Isip naña tubul ten wañ wañ niñ hoy irmin,”* yirin goyen mere basan almin Hosea mere irke basan hen tagalyin goyen gogo forok yirin.

Yosepya diriñminminyabe Israel nañare mulgañ hamin

¹⁹ Be, kame Herot go kamkeb Doyan Al Kurunyen miyon belen Yosep Isip hinhinya goyen mitere forok yenbe,

²⁰ “Yosep, diriñ ga maynin yen hinhan marbe kaman. Ningeb huwarde ire milinya yade Israel nañare mulgañ henayin,” inyin.

²¹ Irkeb huwarde ire milinya goyen yade mulgañ hen Israel kwamin.

²² Goyenbe al kura belen, “Akelaus belen naninde gasun ten Yuda nañare niñ doyan al

* **2:15-18:** Hosea 11:1

kurun Herot† hiyun,” yeke nurdeb kafura hen gor kutek ma iryin. Irkeb sopte po mitere Al Kurunyen miyon belen, “Galili nanare kunayin,” inkeb Galili kwamin.

²³ Kunbe taun kura Nasaret inen hanyende gor keperamin. Gobe bikken Al Kurun belen, “Nasaret nin al inen hinayin,” yirin goyen mere basan marmin mere yirkeb basan hen tagalamin gwahade goyen po forok yirin.

3

*Yon Baptais belen mere tagalde hinhin
(Mak 1:1-8; Luk 3:1-18; Yon 1:19-28)*

¹ Be, dama budam kukeb al kura Yon Baptais inen hinhan goyen Yudia nanare sawsawa po kurun nana bana gon wanbe saba tagal tagal min uryin.

² Saba ten hinhin gobe gahade: “Al Kurun belen alya bereyamin doyan yirtek nalube bikken binde hihi. Ningeb yen yufuk bana hitek yen nurde han kenem mata buluntin yubul ten yen ge bitin mulgan henayin,” yinen hinhin.

³ Meten goyen ten hinhin al Yon Baptais goke bikken Al Kurunyen mere basan al Aisaia belen gaha yirin:

“Sawsawa po kurun nana bana gon al kura forok yenbe alya bereya belen Doyan Al Kurunyen mere nurde gama ird ird nin du-fay gitik ten ten ge gahade kuware tagalde hiyen:

† 2:22: Herot gobe Israel doyan irde hinhan doyan mar karkuwan gote denje.

‘Doyan Al Kurunyen belen kernañ.
Belenmin sope irde huwa irnañ,’ yen hiyen,”
yen kayyin. *Aisaia 40:3*

⁴ Be, al gote ulinhorbe dapña kamel wuyñen belen irtin goyen hor irdeb dapña sikken gore po kañmin irde ulinhor goyen mal temdere giti irde hiyen. Irdeb bingeminbe gusuya yalanqu fiminña po nene hiyen.

⁵ Irkeb Yudia naña bana goñ nin taun kurun Yerusalemya naña bana goñ nin taun hoyan hoyanyabe Yodan fe siña bana goñ nin marya kurun goyen Yon hitte kunbe

⁶ mata bulunmin ge Al Kurun pohogay irkeb Yon belen Yodan fe bana baptais yirde hinhin.

⁷ Be, Yuda marte tikula sañin po gama irde hanyen Farisi marya Sadusi marya budam Yon belen al baptais yirde hinhinde gor wake yenenbe, “Denbe mata bulun po ten han gega, mali baptais tinin yen wayhan? Den gab dufaytin bulun wor po kunere dirnen wen yara. Goyenbe mali baptais tetek gab Al Kurunyen bearar ma kentek yen nurde han? Ganun belen gwaha dinun? Epte ma wor po busaharnayin geb!

⁸ Ningeb Al Kurunyen bearar bana ma hitek yen nurde han kenem mata buluntin yubul ten yen ge bitin mulgan han gote iginen Al Kurun dilingde mata igin huwak goyen po ten hinayin.

⁹ Irde dindiken ge yen, ‘Nenbe Abraham dirnen wen,’ ma yen hinayin. Al Kurunbe igin hora gayen yade Abrahamyen dirnen wen yiryen geb, mata buluntin ma yubul tinayinbe meretin gobe min minmon wor po hiyyen.

¹⁰ Be, saporbe bikken he minde kerd kerd nin ep irtin hi yara Al Kurun belen mata buluntin gote murungem duntek binde wor po hi. Ningeb he kura iginen ma hen hiyen gobe ilde kak alare temeynayin go gwahade goyen po, den gayen mata buluntin yubul ma tinayinbe Al Kurun belen dakira ten kak alare dimiyyen.

¹¹ “Nebe mata buluntin yubul ten Al Kurun nin bitin mulgan hekeb fe ulin po baptais dirde hime. Goyenbe harhokner al kura wayyen. Al gote tarenbe kurun wor po. Yenbe al turnun yan wor po geb, ne gahade gare epte ma yen ge ten meten kurun titek hime. Kahan basanmin ten kun gobe meten kurun mon gega, goyen wor epte mon yen nurde hime. Yen belen gab Holi Spiritiya kakya belen baptais diryen.

¹² Irde yenbe al kura wit iginen yawaren yen kutummin tukun iginenya sikkenya pota yirde iginenbe goyen yerd yerd ya bana yerde sikkenbe yade kunga tiyyen go gwahade goyen diryen. Ningeb al kame wayyen goreb meremin ma gama irde hinayin marbe kak huginen hitekde gor yimiyyen,” yinyin.

*Yon Baptais belen Yesu baptais iryin
(Mak 1:9-11; Luk 3:21-22)*

¹³ Goyarebe Yesu gob Yon belen baptais niri yenbe Galili nanare mat Yodan fete kurin.

¹⁴ Wake kenenbe Yon belen pet tenbe, “Ge belen gab ne baptais nirtek gega, danin bul mat, ‘Yen belen baptais niri,’ yen ne hitte wayha?” inyin.

¹⁵ Irkeb Yesu belen wol henbe, “Mekerke han McCabe ne nurhem gwahade nira. Gogab Al

Kurunyen dufay huwak wor po goyen tumnan deyya belen kawan forok iryen. Gwaha tiyen gab igin yen nurde hime,” inyin. Irkeb Yon belen fe alare tukun baptais iryin.

¹⁶ Be, Yesu go baptais tenbe fe tubul ten sinjare wayyin. Wakeb goyare goyen po nanjin hol yirin. Hol yekeb Holi Spiritbe Yesu hitte nu foy ten kattinen ten yen hende keperke yingen kinyin.

¹⁷ Irkeb al melak kura nanjinde mat, “Al gabe urne bubulkunne wor po. Yen ge amanen wor po nurde hime,” yirin.

4

Ungura belen Yesu tunan uryin (Mak 1:12-13; Luk 4:1-13)

¹ Be, baptais tirin go kamereb Ungura Satan belen tunan uri yenbe Holi Spirit belen bul irde sawsawa po kurun nana bana gon tukurin.

² Be, nankehalya wawunya 40 gayen binje kutjare hinhin. Ningeb go kamereb binje bulun wor po iryin.

³ Irkeb tunan urtek al belen wanbe, “Ge gayen Al Kurun Urmin kenenbe hora ga yinke beret hena,” inyin.

⁴ Gwaha inkeb Yesu belen wol henbe, “Al Kurunyen asande, ‘Albe Al Kurun belen mere titin kurun goyen nurde sanin hen hanjen. Munan binje hende po ma hanjen,’ gwahade katin hi,” inyin.

⁵ Go kamereb Ungura belen Yesu go Yerusalem Al Kurunyen taun inen hanjende gor tukunbe Al

Kurunyen ya balem kurun goyen hende hoyan wor pore kura gor tukuke huwaryin.

⁶ Irkeb sopte po inyin. “Al Kurunyen asandebe gahade katin hi:

‘Al Kurun belen ge nin ten miyonmin hulyan yirke wan haniinde ganarkeb solok yawayin goyen

hora unkuren belen mun kura kahange umulaw ma uryen,’ yitin hi.

Tikin

91:11-12

Ningeb ge gayen fudinde Al Kurun Urmin kenenbe solok yawa,” inyin.

⁷ Irkeb wol henbe, “Goyen goke wor, ‘Al Kurunge tunan ma urayin. Yenbe Doyan Al Kurun geb,’ yen asande katin hi,” inyin.

⁸ Be, kura goya po tunan ure yenbe Yesu goyen dugu kurunde kura gor tukunbe megen nin doyan mar karkuwan belen nanja doyan yirde han goya tarenmin turnun yanya kurun goyen tumnan ikala iryin.

⁹ Ikala irdeb, “Dokolhonge yugulun ten dolon nirke gab det kurun yenha gayen yubul ten gunen,” inyin.

¹⁰ Gwaha inkeb wol henbe, “Satan, hoyan kwa! Asandebe, ‘Al Kurun po ga Doyan Al Kurunge geb yende yufukde po henbe yen po dolon irde hayin,’ yitin hi gobe ma nurde ha?” inyin.

¹¹ Gwaha inkeb Ungura go tubul ten kurin. Irkeb Al Kurunyen miyon belen wan Yesu faran uramin.

*Yesu belen Galili nanare metenmin min uryin
(Mak 1:14-15; Luk 4:14-15)*

¹² Be, kamebe Yesu go Yon Baptais ten fere ten koyare keramin mere momon goyen nurdeb mulgan hen Galili nanare kurin.

¹³ Kun Nasaret tiyunde hinhin. Mun kura hitnen tenbe Kapeneam taunde kurkun gor hinhin. Kapeneam taun gobe Galili fe ala kurun goyen sinare Sebulunya Naptaliyat megende hinhin.

¹⁴ Be, Yesu go Kapeneam kurkurin gobe Al Kurun belen mere basan almin Aisaia momon irke basan hen tagalyin goyen fudinde wor po forok yirin. Merebe gahade:

¹⁵ “Sebulun megenya Naptali megenyabe Galili makande kurkun kurkun belen kurunde har.

Yenbe Yodan fe sinja kurhan har. Megen gabe Galili nana bana har.

Gonbe Yuda mar mon al min hoyan manan gon han.

¹⁶ Go mar gobe Al Kurun ma nurde unen mata bulun bana po hen kidoma bana hitnen ten hanjen goyen hulsi kurun kura kennayin.

Al kidoma bana hen kamtin yara hanjen gobe hulsi goyen forok yeke gote uren bana hinayin,” yitin hi.

Aisaia
9:1-2

¹⁷ Be, Yesu go Kapeneam henyabe saba tagal tagal metenmin min uryin. Sabaminbe gahade: “Al Kurun belen alya bereyamin doyan yirtek nalube binde hihi. Ningeb yen yufuk bana hitek yen nurde han kenem mata buluntin yubul ten yen ge bitin mulgan henayin,” yen hinhin.

*Komatmin kura hoy yiriyin**(Mak 1:16-20; Luk 5:1-11)*

¹⁸ Be, Galili makan ferenyan goyen kun henya be Saimon denem kurabe Pitaya kulin Andruya makan de kaman temeyde hike yinyin. Ire itinya gobe makan dapɗa yad yad mar.

¹⁹ Kun yenen be yinyin. “Wayyi. Waɗ gama niryi. Irkeb al yade Al Kurun hitte yunkun yunkun mar diren,” yinyin.

²⁰ Gwaha yinkeb goyare po kamanmin yago yubul ten Yesu gama iraryum.

²¹ Mun kura kutnen ten be ire itinya hoyan Yemsa Yonyabe nani Sebediya hakware hen kamanmin sope yirde hike

²² yenen be hoy yiriyin. Irkeb ire itinya gore wor nani Sebedi goyen hakware gor po tubul ten be Yesu gama iraryum.

*Garbam mar sope yiriyin**(Luk 6:17-19)*

²³ Be, Yesu go Galili nana bana goyen kun be Yuda marte gabu yayan saba ten Al Kurun belen alya bereyamin doyan yird yird mere igin goke tagaldeb alya bereya garbammin kurayen kurayen manan goyen guram yirke igin hen hinhan.

²⁴ Irkeb yen mata tiyyin goyen Siria nanare nin mar wor nurtin ala tiyamin. Irdeb garbam kurayen kurayen goyen yukuteke sope yiri yen Yesu hitte yawayamin. Alya bereya ulin misin kurun minyan, unguram yan, bu tone minyan, tonan kukuwa minyanyabe ulin kamtinja goyen yad wayamin. Irkeb tumnan guram yirde sope yiriyin.

²⁵ Be, Galili naŋa, Dekapolis* naŋa, Yudia naŋa, Yodan fe siŋa bana goŋ niŋ marya Yerusalem taun kurunđe gor niŋ marya budam waŋ Yesu gama iramiŋ.

5

Amaŋ heŋ hinayiŋ (Luk 6:20-23)

¹ Be, Yesu belen al buda kurun go yenenbe dondonenđe hurkun kipiryiŋ. Komatmiŋ yago wor yen hinhinde gor hurkamiŋ.

² Irkeb sabamiŋ miŋ uryiŋ. Sabamiŋbe gahade:

³ “Be, al kura nindikenbe epte moŋ yen Al Kurun niŋ po nurde hinayiŋ mar gobe Al Kurun belen alya bereyamiŋ doyaŋ yirde hi bana goŋ hinayiŋ.

Niŋgeb goke amaŋen nurde hinayiŋ.

⁴ “Al Kura mata bulunmiŋ ge kanduknen wor po nurde haŋ marbe Al Kurun belen biŋ yurum yiryen.

Niŋgeb goke amaŋen nurde hinayiŋ.

⁵ “Al kura neŋ harhet harhet ma ten haŋ marbe kame Al Kurun belen megen kurun gayen yunke yende hiyyen.

Niŋgeb goke amaŋen nurde hinayiŋ.

⁶ “Al kura Al Kurun diliŋde mata huwak ten ten niŋ feya bingeya niŋ kamtiŋen ten haŋ marbe Al Kurun belen mata huwak goyen yunen hiyen.

Niŋgeb goke amaŋen nurde hinayiŋ.

* **4:25:** Dekapolis gote miŋbe “10 taun haŋ.”

7 “Al kura al hoyan niŋ bunineŋ nurde yuner haŋ mar gobe Al Kurun wor bunineŋ nurde yuner hiyeŋ.

Niŋgeb goke amanen nurde hinayiŋ.

8 “Al kura biŋde dufay bulun ma kerde haŋ marbe Al Kurun keneŋ hinayiŋ.

Niŋgeb goke amanen nurde hinayiŋ.

9 “Al kura fulenaya kandukya yisikamde awalikde heŋ heŋ mata forok irde haŋ marbe Al Kurun belen diriŋne weŋ yinyeŋ.

Niŋgeb goke amanen nurde hinayiŋ.

10 “Al kura Al Kurun diliŋde mata huwak teŋ hike al hoyan belen bulun bulun yirke kanduk kurayen kurayen yeneŋ haŋ marbe Al Kurun belen alya bereyamin doyan yirde hi bana goŋ hinayiŋ.

Niŋgeb goke amanen nurde hinayiŋ.

11 “Be, ne gama nirde hike al belen goke igiŋ ma nurde sukal dirde bulun bulun dirde mere bulun kurayen kurayen ultiŋde irde hinayiŋ. Goyenbe goke ma nurde aman heŋ hinayiŋ.

12 Kanduk teŋ hinayiŋ gote murun gembe Al Kurun belen kurun dunyeŋ. Niŋgeb goke amanen nurde hinayiŋ. Mata gobe tiŋeŋ moŋ. Bikkeŋ Al Kurunyen mere basan mar yirde hinhan gwa-hade goyen po, deŋ wor gwaha dirde hinayiŋ,” yinyiŋ.

Hulsiya fawya

(Mak 9:50; Luk 14:34-35)

13 Irdeb sopte po yinyiŋ. “Deŋbe al haŋ kurun gate faw yara. Fawbe meten minyan. Goyenbe daha wet kura teŋ bulun hiyyeŋbe daha mat

sopte igin irtek? Epte mon. Ningeb faw bulun hitin gobe wok irtek. Irkeb al belen ufurka ten kun hinayin.

¹⁴ “Irde denbe al megen han kurun gate hulsi yara. Taun kurun kura dondonde hi gobe epte ma banare hiyen.

¹⁵ Gwahade goyen po al kura epte ma hulsi usun urde ten koron po aw uryen. Gwahade yarab ten hende binun irkeb al ya bin bana hinayin goyen tumnan hulsire hinayin.

¹⁶ Gwahade goyen po denbe hulsi yara hen Al Kurun dilinde mata wukken goyen al yikala yirde hinayin. Gogab matatin igin goyen yenenbe Al Kurun sanin minyan goyen isoka irde hinayin.

Al Kurunyen mere sanin ire yen wamirin

¹⁷ “Be, mongo ne gayen nenenbe dufaytindeb, ‘Yen belenbe Moseyen sabaya Al Kurunyen mere basan marte sabaya goyen walde pasi hewe yen wayyin,’ yen ma nurnayin. Nebe saba goyen wale yen ma wamirin. Gwaha titnenbe mere gote min wor po goyen ten kawan irmeke nurnan yen wamirin.

¹⁸ Fudinde wor po dinen hime. Megenya naninyin hiriryen goya goyen sabamin gote mere bilmin katin goyen unkuren mun kura bana ma kuyen. Hen henbe sabamin gote iginen tumnan forok yenayin.

¹⁹ Ningeb al kura sabamin kura gama irtek metenen mon wor po goyen pel irde go ma gama irdeb al hoyan wor go goya gama irde ma inyen al gobe Al Kurun belen alya bereyamin doyan yird yird bana gon denem mon hiyyen. Munan al kura

sabamin gama irde al hoyan saba yiryeŋ al gobe Al Kurun belen alya bereyamin doyan yird yird bana goŋ denem kurun wor po hiyyen.

²⁰ Fudinde wor po dinen hime. Den mata huwak ten hinayin goyen Farisi marya Moseyen saba maryat mata huwak goyen fole ma ir-nayinbe fudinde wor po epte ma Al Kurun belen alya bereyamin doyan yirde hi bana goŋ hurku-nayin.

Kanduk sope ird ird mata

²¹ “Be, bikkenbe Moseyen sabareb taytin yagobe, ‘Al ma gasa yirke kamnayin. Munan al kura gwaha tiyyenbe merere huwarde murungem bulun tiyyen,’ yintin goyen denbe nurde hanjen gogo.

²² Goyenpoga nebe go hende gaha dinen ti-him: al kura kadom inen tiyyen al gobe merere huwaryen. Gwahade goyen po, al kura kadom, ‘Dufaygem mon,’ inyen wor merem yan hen Yuda marte doyan mar dilinge huwaryen. Irde al kura belen kadom kura, ‘Gebe kukuwa,’ inyenbe kak alare kuyen.

²³ “Ningeb Al Kurun galak ire yen altare gor det yukuŋ henjab kadge kura belen bulun nurd guntin goyen bege bak yekeb

²⁴ detge go alta diling mar gor po yubul ten kun kadge goya kanduk go sope irde awalik hen gab mulgan hen Al Kurun galak irayin.

²⁵ “Be, al kura merem yan girde merere gukuŋ hikeyab aran po kanduktirin go belen kun henya sope iriryen. Mongo kun merere huwarkeb mere nurd nurd al belen gade kimyan titmin haninde

giryen. Irkeb kimyan titmin belen gade fere girde koyare gernayin geb.

²⁶ Fudinde wor po dinen hime. Kat sinare kwen yenbe hora gwahade kerayin gintin goyen tumnan po kerde pasi irde gab sinare kwayin geb,” yinyin.

Al berem yanbe huwak po hinayin

²⁷ Irde sopte yinyin. “Be, mere kurabe gahade yen hike nurde hanjen: ‘Al berem yanbe bere hoyan ma duwan yirde hinayin. Irde bere wor al hoyan ma duwan yirde hinayin,’ yitin.

²⁸ Goyenpoga nebe go hende gaha dinen tihim: al kura bere kura kenen gwaha irmewon yen bin huwaryen gobe bikken bere hoyanya duwan ten ten mata bulun goyen binde tiyyen.

²⁹⁻³⁰ Monjo ulge kurhan kura belen mata bulun tike ulge tumnan kak alare kwak geb, bulun tiyyen go po ten sina irayin. Delge yase belen mata bulun tikeb goyen marde temeyayin. Hange yase belen mata bulun tikeb go wor walde temeyayin.

Bere takira ten ten mata

(Matiyu 19:9; Mak 10:11-12; Luk 16:18)

³¹ “Be, denbe ‘Al kura berem takira tiye yenbe takira ten ten asan kan haninde kerdebe takira tiyyen,’ gwaha yen hike nurde hanjen.

³² Goyenpoga nebe go hende gaha dinen tihim: al kura berem go al hoyan ma duwan irde hikeya epte ma takira tiyyen. Takira tike bere go kun al hoyan tiyyenbe bere goya un gergen goya Al Kurun dilingde leplep mata ten har yen yinyen.

Goyenbe Al Kurun belen un bikkek gore yirke tahar yen un bikkek go minje iryen.” yinyin.

Biɲa ten ten mata

³³ Be, Yesu go sopte gaha yinyin: “Bikken Moseyen sabarebe taytin yago, ‘Biɲa ten henya usi ma ten hinayin. Al Kurun hitte biɲa tenbe biɲa tiyayin goyen po gama irayin,’ yintin goyen den wor nurde hanjen gogo.

³⁴⁻³⁵ Goyenpoga nebe go hende gaha dinen tihim: nanɲinbe Al Kurunyen maroro gasun. Irde megenbe yende kahan kerd kerd gasun. Irde Yerusalemben Doyan Al Kurun gote taun. Niɲgeb biɲa tinin yen goya det goyen goya den ma yurnayin.

³⁶ Tonantin yuwalɲen unɲkuren kura goyen tareɲtinde epte ma umɲam hoyan irnayin. Niɲgeb biɲa tenya tonantin ma den urnayin.

³⁷ Huginɲen mere fudinde po yen hinayin. Niɲgeb mere kura fudinde kenem, ‘Fudinde,’ yenayin. Munan fudinde mon kenenbe ‘Fudinde mon,’ po yenayin. Go hende mere kura sopte tinayinbe mere gobe Al Bulun hitte mat wayyen.

Wol hen hen mata

(Luk 6:29-30)

³⁸ “Be, mere kurabe gahade yen hike nurde hanjen: ‘Al kura belen delge upul tikeb ge belen wor wol hen din upul tiyayin. Irde misinje yufele tikeb ge belen wor wol hen misin yufele tiyayin,’ yitin.

³⁹ Goyenpoga nebe go hende gaha dinen tihim: al kura bulun dirke goya matamin go wol ma

hawayin. Al kura wan ulunḡe yase belen sen gurke goya wol ma hen kurhan wor tigiri ten unayin.

⁴⁰ Irde al kura ulinḡorge goke po ten merere geren tikeb buninen irde mene dibage manan unayin.

⁴¹ Irde al kura parsay girde, ‘Kandukne ten 1 kilomita kwa,’ ginkeb faran ure yen nurde kandukmin ten teban 1 kilomita kwayin.

⁴² Irdeb al kura det kuran amu hen gusunan girkeb mali po ten unayin. Munan al kura wan detge kura belnen tewe ginkeya ga basinḡa ma irayin.

Asogo

(Luk 6:27-28,32-36)

⁴³ “Be, mere kurabe gahade yen hike nurde hanḡen gogo: ‘Kadtin yago nin amanen nurd yunen hinayin. Irde asogotinbe bulun bulun yirde hinayin,’ yitin.

⁴⁴⁻⁴⁵ Goyenpoga nebe go hende gaha dinen tihim: Al Kurunbe al iginḡa bulunya tumḡande nanaya kigarinḡa yunen hiyen. Ningeb asogotin ge amanen nurde yunen hinayin. Irde bulun bulun dirde hinayin mar gobe Al Kurun belen faran yuri yen Al Kurun gusunan irde hinayin. Gogabe denbe Al Kurun tareḡmin kurun wor po gote dirnen wen igin hinayin.

⁴⁶ Be, al kura den ge amanen nurde dunen hinayin mar goke po amanen nurnayinbe Al Kurun belen gote murunḡem dunyen yen nurde han? Mon. Teks yad yad marbe mata bulun mar yinen

hanyen goyen wor kadom ge amanen nurde igin igin yirde hanyen.

⁴⁷ Yuda mar mon al min hoyan wor kadom mere gird ten igin igin yirde hanyen. Ningeb kadtin yago po mere yirde igin igin yirde hinayinbe matatinbe mel gote folek yen nurde han? Mon.

⁴⁸ Nantın Al Kurun taren minyan gobe huwak wor po geb, den dirnen wen wor gwahade go po huwak hinayin,” yinyin.

6

Al faran yurd yurd mata

¹ Be, Yesu belen sopte gaha yinyin: “Be, Al Kurun dilinde mata igin ten hini yenbe kenkela dufay hen ga mata ten hinayin. Al denke po ga mata ten hini ma yen hinayin. Gwaha tinayinbe Adotin Al Kurun sanın minyan gore matatin gote murungem ma dunyen.

² Usi marbe al belen denen turun dirnan yenbe al buniyen faran yurnin yen gabu yayan, kurabe belenyan huwarde bigul fu irde ga mata ten hanyen. Goyenbe den goya gwaha ma ten hinayin. Fudinde wor po dinen hime. Matamin gote murungembe al belen turun yirde hinayin goya go po tenayin. Kamebe hubu wor po geb.

³ Ningeb al buniyen kura faran yurnin yenbe balmin po mata ten hinayin. Hantin yase belen mata igin kura tike goya hantin tapa belen go ma nuryen.

⁴ Gwahade goyen po al buniyen faran yurnin yenbe al ma denen hikeya faran yurde hinayin.

Irkeb Nantiñ Al Kurun taren minyan gore al faran yurd yurd mata banare ten hinayin gote murungem dunyen.

Al Kurun mere ird ird mata

(Luk 11:2-4)

⁵ “Be, usi marbe Al Kurun mere irnin yenbe al denen turun dirnan yen gabu yayan, kurabe belen kogorhonyan al budam kun wan ten hanyende gor huwarde Al Kurun mere irde hanyen. Goyenbe den goya gwaha ma ten hinayin. Fudinde dinen hime. Matamin gote murungembe al belen turun yirde hinayin goyare gog po tenayin. Kamebe hubu wor po.

⁶ Ningeb Al Kurun mere irnin yenbe yatin bana hurkun yame tanbe Nantiñ Al Kurun banare hi goyen mere irde hinayin. Gogab Nantiñ belen banare hen balmin mata ten hinayin goyen denenbe gote murungem dunyen.

⁷ “Yuda mar mon al min hoyan belen unguramin dolon yirde henya mereninin nurnayin yen mere sobamde po yen teban ten hanyen. Goyenbe denbe Al Kurun mere irnin yen goya gwaha ma ten hinayin.

⁸ Adotin Al Kurunbe den belen gusunan ma irkeya bikken det goke nurde han yen nurde hi. Ningeb mel go ten han gwaha ma ten hinayin.

⁹ Ningeb Al Kurun mere irnin yenbe gaha yen hinayin:

Adoninin, gebe kurun wor po.

Huginen turun girde hitek.

¹⁰ Gere alya bereya doyan yird yird mata goyen kawan forok irayin.

Irdeb dufayger meten ten gote iginen ge hayende
gor iğin wor po forok yirde hayen gwahade
goyen po,

megen gayen wor forok yirde hayin.

¹¹ Irdeb han kayen bingebe gwaha mat nene ep
nenayin yenbe gwahade po dunen hayin.

¹² Irdeb al hoyan belen bulun dirke mata bu-
lunmin halde yunen hityen gwahade goyen
po,

mata bulunminin halde dunen hayin.

¹³ Irdeb dubul tike tunan bulun bana ma kattek.

Irde Al Bulun haniinde mat dumulgan tiyayin.

¹⁴ Ningeb al kura bulun dirkeb mata bulunmin
goyen halde yunnayin. Gogab Adotin tarenmin
kurun gore wor mata buluntin halde dunyen.

¹⁵ Munan al kura bulun dirkeb halde ma yun-
nayin gobe Adotin tarenmin kurun gore wor mata
buluntin go ma halde dunyen.

Binge kutna ird ird mata

¹⁶ “Be, usi marbe binge kutna ird hen yabe
kimiñ algup neke tupi sam tikeb al belen yenen
mel gabe gwaha ten han yen dennan yen nurde
mata ten han yen. Goyenbe den goya gwaha ma
ten hinayin. Matamiñ gote murungembe al belen
turan yirde hinayin goya po tenayin. Kamebe
hubu wor po.

¹⁷ Ningeb binge kutna ird hen yabe fe gemde
tonantın par ten kutnare hite yara ma ten kun
hinayin.

¹⁸ Gogab binge kutnare hinayin goyen al belen
gwaha ten han yen ma denen hinayin. Goyenbe
Adotin banare hi gobe nurde hiyen. Ningeb mata

balminde ten hinayin goyen gote murungem dunyen.

Megen nin samun
(Luk 12:33-34)

¹⁹ “Be, megen nin samunbe sisige belen walinayin, kurab kawe mar belen kawe dirnayin. Irde kurabe tiktuk irde bulun henayin. Ningeb dindiken ge nurde samun yade buda ma yirde hinayin.

²⁰ Gwahade yarabe samunтин goyen yade al faran yurde hinayin. Irkeb Al Kurun belen gote murungem igin wor po goyen kame dunen yenbe gasunminde yerde hiyen. Gobe det kura belen epte ma bulun yirnayin.

²¹ Dufaytin kurunbe samunтин hiyende gor po hiyen geb, gago momon dirde hime.

²² “Be, diltinbe ultinde hulsi yara. Ningeb diltin igin hinayinbe hulsire han yara Al Kurunyen samun banare hi goyen kenen kenkela bebak ten hinayin geb, hen hentin igin wor po hiyyen.

²³ Munan diltin bulunbe samunmin epte ma kenen bebak ten megen nin samun nin po nurde hinayin geb, hen hentin gobe kidoma belen po aw duryen. Ningeb Al Kurunyen samun banare hi goyen kenen bebak titek yarabe bebak ma tinayinbe hen hentinbe bulun wor po hiyyen.

²⁴ Albe epte ma wawun unjurende po doyan al irawa nin meten ten yunyen. Epte mon wor po. Gwaha titnenbe doyan al kurabe harhok unyen. Munan kurabe amanen nurd unen kenkela awalik irde hiyen. Ningeb gwahade goyen po,

epte ma Al Kurunya horaya tumňande meten ten yunnayın.

*Hen henge nin ug po ma dufay hawayın
(Luk 12:22-31)*

²⁵ “Ningeb fudinde dinen hime. Megen gar henya daha mat bingeya feya netek, irde ul-ninindebe da yade umňa ten hitek yenbe hen henjin ge ugun po ma dufay hen hinayın. Bingebe igin gega, gore po epte ma hen henjin igin iryen. Ultin umňa manan gwahade po ultin igin ma iryen.

²⁶ Be, nu nin nurnan. Yenbe bing ma harde hanjen. Irde sak yeke yade bing yadi yerd yerd yare ma yerde hanjen. Goyenbe Al Kurun belen paka yirde hiyen. Al Kurun sanin minyan belen nu wor gogo kenkela po doyan yirde hiyen. Munan denbe nu gote folek wor po geb, dahadem Al Kurun belen denen wasak tike bing kamnayın? Epte mon geb.

²⁷ Den gayen kura megen gar hen hen nin ugun po dufay henayınbe igin nalutin goyen mun kura singir irde ulyande hinayın? Epte mon.

²⁸ “Irde danin geb ultin umňa nin ugun po dufay hen hanjen? Yamun fuwalabe yenenmin igin mun wor po goke nurnan. Yenbe ulin umňa nin meten ma ten ulinhor kura ma gada yirde hanjen.

²⁹ Goyenbe fudinde wor po dinen hime. Bikken Israelyen doyan al kurun Solomonbe ulin umňa kusamun wor po yerde hinhin. Goyenpoga ulin umňamin igin wor po gore yamun fuwala goyen epte ma fole yirtek hinhan.

³⁰ Yamun fugala gobe nalu sobamde ma hanjen. Han̄ka hinayin, gisebe al belen walde kakde yemeyde hanjen. Be, gwahade goyen po, yamun fugala gobe det kurun kura gogo mon gega, Al Kurun belen doyan yirde um̄na yirde hiyen geb, den̄be danīn ulninīn um̄na ma gitik ten dunyen yen goke ugun po dufay hen han̄? Den̄be Al Kurun nin hekken wor po ma nurde han̄.

³¹ Ningeb da bin̄ge netek, da fe netek, irde da yade ulninīn um̄na titek yen goke dufay ugun po ma hen hinayin.

³² Megen nin mar ne nin ma nurde han̄ gore gab det budam kurun gwahade goyen yad yad nin ugun po dufay hen goke kanduk̄nen nurde hanjen. Goyenbe Adotin Al Kurun san̄in min̄yan gobe det goke nurde han̄ yen bicken den̄en hiyen.

³³ Ningeb den̄be Al Kurun belen doyan dird dirdya mata huwak ten ten̄ya nin wa nurde hinayin. Irke gab Al Kurun belen den̄ det kuran nurde hinayin kurun goyen wor dunen hiyen.

³⁴ Ningeb sopte fay urkeb daha titek yen goke dufay ugun po ma hen hinayin. Fay urke gab gwaha kura tiye yen nurnayin. Han̄kayen kandukbe han̄kayen po, munan̄ giseyenbe giseyen po geb,” yinyin.

7

*Kad̄in̄de mata goke bulun̄ mat ma yawayin̄
(Luk 6:37-38,41-42)*

¹⁻² Be, Yesu go sopte gaha yinyin: “Al kura kadam mata tike kenen̄be, ‘Nebe igin, munan̄ yen̄be bulun̄ ten̄ hi,’ yiyyen̄be al go wor Al Kurun

belen gwaha po iryen. Al kadtiñ kurate mata daha mat kennayinbe Al Kurun wor gwaha mat dinyen. Ningeb al kadtiñ belen mata kura tike goya den belen, 'Nenbe huwak,' yen nurde, 'Al gobe daniñ bulun tiya?' ma yen hinayin. Monjo Al Kurun belen den wor gwaha po diryen geb.

³ Denbe kadtiñde mata bulun muknen mun wor po mukun yara goyen yenen goke yen han. Goyenbe dindikenje mata bulunbe he parwek karkuwan yara diltin pet ten han goyen go ma po nurde han.

⁴ He parwek gore huginen diltin pet titin han goyen ma yenenya dahade ningeb, 'Kadne, mukun delger hi go ten sinja ire?' innayin?

⁵ Dulin usi mar wor wor, mehendeb dindikenje diltinde nin he parwek go wa yade sinja yirnayin. Irde gab diltin kenkela nankenenbe kadtiñ dilingde mukun goyen igin yad sinja yirnayin.

⁶ "Be, denbe det kura Al Kurun untek goyen yade kulu ma yunen hanjen. Irde selwen yara det damum hende hoyan goyen yade bu binde ma yemeyde hanjen. Gwaha yirkeb samun igin kura gogo yen ma nurde mali yufurka tinayin. Ningeb gwahade goyen po, al kura Al Kurunyen merebe titminen min minmon yen nurde han mar gobe Al Kurunyen det mali mali ma yunen hinayin. Monjo mel gore tigiri ten buya kuluya belen disen sak dirtinen dirnayin geb," yinyin.

*Al Kurun gusunan ird ird nin bada ma henayin
(Luk 11:9-13)*

⁷⁻⁸ Irdeb sopte po gaha yinyin: "Be, al kura belen det kuran nurde Al Kurun gusunan irkeb

unyen. Irde det kuran nan'kenen kurut yekeb ikala iryen. Irde yen belen alya bereyamin doyan yirde hi bana gon hurkun hurkun yame goyen mayde teban irkeb yame hol ird unyen. Ningeb den wor det kura nin nurde Al Kurun gusunan irtinde po hikeb dunyen. Det goke nan'kenen kurut yitinde po hikeb dikala diryen. Irde yen belen alya bereyamin doyan yirde hi bana gon hurkun hurkun yame mayde teban irkeb yame hol ird dunyen.

⁹ “Be, den gayen al ganunbe dirinmin belen bingbe nin yekeb hora ten unyen?

¹⁰ Irde makan dapna nin yekeb kunere ten unyen?

¹¹ Den mata bulun mar wor dirintin yago belen det kuran yekeb det igin po yunnin yen nurde hanyen. Ningeb Adotin Al Kurun sanin minyan gobe den megen nin mar gote folek geb, gusunan irkeb det igin wor po goyen dunyen geb.

¹² “Gwahade ningeb mata ten hinayin kurun gobe al hoyan belen nen gwaha gwaha dirde hiwon yen nurde han gwahade goyen po, den wor gwahade po yirde hinayin. Moseya Al Kurunyen mere basan marya belen saba ten hinhan gote min wor pobe gago geb.

Yame dirnen bana hurkunayin

(Luk 13:24)

¹³⁻¹⁴ “Be, kak alare kun kun yamebe kurun, irde gor kun kun belenbe metenen mon. Ningeb al budam yame goyen bana hurkun han. Munan Al Kurunya hugin hen hen gasunde gor kun kun yamebe dirnen mun wor po. Irde belen manan

metenĕj. Niĕgeb al yunĕkuren yunĕkuren belen mun po gab yame goyen kenĕj bebak ten han. Niĕgeb denbe yame dirĕj bana gore hurkunayin.

Heya he gote iginenya

¹⁵ “Be, Al Kurunyen mere basan mar falkuk nin kenkela hen hinan ko. Go mar gobe dapna fulenam mon sipsip yara hen wanayin. Mereminbe igin yara gega, bin bana dufayminbe bulun wor po geb, kulu duwi belen al isitin yara hen henĕtin bulun wor po irnayin.

¹⁶ Gwahade mar gobe mataminde po gabe fudinde Al Kurunyen mere basan mar ma usi mar wet goyen yenen bebak ten hinayin. Al belen wain iginbe kan hoyan hende ma yade hanĕyen. Fik he iginen wor he mali hende ma yade hanĕyen.

¹⁷ Gwahade goyen po, he iginbe iginen igin po forok yirde hiyen. Munan he bulunbe iginen bulun po forok yirde hiyen.

¹⁸ Niĕgeb he iginbe iginen bulun ma forok yirĕyen. Munan he bulunbe iginen igin ma po forok yirĕyen.

¹⁹ Niĕgeb he kura iginen igin ma forok yirĕyen gobe ilde kak alare temeynayin.

²⁰ Niĕgeb gwahade goyen po, matamin belen gab mel gobe gwahade mar yen yenen bebak tinayin.

²¹ “Be, alya bereya megen henya, ‘Doyan Al Kurun, Doyan Al Kurun,’ ninen han gega, al yunĕkuren belen po Al Kurunyen alya bereya henayin. Adone Al Kurun sanĕj minyan gote

dufay goyen kenkela nurde go po gama irde han mar po gab Al Kurunyen alya bereya henayin.

²² Nalu funande goyenterbe al budam belen, ‘Doyan Al Kurun, Doyan Al Kurun, nenbe sanjinger merege basan hen tagalde hinhet. Irde tarenger ungura yakira ten mata tinen kurayen kurayen yirde hinhet. Ningeb nenbe gere alya bereya,’ ninnayin.

²³ Goyenbe ne belen kawan po, ‘Mata bulun mar, nebe go ma wor po nurd dunen hime. Hoyan kunan!’ yinen.

*Al irawayen ya ird ird mata
(Luk 6:47-49)*

²⁴ “Be, gwahade ningeb al kura merene nurde gama iryen al gobe ya ire yenbe tola metemin dukun po talde hora po dalun unyen go gwahade goyen.

²⁵ Kigarin kurun katen figilu tenen yan kuyen. Irde mene sanin yare gor kuyen gega, tolambe sanin po yimiytin geb, epte ma tobo tike katyen.

²⁶ Goyenbe al kura merene nurde ga gama ma iryen al gobe al kukuwa kura mulowo hende ya iryen go gwahade goyen.

²⁷ Ningeb kigarin kurun katen figilu tenen yan kuyen, irde mene sanin yare gor kukeb tolambe mulowo hende yimiytin geb, ya gobe katen bulun wor po hiyyen,” yinyin.

²⁸⁻²⁹ Be, Yesu go sabamin pasi irkeb gor hihan mar gore meremin go tonnen yan wor po nuramin. Irdeb hurkunat tenbe, “Ey, sabamin gabe Moseyen saba marte saba yara mon be!” yamin.

8

Al busuka minyan sope iryin

(Mak 1:40-45; Luk 5:12-16)

¹ Be, sabamin go pasi irdeb dugure gor mat katen kun hikeb al budam gama irde kun hinhan.

² Irkeb busuka minyan al kura gore wan kimin mar dokolhon yugulun tenbe, “Doyan Al Kurun, dufayger wilaknen nurdeb sope nirke igin hewen,” inyin.

³ Irkeb al go ulinde hanin kerdeb, “Igin guram giren. Ningeb igin hawa!” inyin. Irkeb goyare po busuka go tubul tike igin hirin.

⁴ Irkeb, “Igin haha gake al kura momon irak yo. Gwaha titnenbe Al Kurun dolon ird ird mata doyan mar hitte kun sikkenge yikala yirke kenenbe fudinde igin haha ginnayin. Irke gab Mose belen bikken yirin mata goyen gama irde dapna kura mel go yunnayin. Irkeb ge nin ten Al Kurun nin dapna go kumga tinayin. Irkeb al tumnan fudinde igin hihi yen gennayin,” inyin.

Fuleña marte doyan alyen dufaymin tareñ

(Luk 7:1-10)

⁵ Be, gwaha tenbe Yesu go Kapeneam taunde kurin. Irkeb Roma gabmanyen fuleña marte doyan al* kura gore faran nuri yen wayyin.

⁶ Irdeb, “Doyan Al Kurun, meten alne kura ulin kamke ulin misin kurun wor po katen yare ferde hi,” inyin.

⁷ Irkeb Yesu belen, “Kun sope iren,” inyin.

* **8:5:** Fuleña marte doyan al gabe fuleña mar 100 doyan yirde hiyen.

⁸ Irkeb al gore wol henbe, “Doyaŋ Al Kurun, ge belen ne al gahade gate yare kutek mon. Niŋgeb dulin mere po tikeb meten alne igin hiyyen.

⁹ Ne wor doyaŋ alner yufukde hen yende mere po gama irde himyen. Irde ne wor fulenɓa mar kura doyaŋ yirde hime geb, al goyen kura, ‘Kwa,’ inmekeb kuyen. Munan kurabe, ‘Waya,’ inmekeb wayyen. Irde meten alne manan, ‘Det ga ira,’ inmekeb gwaha po tiyyen,” inyin.

¹⁰ Irkeb Yesu belen al gote mere go nurde tulfut yirin. Irdeb gama irde kun hinhan mar goyen fulgan kanbe, “Fudinde wor po dinhem. Israel bana ga ne nin dufaymin sanin irtin al kura gahade ma kenen himyen. Hubu wor po.

¹¹ Ga nurnan ko. Kame kame Al Kurun belen alya bereyamin doyaŋ yirde hi bana gon dula mata kurun forok yiyyen. Goyenterbe Yuda mar mon al min hoyan belen megen kurun ga hike kwa gayen kurhan mat mat wanbe Yuda marte asem yago Abraham, Aisakya Yekopya irde gasunminyan gasunminyan keperde dulan ten hinayin.

¹² Goyenbe Yuda marbe Al Kurun belen basina yirtin gega, ne nin dufaymin sanin ma irnayin mar gobe yakira tike sinare kidoma bana gon hinayin. Irde esenbe misin yisen hinayin,” yinyin.

¹³ Irdeb fulenɓa marte doyaŋ al goyen, “Iginge kwa. Ne nin dufayge sanin irde ha geb, gwahade forok yewon yen nurha gwahade po forok yiyyen,” inyin. Irkeb meten alminbe Yesu belen mere tiyyin nalu goyenter po igin hiriŋ.

Yesu belen al budam sope yiriyin
(Mak 1:29-34; Luk 4:38-41)

¹⁴ Be, Yesu go Pitayen yare kunbe Pita tenjak aygan minyan ferde hike kinyin.

¹⁵ Irde kun haninde tanarkeb aygan go tubul tiyyin. Irkeb bere gore huwarde binje kan yunyin.

¹⁶ Be, kun hako ga kidoma hen hikeb ungura ketal yurtin mar budam yawayamin. Irkeb Yesu belen ungura go merere po yakira tiyyin. Irde al garbam minyan manan tumnande sope yirke igin hamin.

¹⁷ Gwaha ten hinhin goke bikken Al Kurunyen mere basan al Aisaia belen asande mere kura gahade kayyin:

“Al gobe nende mata bulunya garbamnininya pasi yiryen,” yitin hi. *Aisaia 53:4*
Ningeb mere gote iginenbe mata gogo forok yirde hinhin.

Yesu gama irninbe det kura yubul tinayin
(Luk 9:57-62)

¹⁸ Be, Yesu gob al budam wan gabu irke yenenbe komatmin yago goyen, “Fe ala kurun ga sinja iron mat kuni,” yinyin.

¹⁹ Irkeb Moseyen saba tagal tagal al kura gore wanbe, “Tisa, nebe ge kun hen taha kurun gobe gama po girde kun hen,” inyin.

²⁰ Irkeb wol hen, “Kulu duwibe ferd ferd gasun minyan. Nu wor hagam yan. Goyenpoga ne Al

Urmin[†] gabe gor kura ferde usan hetek gasun[†] nem mon,” iniyin.

²¹ Irkeb komatmin hoyan kura goreb, “Doyan Al Kurun, nebe gama giren gega, kun adone wa ten mete ten gab wan gama giren,” iniyin.

²² Irkeb Yesu belen, “Wan gama nira! Al kamtin gobe tubul tike al ne nin ma nurde Al Kurun dilinde kamtin yara han mar gore gab ten mete tinayin geb,” iniyin.

*Yesu belen mene kurun masi irke tik yirin
(Mak 4:35-41; Luk 8:22-25)*

²³ Be, gwaha tenbe hakwa kura go hende hurkurin. Irkeb komatmin yago wor go hende hurkunbe yenya kwamin.

²⁴ Irke gwahade forok yewen tiya yen ma nurkeya bemel po mene kurun huwaryin. Irkeb duba karkuwan karkuwan fumde wan hakwa mayde binde hurkun ala hen hinhin. Goya goyenbe Yesube firinde hinhin.

²⁵ Irkeb komatmin belen kun isan henbe, “Doyan Al Kurun, fe nene kamnin tihit geb, faran dura!” inamin.

²⁶ Irkeb huwarde, “Danin geb ne nin heken ma nurde kafura hen han?” yinyin. Irdeb menyaya makanya bulun wor po hirin goyen masi yirke kamaryum.

²⁷ Irkeb mel go hurkun[†]kat tenbe, “Da albe gago? Menyaya makanya wor yende mere nurhar!” yen kadam gusun[†]an gird tiyamin.

[†] **8:20:** Al Urmin gote minbe alya bereya Al Kurun hitte Yumulgan ten ten Al. Daniel 7:13 gorbe denjem Al Urmin goyen hi.

*Gadara marte nanare kurin
(Mak 5:1-20; Luk 8:26-39)*

²⁸ Be, meɲe kamke mel go kuɲ kuɲbe Galili fe ala siɲa kurhan Gadara marte nanare forok yamin. Irkeb al irawa kura unɲura ketal yurtin bembayan heɲ kuɲ haryen gore Yesu hitte wanyaryum. Al irawa gobe misinɲen yan wor po geb, albe yeɲ haryenyan gor kutek mon.

²⁹ Be, irem gore Yesu hitte wanbe, “Al Kurun Urmin, daha direɲ wayha? Nalu hako hikeya bulun dire yeɲ wayha?” inen kwep iraryum.

³⁰ Be, goya goyenbe bu buda kurun kura sorte yarham po heɲ dulan ten hinhan.

³¹ Unɲura gore Yesu goyen esen mere irdeb, “Dakira tiye yeɲ nurdeb dad derke kuɲ bu buda iro ketal yurtek,” inaryum.

³² Irkeb, “Kunan!” yinkeb unɲura buda go al irawa goyen yubul ten kuɲ bu buda kurun go ketal yurkeb kuɲ hamulare mat fe alare katen fe nene kamamin.

³³ Irkeb bu doyan yirde hinhan mar gobe busa-harde taunde kuɲbe al irawa unɲuram yanya bu budaya hitte mata forok yirin kurun goyen goke al momon yiramin.

³⁴ Irkeb al taunde nin gobe tumɲan Yesu kin-nin yeɲ gir yeɲ wayamin. Irde wan kenenbe, “Nananininde gar ma hayin. Dubul ten kwayin,” inen esen mere iramin.

9

*Al ulin kamtin sope iryin
(Mak 2:1-12; Luk 5:17-26)*

¹ Be, gwaha irkeb Yesu go hakwa hende hurkunbe mulgan hen meten ten hiyen taunde Kapeneam kurin.

² Irkeb al ulin kamtin kura goyen sapir hende tawayamin. Irkeb Yesu belen mel gote dufaymin yen ge taren irtin go yenenbe al goyen, “Dirin, kanduknen ma nurayin. Mata bulunge halhem geb,” inyin.

³ Gwaha yekeb Moseyen saba mar kura belen go nurdeb, “Ey, Al Kurun belen po ga alyen mata bulun halde yunen hiyen gega, al gare gwaha tihim yen hi geb, al gabe Al Kurun sukal irde hi,” yen dufay hamin.

⁴ Irkeb dufaymin yenen bebak tenbe, “Danin geb bitinde dufay bulun kerde han?

⁵ Daminbe metenen yen nurde han? ‘Mata bulunge halde gunhem,’ yihim goyen ma ‘Huwarde kwa,’ yewen goyen?

⁶ Dufaytindebe al garbam sope ird ird gobe metenen yen nurde han. Ningeb nebe den belen metenen nurde han goyen iren tihim. Irmeke gab megen garbe ne Al Urmin gabe alyen mata bulun halde halde sanin minyan yen nenen bebak tinayin,” yinyin. Irdeb al ulin kamtin goyen, “Huwarde gasunge ten yager kwa,” inyin.

⁷ Irkeb al go huwarde yaminde kurin.

⁸ Irkeb al buda gor gabu iramin goyen mata go kenenbe hurkun kat tiyamin. Irdeb Al Kurun belen al guram yird yird taren al yuntin goke Al Kurun turun iramin.

*Yesu belen Matiyo hoy iryin
(Mak 2:13-17; Luk 5:27-32)*

⁹ Be, gwaha tenj Yesu go gor mat hoyande kun henjabe al kura denjem Matiyu goyen teks yad yad gasunde hike kinyin. Irdeb, “Wan gama nira,” inyin. Irkeb al gore huwarde Yesu gama iryin.

¹⁰ Be, Yesuya komatminya Matiyuyen yare hen binje nene hikeb teks yad yad marya* al kura Moseyen saba kenkela ma gama irde hike, “mata bulun mar” yinen hanjen mar goya wan yenja hen dulan tenj hinhan.

¹¹ Irkeb Farisi mar belen go yenenbe Yesuyen Komatmin gusunjan yirdeb, “Danin geb tisatinbe teks yad yad marya ‘mata bulun mar’ yinen hityen mar goya binje nene han?” yinamin.

¹² Irkeb mere go nurdeb Yesu belen, “Al ulinde igin po hiyenbe guram al nin ma nuryen. Al garbam minyan belen gab guram al nin nuryen.

¹³ Nebe nen al huwak yen nurde han mar goyen hoy yire yen ma wamirin. Goyenpoga nenbe mata bulun mar yen nurde han mar goyen hoy yire yen wamirin. Goke tenbe Al Kurun belen, ‘Nebe al belen galak nird nird nin ma nurde hime. Kadom buninen gird gird mata goke amanen nurde hime,’ yitin goyen kun min gwahade yen kenkela dufay hen nurnan ko,” yinyin.

*Binje kutja mata nin Yesu gusunjan iramin
(Mak 2:18-22; Luk 5:33-39)*

* **9:10:** Teks yad yad marbe Israel mar nin ma meten tenj hinhan. Roma gabman nin tenj teks yade hinhan. Irde teks hora kurabe yingen ge yade hinhan geb, mel goke Israel mar belen igin ma nurde yunen hinhan.

14 Be, gwaha yinenbe gor hinhin. Irkeb Yon Baptaisyen komatmin belen wanbe, “Nenya Farisi maryabe binge kutna irde hityen gega, dahade geb komatge wenbe gwaha ma ten han?” inen gusunan iramin.

15 Irkeb Yesu belen wol henbe, “Albe tikin mere min alya tumnan henyaabe danin esen hinayin? Epte mon. Goyenbe tikin mere min al goyen asogom belen wan ten kuke gab yen ge nurde binge kutna irde hinayin,” yinyin.

16 Irde yenbe saba gergen tagalde hi goyen goke maya mere mat gaha yinyin: “Al kura amil gergen walde ten ulinhor bikkek erek yitin goyen ma pet ten gada iryen. Gwaha irkeb amil parwek gergen gore ulinhor bikkekde nin kan goyen yulun tenbe erek yitin yamen gobe sopte bulun wor po iryen.

17 Gwahade goyen po, al wain fimin gergen yade dapna sikken po wain fimin hen hen irtin bikkek bana gon ma unnayin. Gwaha irnayinbe wain fimin gergen goreb dapna sikken bikkek go kumba tikeb erek niyyen. Irkeb wain fimin wok yiyyen. Dapna sikken go manan gog po bulun hiyyen. Albe gwaha ma ten hanyen. Wain fimin gergenbe wain fimin hen hen dapna sikken gergen bana po unen hanyen. Irkeb det irawakde bulun ma hiriryen,” yinyin.

Bere dirnen kamtinja bere kura danduku minyanya goyen sope yiryin

(Mak 5:21-43; Luk 8:40-56)

18 Be, Yesu go saba yirde hikeyab gor nin doyan al kura wan Yesu din mar dokolhon yugulun

tenbe, “Wernebe gayamun ga kama. Goyenbe kun hange ulinde kerkeb sopte huwaryen,” inyin.

¹⁹ Irkeb Yesu go huwarde al goya kwaryum. Komatmin yago wor gama irde kwamin.

²⁰⁻²¹ Be, hako kun hikeyab bere kura dama 12 gayen danduku manan hiyen gore dufayminde po, “Kun menere nin ulinhormin po sisan urenbe igin hewen,” yen nurdeb kame belen mat wanbe Yesuyen mene diba ulinhor goyen murunde sisan uryin.

²² Be, bere gore gwaha tikeb Yesu belen fulgan kan kinyin. Irdeb, “Werne, kanduknen ma nurrayin. Dufayge ne nin sanin irha gore sope girke igin haha geb,” inyin. Irkeb goya goyen po igin hirin.

²³ Be, Yesu go kunbe doyan al wan tupi ten kwaryum al gote yare forok yenbe ya binde hurkurin. Hurkunbe dolonde nin bulelun fuk yird yird marya esen marya gabu irde hinhan go yinyin.

²⁴ Irdeb, “Bere gabe ma kama. Dulin ferde hi. Ningeb kat sinare kunan!” yinyin. Irkeb mel goreb hinman fayken iramin.

²⁵ Be, al buda go yakira tike megen kun pasi hamin. Irkeb Yesu po hurkun bere go haninde tanarkeb kamyinde mat huwaryin.

²⁶ Irkeb gote mere momonminbe al nana bana go hinhan gobe nurde tukutin ala tiyamin.

Dilin titminya mohon kattinya guram yiriyin

27 Be, Yesu mel go yubul ten kun hikeb diliŋ titmiŋ al irawa belen kuware, “Dewit Ur-min, buniŋen dirde faran dura be,” inen gama iraryum.

28 Goyenbe Yesube nurd nurd yare hurkuriŋ. Irkeb al irawa goyen manan gama irde kukeb, “Der gayen epte sope diryen yen ne niŋ dufaytiriŋ saŋiŋ irde har?” yinen gusaŋan yiryiŋ. Irkeb, “Gwahabe, Doyaŋ Al Kurun,” inaryum.

29 Gwaha yekeb Yesu belen diliŋyan sisan yur-deb, “Ne niŋ dufaytiriŋ tareŋ irhar geb, nurhar gwahade po forok yiyyen,” yinyiŋ.

30 Irkeb diliŋ wuk yeke nanŋenaryum. Irkeb, “Sope dirhem gake al kura ma po momon yiriryen,” yinen saŋiŋ po utaŋ yiryiŋ.

31 Gega irem go siŋare kuŋbe Yesu belen sope yiryiŋ goyen tagalde tukukeb al naŋa bana gon niŋ gobe nurde pasi hamiŋ.

32 Be, Yesuya komatmiŋya goyen siŋare hen kun hikeb unŋura ketal urke mohoŋ kattin al kura goyen Yesu hitte tawayamiŋ.

33 Irkeb Yesu belen unŋura go takira tikeb al mohoŋ kattin goyen mere tiyyiŋ. Irkeb al buda kurun gobe hurkunŋat tenbe, “Israel naŋa bana gaŋ mata gahade kura ma kenen hityen!” yamiŋ.

34 Goyenbe Farisi marbe, “Unŋurayen kurunmiŋ gote tarende unŋura yakira ten hi,” yamiŋ.

Al Kurunyen meten marbe budam mon

35 Be, Yesu go taunyanya tiyunyanya kurun goyen kuŋbe Yuda marte gabu yayan mere igiŋ Al Kurun belen alya bereyamiŋ doyaŋ yird yird goke

saba yirde hinhin. Irde al garbam min kurayen kurayen goyen sope yirde hike igin hen hinhan.

³⁶ Gwaha ten kun henjab al buda go yinyin. Irdeb al buda gobe sipsip kura yewek minmon hen buninen buninen ten yingen gwaha mat kura sanin hetek mon yara yenenbe buninen wor po nurd yunin.

³⁷ Irde komatmin yago siraw mere mat, “Bingebe sak yen ep han gega, binge goyen yad yad meten marbe budam mon.

³⁸ Ningeb binge meten gote Doyan Al Kurun gusunan irkeb meten mar budam yad yerke metenminde gor kun binge yade hinayin,” yinyin.

10

Yesuyen mere basan mar 12

(Mak 3:13-19; Luk 6:12-16)

¹ Be, Yesu belen komatmin 12 goyen yinke kun gabu irkeb garbammin kurayen kurayen sope yird yirdya ungura yakira ten ten taren ya yunin.

² Yesuyen mere basan mar 12 gote denembe gago: mehenbebe Saimon denem kurabe Pita. Irde kulin Andruya, Sebedi urmin waran Yemsa kulin Yonya.

³ Filipya Batolomiyuya Tomasya teks yad yad al Matiyuya. Irde Tadiusya Alfius urmin Yemsa.

⁴ Irde Saimon Selotyabe* Yesu asogom haniinde kiryin al Yudas Iskariotya.

* **10:4:** Yesu hinhin goyenterbe Roma gabman asogo irde han yen mar kura hinhan. Go mar gobe Selot yinen hinhan.

*Mere basan marmij meten yunij
(Mak 6:7-13; Luk 9:1-6)*

⁵ Yesube go mar 12 goyen yad yerke kunij tiyamin. Kunij tikeb saba gahade yirij: “Al mij hoyan Yuda mar mon hitte ma kunayin. Irde Samaria marte taun kura bana ma po kunayin.

⁶ Israel marbe Al Kurunyen sipsip gega, meremin ma nurde duwi hamin geb, yen hitte kunayin.

⁷ Kun henjabe, ‘Al Kurun belen alya bereyamin doyan yird yird nalu gobe binde hihi,’ yinen tagalde hinayin.

⁸ Irde garbam mar sope yirde, al kamtin yisan hen, al busuka minyanbe sope yirde, al unguram yanbe ungura go yakira ten kun hinayin. Taren gobe dulin tahan geb, gwahade goyen po den wor murungem mon dulin al faran yurde hinayin.

⁹⁻¹⁰ Irkeb meten ten hinayin goke al belen faran durde hinayin. Ningeb kunij yenbe hora unkuren mun kura ma po ten kunayin. Irde kalwa ma yawarnayin. Ulinhorbe ultinde han gog ep geb, hoyan ma yawarnayin. Kahanbasanya genunya wor hoyan ma yawarnayin.

¹¹ Taunyaanya tiyunyaanya kunbe al kura gargar dirtek al goke nankenen yenenbe yeny hinayin. Yeny hen kun kun metentin pasi irhet yen nurdeb yubul ten hoyande wor kunayin.

¹² Be, al gote yare kunbe ya min mar goyen, ‘Al Kurun belen bitin yisikamke ga hinayin,’ yinayin.

¹³ Irke mel go den ge igin nurke yenenbe bin kamke hen hen mata goyen gor po tubul tike

hiyen. Munan igin ma denke yenenbe bin kamke hen hen mata gobe den hitte mulgan hiyyen.

¹⁴ Al kura gargar ma dirde meretin ma nurkeb mel gore Al Kurunyen mere pel irhet yen bebak tinan yenbe kahanjinde nin tupi go busan hen gab ya wet ma taun wet kura goyen tubul ten kunayin.

¹⁵ Fudinde wor po dinen hime. Taun goyenter nin marbe kame Al Kurun belen al iginya bulunya pota yiryen nalureb mata bulunmin gote murungem bulun wor po tenayin. Bikken Sodomya Gomoraya taunde nin mar belen mata bulun ten hinhan gote murungem tamin gote folek wor po tenayin geb,” yinyin.

*Kanduk kurayen kurayen forok yenayin
(Mak 13:9-13; Luk 21:12-17)*

¹⁶ Be, Yesu go sopte gaha yinyin: “Den kunayin bana gonbe bulun dirtek marbe budam han. Ningeb sipsip yad yermek kulu duwi kahal bana kutnen tinin tahan. Ningeb den meten ten kun henyabe kunere belen kenkela dufay hen ga mata ten hanyen go gwahade goyen po ten hinayin.[†] Kalyingibe bulun gog kura tiya yen ma nurde hityen. Ningeb den wor matatin gwahade po ten kun hinayin.

¹⁷ Irdeb al nin nurde ga meten ten hinayin. Mel gore merem yan dirke merere huwarnayin. Irde kurabe gabu yayan dukun dusulak tinayin.

[†] **10:16:** Yesu belen kunere nin yirin gobe bulun mat ma yirin. Kunerebe kenkela dufay hen ga mata ten hanyen goke nurde yirin.

18 Ne niŋ bulun nurde haŋ mar belen dukun megen niŋ doyaŋ mar kurayen kurayen dilinɗe merere derde hinayin. Irkeb ne niŋ gusunɗan dirkeb mel goya Yuda mar moŋ al min hoyanya goyen momoŋ yirnayin.

19-20 Niŋgeb waŋ dade merere dukun gusunɗan dirkeb daha yiniŋ tihit yeŋ barbar ma yenayin. Goyenter daha mat mere teŋ teŋ dufay dunen dunen albe deŋ moŋ. Goyarebe Holi Spirit belen dufay dunke mere tinayin geb, goke kanduknen ma nurde hinayin.

21 “Be, goyenterbe ire itinya igin ma heŋ kura belen al hay heke waŋ gasa yirke kamde hinayin. Irde naniŋ belen wor dirnen weŋ gwahade po yirnayin. Irde dirin belen huwarde naniŋya miliɗat mere ma nurde asogo yirde gasa yirke kamnayin.

22 Al tumɗan ne niŋ igin ma nurde haŋ mar belen asogo dirde hinayin. Goyenbe gwaha dirde hike goke kafura ma heŋ saŋin po heŋ hinayin. Kun kun funandebe Al Kurun belen dawaryen.

23 Niŋgeb ne niŋ teŋ bulun bulun dirkeb busa-harde hoyande kun hinayin. Fudinde wor po dinen hime. Deŋbe Israel naɗa bana niŋ taun kurun gayen meten teŋ kun pasi ma irkeya ne Al Urmin gayen mulgan hewen.

24-25 “Be, dirinbe saba almin gote dufay epte ma fole iryen. Dufayminbe kun saba almin gote dufayya tunande heŋbe gor po bada hiyyen. Be, meten al wor doyaŋ alminde meten goyen fole ma iryen. Metenminbe kun doyaŋ almin belen meten teŋ hi gwahade po teŋbe gor po bada

hiyyen. Gwahade goyen po, denbe nere yufukner han. Ningeb al belen ne bulun nirde ungunayen kurunmin Belsebul ninen han kenem denbe daha dirnayin? Bulun wor po dirnayin. Al mali dentin ga mon yen nurde dunenbe mere bulun mat wor po dirde hinayin.

²⁶ “Goyenpoga gwaha dirnayin mar goke ma kafura henayin. Dufayya mataya kura epte ma po banare hinayin. Banare hitin kurun gobe kame kawan po forok yeke al tumnan nurnayin.

²⁷ Ningeb kamebe den momon dirde himyen gayen kawan po tagalde hinayin. Balminde mere dirde himyen goyen wor kawan tagalde hinayin.

²⁸ Al mudunke kamnayin mar goke kafura ma hen hinayin. Yenbe ultin go po bulun irnayin. Munan go kamere tontinbe epte ma daha wet kura irnayin. Gwahade yarabe ultinya tontinya kak alare yemeytek albe ungunen go po gab kafura irde hinayin.

²⁹ “Finfunbe nu muknen wor po gwahade kura yen yentek mon gega, Al Kurunbe bin sir ma yirde hiyen. Ningeb nu goyen kura daha wet kura tiyyen gob Al Kurunbe nurde hike ga tiyyen.

³⁰ Tonantin yuwalnen epte ma kapyan hetek goyen wor Al Kurunbe gwahade han yen kenkela nurde hi.

³¹ Ningeb denbe Al Kurun dilindeb finfun buda damum gote folek wor po yen denen hi geb, hen hentin ge kafura ma hen hinayin,” yinyin.

Yesu nin tagalde hinayin

(Luk 12:8-9,51-53; 14:26-27; Mak 9:41)

³² Be, Yesu go sopte gaha yinyiŋ: “Al kura al hoyan diliŋ mar dufaymiŋ ne niŋ saŋiŋ irde hiyen goyen tagalyenbe ne wor Nanne saŋiŋ miŋyaŋ gote diliŋ mar, ‘Al gabe nere,’ inen.

³³ Munan al kura ne niŋ yen al hoyan diliŋ mar, ‘Nebe ma nurde unhem,’ yinyen al gobe ne wor kame Nanne saŋiŋ miŋyaŋ gote diliŋ mar, ‘Al gobe ma nurde unhem,’ inen.

³⁴ Be, ga nurnan ko. Nebe fulenja mata isikamde kamde niŋ ma megen gar katmiriŋ. Ne wamiriŋ gake tenbe fulenja hinayiŋ.

³⁵ Nebe megen han mar belen mata gaha ten hinayiŋ yen wamiriŋ. Mata gobe gahade:

‘Urmiŋ belen naniŋ asogo iryen.

Wirin belen miliŋ asogo iryen.

Bere belen huwarde unde miliŋ asogo iryen.

³⁶ Gwahade goyen po al asogo wor po yirtek marbe yiŋgen miŋ bana gore po asogo yirnayiŋ.’ *Maika 7:6*

³⁷ “Irde al kura miliŋya naniŋya niŋ ugun po nurde ne ma gama niryen al gobe epte ma komatne hiyyen. Irde al kura urmiŋya wiriŋya niŋ ugun po nurde ne ma gama niryen al goyen wor epte ma komatne hiyyen.

³⁸ Irde ne niŋ ten kanduk yenen kamde kamde niŋ bada henayiŋ marbe epte ma komatne henayiŋ.

³⁹ Irde al kura megen hen henmiŋ ge ugun po dufay hen hiyenbe Al Kurunja epte ma hiriryen. Goyenpoga ne niŋ ten al kura hen henmiŋ ge ma nurde gama nirde hiyen al gobe Al Kurunja hen hen gobe yende hiyyen.

⁴⁰ “Be, den meten ten kun hikeya igin dirde gargar dirde hinayin gobe ne gayen nirde han yen nuren. Gwaha niryen gobe ne po mon. Nanne nad nerke wamirin al goyen manan igin igin iryen.

⁴¹ Irde al kura, ‘Al gabe Al Kurunyen mere basan al,’ yen kenen igin irde gargar iryen al gobe mere basan alyen murungem tiyyen. Irde al kura, ‘Al gabe al huwak,’ yen kenen igin irde gargar iryen al gobe Al Kurun belen al huwakyen murungem unyen.

⁴² Irde al denem mon gar han gayen kura komatne yen kenen bebak ten fe kura unke melak bida iryenbe gote murungembe son ma hiyyen,” yinyin.

11

*Yesu belen Yon Baptais nin yirin
(Luk 7:18-35)*

¹ Be, komatmin 12 goyen saba yirde yirdeb yubul tike kwamin. Irkeb Yesube gor mat Galili nana bana gon nin taun hoyanwan wor Al Kurunyen saba yirde meremin tagale yen kurin.

² Gwaha ten kun hikeb Yon Baptais koyare hininde gor po henbe Yesu Kristuyen mere mon goyen nuryin. Irdeb komatmin kura hulyan yirin.

³ Irkeb kunbe, “Ge gayenbe Yon belen al kura kame wayyen yeke nurde hityen al goyenbe ge gago ma al hoyan nin doyan hen hitek?” inen gusunan iramin.

⁴ Irkeb, “Mulgañ heñ kuñbe dindiken mere nurde hanya mata ten hime nenen hanya kurun goyen Yon momon irnayin.

⁵ Al dilin titminbe nankenen hañ. Kahan titminbe tareñ heñ harde kuñ hañ. Al busuka minyanbe ulin igin heñ hañ. Irde kirmin titminbe mere nurde hañ. Al kamtin manan sopte huwarde kuñ hañ. Irde Al Kurun belen megen nin alya bereya faran yurd yurd mere igin gobe al buninen wor nurde hañ gayen kuñ momon irnayin.

⁶ Irdeb, ‘Al kura ne nin ten Al Kurun nin dufaymin tareñ irtin goyen go ma katyenbe Al Kurun belen guram irde sanin iryen,’ yihi innayin,” yinyin.

⁷ Gwaha yinkeb Yonyen komatmin go mulgañ heñ kwamin. Kukeb Yesu belen Yon nin momon yire yenbe gaha yinyin: “Denbe sawsawa po kurun nana bana gonbe da kinnin yen kwan? Dulin yamun kura meñe belen tama yurtin goyen yinnin yen kwan?

⁸ Goyen mon kenem da wor po kinnin yen kwan? Al kura umna igin titin kura kinnin yen kwan? Mon. Al horam yan umna igin ten det igin igin nin po nurde hañ marbe megen nin doyan mar karkuwayen yayan po hañ.

⁹ Goyenbe da kuñ kinnin yen kwan? Al Kurunyen mere basan al? Gwaha, fudinde. Gega yenbe Al Kurunyen mere basan mar hoyan goyen yara mon. Yenbe gote folek.

¹⁰ Al goyen goke tenbe Al Kurunyen asande gahade katin hi:

‘Mere basan alne ten kermeke yen wa mehen hen kuyen.

Mehen hen kunbe belenge sope irde gunyen,’
yitin hi. *Malakai 3:1*

¹¹ Be, yitin gwahade po meten tiyun al gobe al hoyan mon. Yon Baptais belen tiyun. Ningeb fudinde wor po, bere belen kawan yirtin han kurun gayen Yonyen meten goyen fole irtek epte mon hinhan. Yen belen meten tiyun gobe meten hoyan kurun gote folek wor po tiyun. Goyenbe yenbe ne gayen nenkela ma hen hi. Ningeb al kura denem mon gega nenkela hen bebak tenbe Al Kurun belen yende alya bereya doyan yirde hi bana gon hiyen al gobe Al Kurun dilindeb Yon folek yen kinyen.

¹²⁻¹³ “Be, Moseyen sabaya Al Kurunyen mere basan marte sabaya asande katin gobe Al Kurun belen yende alya bereya doyan yird yird goyen tagalke wan wan Yon Baptais wor tagalun. Ningeb Yon hitte mat wan wan gayen nalu hitere gabe Al Kurun belen alya bereyamin doyan yird yird mata kawan forok yen hike yenenbe al budam bana gon kunin yen nurde kurut wor po yen han. Goyenbe tarenminde ten hikeb Al Kurun belen alya bereyamin doyan yird yird goyen bulun irde han.

¹⁴ Yonbe bikken Elaia belen meten ten hinhin gwahade meten tiyun. Ningeb al kura kame Elaia wayyen yen Moseyen sabaya Al Kurunyen mere basan mar belen tagaltin goyen fudinde yen nurde han kenenbe Yon Baptais gobe al gogo yen nurnayin.

15 Al kirmin minyanbe mere gayen kenkela nurnan ko.

16 “Be, gayenter nin marbe al matam dahade han yewen? Be, go mar gobe dirin kura gabu gasunde hen kari ten henya yingen ulin kadam mohonde ten hanyen go gwahade. Dirin gobe kari ten henya kadam ginen tenbe,

17 ‘Nen belen bulelun fuk irde tikin hen dunhet gega, gege ma tahan. Irde esinayin daw yen al hakwa ambo irde irdere nin tikin hen dunhet gega ma esahan,’ yinen kwep kwep yirde hanyen go gwahade.

18 Ningeb dirin ten hanyen gwahade goyen po, mel gobe mere fudinde nurtek ma yirde hi. Ningeb Yon Baptais belen beretya wainya ma neke kenenbe, ‘Al gobe unguram yan,’ inen hihan.

19 Munan ne Al Urmin gabe bingeya wainya ne-meke nenenbe, ‘Al gabe dulare nin al wor po. Irde yenbe teks yad yad marya Moseyen saba kenkela ma gama irde hike “mata bulun mar” yinen hi-tyen mar gote kadam,’ ninen hanyen. Goyenpoga al kura dufay wukken minyanbe matamin belen gab kawan forok irde hiyen geb,” yinyin.

Bin mulgan ma hen han mar

(Luk 10:13-15)

20 Be, Yesu go gwaha yinenbe Al Kurunyen tarende mata tinen kurayen kurayen budam ten hike ga bebak ma tenbe mata bulunmin yubul ma ten Al Kurun hitte bin mulgan ma hamin mar goyen goke igin ma nurde gaha yirin:

21 “Be, den Yuda mar Korasin taundeya Bet-saida taundeya han marbe ne belen mata tinen kurayen kurayen ten himeke nenen bebak titek yara gega, gwaha ma ten asogo nirde han. Ningeb den Yuda marte mata gwahade goke Al Kurun belen bin ar yeke gote murungem bulun wor po dunyen geb, goke buninen nurd dunen hime. Ne belen Yuda mar mon al min hoyan hanjen taunde Tairya Saidonya gor kun mata tinen forok yirmirin manhan mel gob aran po bebak ten mata bulunmin ge kanduknen wor po nurde amil erekke hor yirde tupi sam ten mata bulunmin go yubul ten Al Kurun nin bin mulgan hewon.

22 Fudinde wor po dinen hime. Tairya Saidonya taunde nin marte mata bulun gote murungembe kurun yarham. Goyenbe den Yuda mar merene gama ma irde hanjen gote murungembe yende folek, bulun wor po tenayin geb.

23 Irde den Kapeneam taunde nin mar, denbe dindiken ge yen, ‘Nenbe den ninin yan,’ yen turun turun ten Al Kurun nin bitin ma mulgan hen han? Al Kurun belen kak ala bana demeyke kurkunayin geb. Mata tinen kurayen kurayen den hitte forok yen hike yenen han gayen Sodom taunde forok yen hinhan manhan gor nin mar belen mata goyen yenenbe mata bulunmin yubul ten Al Kurun nin bin mulgan hewon. Irkeb bulun ma irkeb gaha nana gayenbe taun gobe hiwon.

24 Fudinde dinen hime, kame Al Kurun belen al iginya bulunya pota yiryen nalureb Sodom nin marbe mata bulun ten hinhan gote murungem bulun tenayin. Goyenbe den Kapeneam taunde nin marbe Sodom nin mar belen kanduk tenayin

gote folek wor po tenayin geb,” yinyin.

*Kanduk minyan marbe Yesu hitte wanayin
(Luk 10:21-22)*

²⁵ Be, goya goyenbe Al Kurun mere irde, “Adone, gebe nanjinnya megenya gote Doyan Al Kurun. Gebe al yingen dufaymin wukkek yen nurde han marya megen nin alyen saba karkuwan yawartin marya hittebe meten ten hime kurun gate min goyen bana kerde hayen. Goyenbe dirin belen nanin milin hitte tawun hitin yara al kura yingen de saninde epte mon yen nurde Al Kurun belen gab faran duri yen han mar hitte yikala yiran goke amanen wor po nurde turun girde hime.

²⁶ Fudinde, buniyen gebe kurun geb, mata gwahade forok iran,” yirin.

²⁷ Irdeb, “Adone belenbe det kurun gayen doyan yird yird meten gobe ne nunyin. Nebe yende Urmin wor po geb, yen po gab kenkela nurde nunen hi. Al hoyanbe gwahade ma nurd nunen han. Irde Nannebe neya al kura ne belen basina yirde hime marya po ga nurd unen hite. Al hoyanbe gwahade mon.

²⁸ Ningeb den kanduk kurayen kurayen yenen goke bitin misin nurde han marbe ne hitte wanan. Irkeb faran durmeke bitin yurum heke hinayin.

²⁹ Nebe delne kamtin, irde dufayne manan kipirtin. Ningeb wan sabane nurde gama niranayin. Irkeb faran durmeke bitin yurum hekeb hinayin.

³⁰ Sabane nurde gama irnayin dinen hime gobe metenē mon. Ne belē kanduk dunē hime gobe hipirken geb, ne hitte wanañ,” yinyin.

12

Yesube Sabat nalu gote min al
(Mak 2:23-28; Luk 6:1-5)

¹ Be, Yesu go Sabat nalu goyenter komatmin yagoya wit meten kahalyañ kuñ hinhan. Kuñ henyañbe komatmin yago goyen binje yirkeb wit bilmin kura yade iginen nene hinhan.

² Irkeb Farisi mar belē yenenbe, “Mel ga yena! Mel gabe Sabat nalure mata gwaha ma teñ hinayin yen bisam irtin goyen teñ hañ!” inamin.

³ Irkeb Yesu belē wol henbe, “Denbe Al Kurunyen asande Dewitya kadom yagoya binje kamde mata tiyamin gote baranmin goyen ma wor po kapyan hen nurde hanyen?

⁴ Dewitbe Al Kurunyen ya balem bana hurkunbe beret Al Kurun untin himam, Al Kurun doloñ ird ird mata doyañ marte kudinē goyen kadomya yad namin. Dewitbe Mose belē gwaha ma teñ hinayin yitin goyen wor gogo tiyyin gega, goke kanduk kura ma kinyin.

⁵ Irde Al Kurun doloñ ird ird mata doyañ marbe Sabat nalure Al Kurunyen ya balem bana hen meten teñ henbe Moseyen saba bulun irde hinhan. Goyenbe gote kanduk kura ma kenen hinhan goyen Al Kurunyen asande katinbe ma kapyan hen hanyen?

⁶ Fudinde dinhem. Mel gobe Sabat nalure Al Kurunyen ya balem bana meten teñ hikeb mata

buluŋ tahaŋ ma yinenŋ hanŋyen. Munanŋ nebe ya gote folek geb, komatne yago neya tumŋanŋ heŋ Sabat nalure mata tahaŋ gabe mata buluŋ moŋ geb.

⁷⁻⁸ Ne Al Urmiŋ gabe Sabat nalu gote Doyan Al Kurunŋ. Niŋgeb Al Kurunŋyen mere asanŋde, ‘Nebe al belenŋ galak nird nird niŋ ma nurde hime. Kadom buninenŋ gird gird goke gab amanenŋ nurde hime,’ yitiŋ goyen den belenŋ mere gote miŋ nurde hanŋ manhan ulinŋde merem moŋ mar gayen buluŋ buluŋ ma yirde hiwoŋ,” yinyiŋ.

*Sabat nalure al haninŋ simsimam kura sope iryiŋ
(Mak 3:1-6; Luk 6:6-11)*

⁹ Be, gwaha yinenŋbe gor mat kunŋ Yuda marte gabu yare kuriŋ.

¹⁰ Bana goŋbe al kura haninŋ simsima hitiŋ goyen gor hinhin. Irke Farisi mar gore da misiŋde kura ulinŋde merem yaŋ irniŋ yenŋbe Yesu gusunŋan iramiŋ. “Sabat nalurebe al kura garbam miŋyanŋ goyen sope irtek gobe Moseyen sabarebe igiŋ yitiŋ ma dahade?” inamiŋ.

¹¹ Gwaha inkeb, “Denŋ gayen sipsiptiŋ kura Sabat nalure mete titmiŋ bana kurkuyenŋbe igiŋ kenenŋ wasak tinayiŋ? Moŋ, kunŋbe tenŋ isanŋ heŋ siŋare kernayiŋ geb.

¹² Al Kurunŋ diliŋdeb sipsipbe det diriŋenŋ, mu-naŋ albe det kurunŋ wor po. Niŋgeb Sabat nalurebe mata igiŋ igiŋ po ga tenŋ hitek,” yinyiŋ.

¹³ Irde al go, “Hange giŋ ira,” inyiŋ. Irke haninŋ giŋ irkeb haninŋ kurhan igiŋ hiyen go gwahade igiŋ wor po hiriŋ.

¹⁴ Goyenbe Farisi mar gobe siṅare kuṅ yinṅen uliṅ daha mat Yesu mayteke kami yenj mere sege iramiṅ.

Yesube Al Kurun belen basiṅa irtiṅ

¹⁵ Be, Farisi mar belen mata tiniṅ tenj hinhan goyen bebak tenbe gasuṅ go tubul tenj hoyande kuriṅ. Kukeb al budam po gama irde kwamiṅ. Irkeb garbam miṅyanbe tumṅaṅ sope yirke igiṅ hamiṅ.

¹⁶ Gwaha yirde al buda go guram dirhem gake al hoyan ma momoṅ yirnayiṅ yenj hayhay yiryiṅ.

¹⁷ Mata kurun tiyyiṅ gobe Al Kurun belen mere basan almiṅ Aisaia mere irke asande kayyiṅ gote igineṅ kawan forok yiriṅ. Merebe gahade:

¹⁸ “Al gabe nere meten al, basiṅa irmiriṅ goyen.

Yenbe bubulkunne wor po yenj nurde unen hime.

Irde yenj ge amanen wor po nurde hime.

Holi Spirit tenj kermeke ketal uryen.

Irkeb ne belen al iginya bulunya pota yirde gote murungem yunen yunen goyen megen al hike kwa kurun gayen momoṅ yirde tukuyen.

¹⁹ Yenbe al kuraya kadom mohonde tenj kwep kwep ma tiyyen.

Irde belenyan mere kuware ma tenj hike nurnayiṅ.

²⁰ Al kura bisike kokaṅ go gwahade, bulun hiniṅ tenj hinayiṅ goyen bulun ma yiryen.

Irde al kura bulun hen hushi aymuk irtiṅ yara hinayiṅ goyen wor bulun ma yiryen.

Matamiṅ gobe bada ma hiyyen.

Gwahade po ten tenbe alya bereyamin tumnan yumulgan ten pasi iryen.

²¹ Irke al min hoyan Yuda mar mon gore yen ge hekken nurde faran yurd yurd nin doyan irde hinayin,” yitin hi. *Aisaia 42:1-4*

Yesuya Belsebulya

(Mak 3:20-30; Luk 11:14-23; 12:10)

²² Be, gwaha yen hikeyabe al kura ungura ketal urtin goyen ten wayamin. Al gobe dilin titmin irde mohon manan kattin. Be, al gobe Yesu belen sope irkeb nankenen mere ten tiyyin.

²³ Irkeb gabu iramin mar belen mata go kenen hurkunat wor po tenbe, “Mesaia Dewit Urmin kame wayyen yen hanjen gobe al gago wet?” yamin.

²⁴ Goyenbe Farisi mar belen mere go nurdeb, “Mon, ungurayen kurunmin Belsebulyen tarende ungura gogo yakira ten hi,” yamin.

²⁵ Irkeb Yesu gobe al dufay hen hinhan goyen yenen bebak tenbe gaha yinyin: “Tiyun kurun kura bana al belen yingen ulin kadam asogo gird ten bur yenayin gobe sanin ma hen bulun henayin. Irde al min dirnen kura wor gwahade po, yingen ulin kadam asogo gird ten bur yenayinbe tumnan sanin ma hen hinayin. Taunde nin al wor gwahade po, awalikde ma hinayinbe epte ma sanin hen hinayin.

²⁶ Ningeb gwahade goyen po Satan belen yen yufukde han ungura buda goyen haram yirde yakira tiyyenbe dahadem sanin henayin? Hubu geb.

27 Goyenbe den belen Belsebulyen tarende ungura yakira ten hi ninen han. Munan den gama dirde han mar wor ungura yakira ten hanjen goyenbe ganunyen saninde mata go ten han yen nurde han? Belsebulyen tarende ma Al Kurunyen tarende? Mel gobe ungura yakira ten ten saninbe Al Kurun hitte mat wan hi yen nurde han geb, den belen ne ninen han gobe usi wor po irde han yen nurd dunnayin.

28 Ningeb nebe Al Kurunyen saninde ungura yakira ten himyen geb, Al Kurun belen doyan dird dird gobe bikken den hitte gago forok yihi.

29 “Be, daha matbe al kura gore kun al hoyan tare minyan gote yare hurkun samunminya det-minya yade kuyen? Gwaha tiye yenbe al gore kun sanin minyan al go wa ten fere ten gab epte yaminde nin detya samunminya goyen yawaryen.

30 “Be, al kura ne nin ma hen han marbe asogone. Irde al kura Al Kurun hitte al yukun yukun nin faran ma nurde han marbe al bur yirde meten go bulun irde han yen nuren.

31 Ningeb al kura mata bulunya sukal mereyamin ge ten Al Kurun pohogay irkeb ingin halde unyen. Goyenpoga al kura Holi Spirit sukal iryen gobe Al Kurun belen epte ma wor po halde pasi ird unyen.

32 Al kura ne Al Urmin gayen asogo nirde mere bulun tiyyenbe pohogay nirke ingin halde pasi irde unen. Goyenbe al kura Holi Spirit belen meten ten hi yen nurd nurd ga asogo irde mere bulun tiyyen gobe epte ma wor po mata bulunmin goyen halde unyen. Megen gar henya, ma kame Al

Kurunyen nalure gor wor epte ma halde unyen.

³³ “Hebe iginenj belen gab dikala dirke he igin ma he bulun yen hanjen. Ningeb iginenj igin forok yewon yen nurdeb he go sope irde haran henayin. He goyen sope irde haran ma henayinbe iginenj bulun bulunenj forok yenayin.

³⁴ Denbe kunere duwi yara bulun wor po geb. Meretinya matatinyabe bulun ala po. Ningeb den gwahade belen mere kura igin ma po tinayin. Hubu wor po. Bitin bana dufay bulun belen makin hitin gore mohontinde mat kat kun hiyen.

³⁵ Ningeb al iginbe binde dufay igin hinayin goyen yade kawan yirde hiyen. Munan al bulunbe binde dufay bulun hinayin goyen kawan yirde hiyen.

³⁶ Goke tenbe fudinde wor po dinenj hime, Al Kurun belen al iginya bulunya pota yiryen nalure gorbe melaktin son heke ne ninj mere bulun mat yitin kurun goke merere huwarde danin gwaha yamin goyen Al Kurun momonj irnayin.

³⁷ Ningeb mohontinde mat mere kat kuyen gore gab nalu goyenter mere ten hanjen gote murungem igin dunyen ma bulun dunyen goyen nurnayin,” yinyin.

Al Kurunyen saninde det kura irke kinnin in-aminj

(Mak 8:11-12; Luk 11:29-32)

³⁸ Be, Farisi mar kuraya Moseyen saba marya belen, “Tisa, Al Kurunyen saninde mata tinen kura irke kinnin yen nurde hite,” inaminj.

³⁹ Irkeb Yesu belen wol henbe, “Dufay bulun kerde mata manan bulun ten han mar goreb

mata tiñeñ Al Kurun belen po ga irtek goke po gusunañ heñ hanñen. Goyenbe bikken Al Kurunyen mere basañ al Yona belen mata teñ mere tiyyin goyen po ga nurnayin. Mata tiñeñ hoyañ kura ma kennayin.

⁴⁰ Yonabe makan dapña kurun binde wawun karwo goñ hinhin gwahade po, ne Al Urmin gayen wor megen binde nanñkahalya wawunya karwo heñ.

⁴¹ Irde Niniwe taunde nin mar gobe Yona belen kun Al Kurunyen mere basañ heñ tagalkeb mata bulunmin yubul teñ Al Kurun nin bin mulgan hamin. Goyenbe alya bereya gayenter gayenbe ne saba teñ hime gabe Yonayen saba gote folek gega, go ma nurde hañ. Ningeb Al Kurun belen al iginya bulunya pota yiryen nalurebe Niniwe nin mar belen huwardeb merene ma nurde hañ mar gayen minje yirnayin.

⁴² Bikken Solomon belen Israel naña doyañ irde hinhinyabe naña gisaw nin doyañ bere kurun kura Siba belen Solomonyen dufaymin wukken goyen nure yeñ wayyin. Goyenbe alya bereya gayenter nin gayenbe ne Solomonyen dufay folek gare saba yirde hime gega ma nurde hañ. Ningeb kame Al Kurun belen al iginya bulunya pota yiryen nalureb doyañ bere Siba belen huwardeb merene ma nurde hañ mar gayen merem yañ yiryen.

⁴³ “Be, ungura kura al ulinde takira tike kat kuyen gobe mali naña al ma hitek bana goñ kun usan heñ heñ gasun nin nanñkenen kun hiyen. Goyenbe gasun kura ma kinyen.

⁴⁴ Irdeb, ‘Bikken hinhem gasunde gor mulgan

hewen, ' yiyyen. Irdeb mulgan hen wanbe gasun bikkek gobe Al Kurunyen mere binde ma kiryin geb, halde haran hen sope irtin yara kinyen.

⁴⁵ Irdeb kunbe sopte ungura 7 yende sanin folek goyen yupi ten tumnan wanbe al goyen ketal urnayin. Gwaha tikeb al gobe hanƙapya hinhin gwahade mon, bulun wor po hiyyen," yinyin.

Yesuyen kulinya hayminya
(Mak 3:31-35; Luk 8:19-21)

⁴⁶ Be, Yesu go hako po al buda kurun goyen mere yirde hikeb milinya kulinya belen mere irnin yen wan sinare hen doyan irde hinhan.

⁴⁷ Irkeb al kura belen go yenenbe kun Yesu goyen, "Momkeya kolge wenya ginnin yen wan sinare ga han," inyin.

⁴⁸ Irkeb wol henbe, "Ganunbe mamne? Ganunbe kolne yago?" inyin.

⁴⁹⁻⁵⁰ Irdeb komatmin yago yenen henya, "Al kura Nanne Al Kurun sanin minyan gote mere nurde go po gama irde han marbe kolne, hayneya mamne yagoya. Ningeb mamneya kolne wenya be gago han," inyin.

13

Yasun ten ten gote maya mere
(Mak 4:1-9; Luk 8:4-8)

¹ Be, go nana fay goyenter po Yesube hiyen ya go tubul ten kun fe ala kurun sinare kura gor kipiriyin.

² Irkeb sopte al buda karim ma wan gabu iramin. Irkeb bada hen hakwa kura hinhin

hende gor hurkun kipiriyin. Keperde hikeb al buda kurun gob fe sinare huwarde hinhan.

³ Hakware gor henya be saba budam maya mere mat al buda go saba yiriyin. Maya meremin kurabe gahade: “Yasun al kura det muyken tur ire yen kurin.

⁴ Meten de kun tur irde tukurin. Irkeb kurabe belenyan katamin. Irke nu belen wan yenen be namin.

⁵ Kurabe hora heren megen halgayinyan katamin. Megen tolok mon geb, aran po kawan hamin.

⁶ Goyen be nana forok yen temeykeb filginin sanin mon geb, gwilgwil irde kamamin.

⁷ Det muyken kurabe yamun hirwanen yan hinhan bana gon katen kawan hamin. Goyen be yamun duwi gore hurkun awrum yurke nonbo hamin.

⁸ Munan det muyken kurabe megen igin wor poyan katen kawan hamin. Irde muyken unku ren de mat be 100 iginen gwahade hamin. Muyken kurabe 60, munan kurabe 30 gwahade ala iginen hen tukamin.

⁹ Al kirmin minyan be mere gayen kenkela nurnan ko,” yirin.

Danin maya merere saba yird hinhin?

(Mak 4:10-12; Luk 8:9-10)

¹⁰ Irkeb komatmin yago goyen kun be, “Danin geb maya mere mat al ya bereya saba yirde ha?” inen gusunan iramin.

¹¹ Irkeb, “Al Kurun belen al ya bereyamin doyan yird yird gote min be banare hi geb, al hoyan

belen epte ma bebak titek. Goyen denbe Al Kurunyen tarende min goyen igin bebak tinayin.

¹² Ningeb kenkela wor po merene palna irde nurde hinayin. Al kura binde mat fudinde wor po Al Kurunyen mere nurde hikeb Al Kurun belen meremin igin goyen unen teban irde hiyen. Munan al kura gwahade mon gobe Al Kurunyen mere binde mun kura hiyen goyen wor ten sina iryen.

¹³ Al gwahade gobe det yennayin gega, epte ma det gote min nurnayin. Irde merebe nurnayin gega, epte ma mere gote min bebak tinayin. Ningeb gwahade po ten hinayin yenbe gago maya mere mat saba yirde himyen.

¹⁴ Al gwaha ten han gokeb Al Kurunyen mere basan al Aisaia belen Al Kurunyen mere nurde asande kayyin gobe gago forok yen hi. Merebe gahade:

‘Denbe merene nurde hinayin, irde kenen hinayin gega, bebak ma po ten hinayin.

¹⁵ Fudinde wor po, mel gate binbe sanin wor po. Kirminbe migisun yurtin, irde dilingbe mala titin.

Mon manhan kirminde nurde, dilingde yenenbe binde matbe bebak wor po ten ne hitte mulgan hen wake sope yirmewon,’ yitin hi.

Aisaia 6:9-10

¹⁶⁻¹⁷ Ningeb fudinde wor po dinen hime. Bikken Al Kurunyen mere basan marya al huwak bikken hinhan gobe daha wor den belen mata kurun yenen han gayen yentewon yen nurde hinhan. Goyenbe go ma yenenya kamamin. Mere den

nurde han gayen wor nurtewon yen nurde hinhan. Goyenbe ma nuramin. Munan denbe nalu iginde forok yan geb, diltin det igin yenen, kirmintinde mere igin igin nurde han gago. Ningeb goke amanen nurde hinayin.

¹⁸ “Gwahade geb yasun alyen maya mere gote min momon diren tihim geb, kenkela nurde bebak tina ko.

¹⁹ Muyken belenyan katamin gote minbe da? Gobe al kura Al Kurun belen yende alya bereya doyan yird yird saba gote min nurde bebak ma tiyyen. Irke ungura belen wan saba go ten sinja irde bin sam irke mere goke ma nuryen go gwahade.

²⁰ Megen halgayinya hora arat heren det muyken katamin gote minbe gahade: al kura Al Kurunyen saba tinenya nurdeb aran po igin igin yen gama iryen.

²¹ Goyenbe mere go kenkela ma binde kurkun kipiryen geb, ulyande ma Al Kurunyen mere goyen gama iryen. Al Kurunyen saba nurde gama irde hiyen gega, al belen bulun bulun irke gote kanduk kenenbe bada hen aran po Al Kurunyen saba go tubul tiyyen.

²² Yamun duwi forok yitin bana det muyken katamin gote minbe gahade: al kura Al Kurunyen saba nurde gama irde hiyen. Irde megen nin mata ten tenya megen nin samun yad yad dufay belen tulun tikeb Al Kurunyen saba goyen iginen minmon hiyyen.

²³ Goyenpoga megen iginyan wor po katamin gote minbe gahade: al kura Al Kurunyen saba

nurde bebak ten gama irde hiyen gob gote iginenbe budam wor po forok yenayin. Muyken kurabe iginen 100 forok yiryen. Kurabe 60, munan kurabe 30 forok yiryen go gwahade. Muyken buda gob iginen kurayen kurayen forok yenayin,” yinyin.

Yamun bulunyen maya mere

²⁴ Be, Yesu go gwaha yinen saba yire yenbe maya mere hoyan gahade yinyin: “Al Kurun belen yende alya bereya doyan yird yird gobe gahade: al kura wit muyken goyen metenminde yuku tur yiryin.

²⁵ Goyenbe wawunbe al tumnan firinde hikeb al gote asogom belen kun yamun duwi muyken goyen wit muyken tur irtinjan goyen tur yirde yuku be kurin.

²⁶ Kame wit go kawan hen kun iginen hini ten hikeb yamun duwi goyen manan forok yen tukamin.

²⁷ Irkeb meten gote min alyen meten mar belen wanbe, ‘Doyan al, gebe wit muyken haran gega, yamun duwi gob daha mat forok yan?’ inamin.

²⁸ Irkeb, ‘Asogone kura belen mata ga tiyun geb,’ yinyin. Irkeb meten marmen belen, ‘Ningeb kun wasinin?’ inen gusunjan iramin.

²⁹ Irkeb, ‘Gonmin. Monjo wasehet yen wit manan tumnan wasinak ge.

³⁰ Yubul tike tumnande karkuwan henayin. Sak nalure gab wasitek. Goyare gab meten marne yamun duwi wa walde kunga ten ten nin yad fere ten yernayin. Munan witbe yade yuku

yadi yerd yerd ya kurunḡe gor yernayin, ' yinyin, ”
gwahade Yesu belen mel go momon yiryin.

Mastet bilminya yisyat maya mere

(Mak 4:30-32; Luk 13:18-21)

³¹ Be, Yesu go maya mere hoyan wor yinyin.
“Al Kurun belen alya bereyamin doyan yird yird
gobe mastet he bilmin dirnen mun wor po go
gwahade. Al kura belen mastet bilmin goyen
tenbe metenminde haryin.

³² Det hoyan muykenbe karkuwan, munan
mastet he muykenbe dirnen mun wor po gega,
kawan hen kurun henbe metenḡe gor det haryin
goyen fole yiryen. Irkeb nu belen wan hanin
heren hagam yirde gor hinayin, ” yinyin.

³³ Irdeb sopte po siraw mere hoyan yinyin. “Al
Kurun belen yende alya bereya doyan yird yird
gobe Bere kura yis ten palawa kurunya tigiri ten
tubul tikeb palawa go ditdi nene kurun hiyyen go
gwahade goyen, ” yinyin.

Maya mere mat po saba yirde hinhin

(Mak 4:33-34)

³⁴ Yesu belen al buda mere gwahade yirde
hinhin gobe maya mere mat po yirde hinhin.
Mere kenkelak mat ma yirde hinhin. Maya mere
mat po yirde hinhin.

³⁵ Ninḡeb Yesu belen maya mere mat saba
tagalde hinhin gobe Al Kurun belen mere basan
almin mere irke asanḡe kayyin gote iginenbe
gogo forok yirin. Merebe gahade:

“Sabanebe maya mere mat po tiyen.

Irde det banare hitin al kura bebak titek mon
goyen tagalen, ” yitin hi.

Tikin 78:2

Yamuṇ bulunyen siraw mere gote miṇ

³⁶ Be, Yesu gobe al buda kurun go yubul ten ya hiyende gor mulgan hiriṇ. Irkeb komatmin yago kunbe, “Yamuṇ duwi nin maya mere mat tagalha gote miṇ goyen momon dira,” inamiṇ.

³⁷ Irkeb gaha yinyiṇ: “Wit muyken igiṇ kun haryiṇ al gobe ne Al Urminiṇ gayen.

³⁸ Meten gobe megen kurun gayen gake yihim. Munan wit muyken gobe Al Kurunyen dirnen wen. Yamuṇ duwi gobe Al Bulunyen dirnen wen.

³⁹ Irde yamuṇ duwi muyken tur iryiṇ al gobe unḡura. Sak nalu gobe nalu funan, irde binḡe gabu ird ird mar gobe Al Kurunyen miyon.

⁴⁰ Yamuṇ bulun wasen kak alare yemeyke humga kunayiṇ go gwahade goyen po, nalu funandebe al hitte mata gwahade forok yiyyen.

⁴¹ Ne Al Urminiṇ gare miyonne yad yermeke kun nere alya bereya han bana gon mata bulun ten hanyen marya mata bulun tinaṇ yinen al bin yade hanyen marya go yukuṇ gabu yirnayiṇ.

⁴² Irde mel go yade kak ala bulun wor po bana gon yemeynayiṇ. Irkeb gon po hen esen misiṇ yisen hinayiṇ.

⁴³ Goyabe Al Kurun diliṇde alya bereya huwak hanyen gobe Al Kurun belen doyan yirde hiyende gor nana temeyke wuk yitiṇ yara wukkek igiṇ wor po hinayiṇ. Al kirminiṇ minyanbe mere gayen kenkela nurnan ko,” yinyiṇ.

Samunyen maya mere

⁴⁴ Be, maya mere hoyan wor yinyiṇ. “Al Kurun belen yende alya bereya doyan yirde hi gobe gahade: samun kura damum hende hoyan wor

po megen binde bana kirtin hinhin. Kurareb al kura samun gwahade gan hi yen ma nurdeya megen goyen talde taldeb kinyin. Kenebe sopte aw uryin. Irdeb aman wor po hen kun detmin kurun goyen al yunke damu tikeb gote murungem tukunbe megen goyen damu tiyyin go gwahade.

⁴⁵ Al Kurun belen alya bereyamin doyan yirde hi gote maya mere kurabe gahade: al kura belen selwen yara kura damum hende wor po goyen goke nankenen kun hinhin.

⁴⁶ Kun kun igin mun wor po kura kenebe mulgan hen yende samun kurun goyen al yunke damu tikeb murungem ten tukun det kusamun wor po go damu tiyyin go gwahade,” yinyin.

Kaman kurunyen maya mere

⁴⁷ Be, Yesu belen sopte po gaha yinyin: “Al Kurun belen yende alya bereya doyan yirde hi gobe gahade: makan dapna yawarnin yen kaman kurun temeyamin. Irdeb dapna min kurayen kurayen yawaramin.

⁴⁸ Dapna makin hihi yen nurdeb tulun ten tukun sinare irde dapna iginbe tiriyan yeramin. Munan bulunbe yemeyamin go gwahade.

⁴⁹ Nalu funande wor pore gorbe al hitte mata gwahade go forok yiyyen. Al Kurunyen miyon belen wan al huwakya al mata bulun ten hitin marya goyen pota yirnayin.

⁵⁰ Irde mata bulun mar gobe yade kak ala kurun bana gon yemeyke esen misin yisen hinayin,” yinyin.

⁵¹ Irdeb, “Maya mere kurun dirhem gote min kenkela nurhan we?” yinke, “Gwaha,” inamin.

⁵² Irkeb, “Bebak tihit yahan geb, denbe Mo-seyen saba al kura saba bikkek po mon sa-bane gergen manan nurde tumnan yanarde han al go gwahade denen hime. Ningeb denbe al kura yamin bana mat samun bikkekya gergenya yade sinare katyen go gwahade goyen po saba bikkekya gergenya tumnan nurde han,” yinyin.

*Nasaret taunde kurin
(Mak 6:1-6; Luk 4:16-30)*

⁵³ Be, maya mere buda goyen momon yirdeb gasun go tubul ten kurin.

⁵⁴ Kunbe taun gor hen kurun hiriinde gor forok yenbe gor nin Yuda marte gabu yare kun al saba yirke hurkunat tenbe, “Ey, al gabe damde kun Al Kurunyen dufay wukkenya mata tinen kurayen kurayen ird ird tarennya gayen yawarun!” yamin.

⁵⁵ Irdeb, “Al gabe kapenta urmin mon? Yenbe Maria urmin. Kulin yagobe Yems, Yosep, Saimonyabe Yudasya mon?”

⁵⁶ Haymin yagob gar ma tumnan hityen? Gega al gabe damde kun dufayya tarennya yawarun?” yamin.

⁵⁷ Irdeb bulun nurd unamin. Goyenbe Yesu belen, “Al Kurunyen mere basan marbe taun-minde nin marya taynenya belen palap ma yirde meremin ma nurde hanjen,” yinyin.

⁵⁸ Irdeb yen ge hekken ma nurde hinhan geb, gorbe mata tinen budam ma forok yiryin.

14

*Herot belen Yon Baptais mayke kamyin
(Mak 6:14-29; Luk 9:7-9)*

¹ Be, Yesu belen mata kurun ten kun hinhin goyen Galili nanja gote doyan al kurun Herot belen mere momonmin nuryin.

² Irdeb meten marmin go, “Yon Baptais maymeke kamun al go goyen sopte huwarun geb, mata tinen ird ird sanin minyan meten ten kun hi gogo,” yinyin.

³⁻⁴ Be, Yon mayke kamyin gote baranminbe gahade: Yon dilin gergen hinhinyabe Herot belen kulin Filip berem Herodias goran iryin. Irkeb Yon belen kawan po, “Mata gob bulun wor po tiyan geb,” inkeb Herot belen goke igin ma nuryin. Irdeb fulen marmin yinke Yon fere ten tukun koyare keramin.

⁵ Irde maymeke kamwon yen nurde hinhin gega, al belen Yon gob Al Kurunyen mere basan al yen nurd unen hinhan geb, Yon mayde mayde nin kafura hen hinhin.

⁶ Be, Herot gobe milin belen kawan kiryin nalu go forok yekeb Herotya kadom wenya gabu irde dulan ten hinhan. Irde tikin hekeb Herodias wirin belen gor gabu iramin mar goke gege tiyyin. Irkeb Herot gobe aman wor po hirin.

⁷ Irdeb, “Det kuran nurde gusun nirkab igin gunen,” inen dilin mar bin tiyyin.

⁸ Irkeb milin belen gwaha inayin inyin gwa-hade po Herot inyin. “Han ka ga po Yon Baptais tonan koronde kerde tawan nuna,” inyin.

⁹ Irkeb doyan al go kanduknen nuryin gega, bere go hitte bin tiyyin goya al buda gor hinhan mar gore daha wet kura ninnak yen nurdeb bin tiyyin go po gama irde bere gore yirin goyen po

irde unyiŋ.

¹⁰ Irde fulenja marminj hulyan yirke koyare kunbe Yon binj walaminj.

¹¹ Irdeb Yon tonan gobe koronde kerde tawan bere go unkeb yen belen tukunbe milin unyiŋ.

¹² Be, Yon komatminj belen mere go nurdeb wan hakwam goyen tukun mete tiyaminj. Gwaha ten kunbe Yon kamyin goyen Yesu momon iraminj.

*Yesu belen al 5,000 binje paka yiryin
(Mak 6:30-44; Luk 9:10-17; Yon 6:1-14)*

¹³ Be, Yon kamyin mere momon goyen nurdeb Yesube komatminja hakwa ten nana almem monde dunken balmin hiniŋ yen kwaminj. Irkeb nana bana go nin taunyan nin marbe Yesube gon kwa yen nurdeb makan feren gama irde kwaminj.

¹⁴ Be, Yesu go kun kun fe sina kurhan forok yenbe al buda kurun goyen yenenbe buninen yinyin. Irde garbam minyan marbe guram yirke igin hamin.

¹⁵ Be, wawun hewen ten hikeb komatmin yago belen Yesu goyen, “Nana bana gab tiyun binde minmon. Irde hen ga mon kidoma hewen tiya geb, al buda kurun ga yinke tiyunyan kun yingen binje kura damu ten nenan,” inamin.

¹⁶ Irkeb Yesu belen, “Mon, daniŋ kunayin? Den belen det kura yunke nenan,” yinyin.

¹⁷ Irkeb, “Gwaha dinha goyenbe nenbe beret siptesonnya makan dapna yadi iraw po han,” inamin.

¹⁸ Irkeb, “Yawan nunnan,” yinyin.

¹⁹ Irdeb al buda kurun go, “Yamunyan kepernan,” yinke keperde tukamin. Irkeb beret siptesononnya makan dapna yadi irawaya goyen yade kotan kan nan kinde nan kenen Al Kurunyen saninde guram yirde yubala ten al yunnan yinenbe komatmin yago yunin.

²⁰ Al buda kurun gob bin ge go nen nen ep po namin. Irkeb komatmin belen bin ge diknen buda iramin gobe tiri 12 gwahade makin yirtek hamin.

²¹ Be, bin ge namin mar al parguwak po kapyan haminbe 5,000 hirin.

*Yesu fe yuwalnen hende huwarde kurin
(Mak 6:45-52; Yon 6:15-21)*

²² Be, gwaha tenbe komatmin yago, “Aranen hakwa hende hurkun fe ala sin kurhan kunan,” yinke hakwa hende hurkunbe yen wa mehen hen fe ala sin kurhan kwamin. Irkeb Yesube gor hen al buda kurun goyen, “Tiyuntinyan tiyuntinyan kunan,” yinin.

²³ Al buda go gwaha yinenbe Al Kurunya mere tiyye yenbe dugu dabayinde kura gor hurkuri. Kun yen un kuren gon hikeb kidoma hirin.

²⁴ Munan komatmin yagobe megen tubul ten fe ala kurunde hamin. Goyenbe mene huwarke fe goyen makan duba yara karkuwan karkuwan huwaramin. Irkeb hakwa gobe mun kura ma sor irin.

²⁵ Be, nana min ge hen hikeb Yesu go fe yuwalnen hende huwarde komatmin yago hitte kurin.

²⁶ Mel gore fe hende huwarde wan hike kenen kafura wor po henbe, “Gabe ungura!” yen ulin barbar yeke daha tiniñ tiniñ tiyamin.

²⁷ Goyenbe aran po Yesu belen, “Kafura ma yo. Ne wan hime geb. Taren henayin,” yinyin.

²⁸ Irkeb Pita belen, “Doyan Al Kurun, gabe fudinde ge kenenbe ninke fe hende huwarde ge hitte kwen,” inyin.

²⁹ Irkeb, “Iginge waya,” inyin. Gwaha inkeb Pita go hakwa hende mat solok yen fe hende harde Yesu hitte kurin.

³⁰ Goyenbe kun henya be mene kenen kafura henbe hako ga dolok yen kenenbe, “Doyan Al Kurun, faran nura!” yen kekew tiyyin.

³¹ Irkeb goyare po Yesu belen hanin temeyde tanardeb isan hiriñ. Irdeb, “Daniñ dufay budam hen ne nin hekken ma nurde ha?” inyin.

³² Gwaha tenbe hakwa hende hurkaryum. Irkeb mene kamyin.

³³ Irke gab hakwa binde hinhan mar gore kenen bebak tenbe dolon irde, “Fudinde wor po gebe Al Kurun Urmin,” inamin.

Genesaret nin garbam mar sope yiriyin
(Mak 6:53-56)

³⁴ Be, gwaha ten kun kunbe Genesaret nana belen gon forok yamin.

³⁵ Irkeb al gor nin belen Yesu kenen bebak tenbe mere kerke nana goyen bana nin mar yinke garbam mar tumnan Yesu hitte yawayamin.

³⁶ Irdeb, “Garbam mar gayen yubul tike mene diba ulger nin gote murun po sisan urdeb igin

henan,” inen esen mere iramin. Ningeb al garbam minyanbe Yesu go sisan urde tumnande igin hamin.

15

*Yesu belen asem yagot mata walde yunyin
(Mak 7:1-13)*

¹ Be, nanja goyen bana meten ten kun hikeyabe Yerusalem taun kurunde mat Farisi mar kuraya Moseyen saba mar kuraya goyen Yesu hitte wanbe,

² “Danin geb komatge yagobe asininin yagot mata ma gama irde han? Yenbe dula tininbe mali po binje nene han. Hanin ma haldeya gwaha ten han,” inamin.

³ Irkeb wol henbe, “Munan denbe danin geb asetin yagot mata nin po tenbe Al Kurunyen merebe pel irde bulun irde hanjen?

⁴ Al Kurun belenbe, ‘Nantin ya mamtinyabe palap yirde hinayin,’ yitin hi ningeb, ‘Al kura naninya milinya mere bulun yiryen gobe mayke kamyen,’ yitin hi.

⁵ Goyenbe denbe saba goyen tigiri tenbe, ‘Al kura naninya milinya det kura faran yurtek goyen ma yunenbe, “Igin faran durmewon gega, Al Kurun unen yen basin irmin geb, go ma faran duren,” yinyen gobe mata bulun mon,’ yen al saba yirde hanjen.

⁶ Ningeb al gwaha mat saba yirke Al Kurunyen mere ma gama irde naninya milinya palap ma yirde dulin hanjen. Denbe gwahade goyen po

asetin yagot mata nin tenbe Al Kurunyen mere bulun irde hanjen.

⁷ Usi mar wor wor, Al Kurunyen mere basan al Aisaia belen asande kayyin gobe fudinde wor po den gake kayyin.

⁸ Merebe gahade:

‘Mel gabe mohonde po turun nirde han.

Gega bindebe ne nin ma nurde han.

Hoyande wor po han.

⁹ Mel gabe megen nin marte saba po gama irde al saba yirde han.

Mel gabe bin hende hende po dolon nirde han,’ yitin hi geb,” yinyin. *Aisaia 29:13*

¹⁰ Be, Yesu gob mel Farisi marya Moseyen saba marya goyen gwaha yinenbe al buda kurun gor hinhan go yinke yen binde wayamin. Irkeb, “Mere ga nurde bebak tinañ ko.

¹¹ Det kura al mohonde mat binde kurkuyen gore Al Kurun dilingde al go bulun ma iryen. Goyenbe det kura mohonde mat kat kuyen gore po gab Al Kurun dilingde al go bulun iryen,” yinyin.

¹² Gwaha yinkeb komatmin yago belen wanbe, “Farisi marbe mere taha goke igin ma nurde han goyen yenen bebak taha?” inamin.

¹³ Irkeb wol henbe, “He kura Nanne Al Kurun tarenmin kurun gore ma haryin gobe filginin manan tumnan wasiyen.

¹⁴ Ningeb diling titmin buda gobe yenen wasak tinañ. Mel gobe saba fudinde goyen ma bebak tenbe al mata bulunde yukun han. Al kura diling titmin belen kadam yingen yara goyen belen

ikala irde tukun hime yiyyen gobe tumɗande kun mete titminde katiryen,” yinyin.

¹⁵ Irkeb Pita belen, “Maya mere gote min mon dira,” inyin.

¹⁶ Irkeb, “Den manan dufaytin mun kura ma wuk yen han?

¹⁷ Det kura al mohanɗe mat binde kurkuyen gobe kamebe kat kuyen gobe ma nurde han?

¹⁸ Goyenbe det mere kura al mohanɗe mat forok yen hanɗen gobe binde mat wan hanɗen geb, gore gab Al Kurun dilinge al go bulun yirde hanɗen.

¹⁹ Dufay bulun, al gasa yirke kamde kamde mata, al kura berem yan gore bere hoyanya duwan ten ten mata, alya bereya fonɗe leplep mata, kawe mata, merere huwarde usi mat mere ten ten matayabe mere bulun mat ten ten mata kurun gobe al binde mat pul yen hanɗen.

²⁰ Det gwahade gore gab Al Kurun dilinge al bulun yirde hanɗen. Hanin hal hal mata kenkela ma gama irde dula tinayin gore al bulun ma yiryen,” yinen saba yiryin.

*Kenan marte bere gote dufay sanin
(Mak 7:24-30)*

²¹ Be, Yesu go nana hinhin goyen tubul ten Saidon taunya Tair taunyat nana bana gon komatin yagoya kwamin.

²² Irkeb taun iraw goyen bindere tiyun kura hinhinde gor mat Kenan mar bere kura gore Yesu hitte wanbe, “Doyan Al Kurun, Dewit Urmin, buninɗen nirde faran nura. Wernebe ungura

belen wan hernen irtin hi geb, bulun bulun wor po irde han,” inen esen uryin.

²³ Goyenbe Yesube meremin goyen mun kura haywan ma hiri. Irkeb komatmin yago belen, “Esen durde gama dirinde po hi geb, takira tike kwi,” inamin.

²⁴ Irkeb wol henbe, “Nebe Israel mar Al Kurunen sipsip meremin ma nurde duwi hitin goke po wamirin geb,” yirin.

²⁵ Irkeb bere gore wan palap irde dokolhon yugulun tenbe, “Doyan Al Kurun, faran nura,” inyin.

²⁶ Irkeb wol henbe, “Dirinde bingebe epte ma goran yirde yad kulumin yago yunke nenayin,” inyin.

²⁷ Gwaha inkeb bere gore wol henbe, “Doyan Al Kurun, mere gobe fudinde ninha gega, dirinde bingeb diknen katnayin gob kulu wor nene hanen. Ningeb faran nurayin,” inyin.

²⁸ Irkeb Yesu belen, “Bere, ne nin heken wor po nurha geb, gusunon nirha gote iginen forok yiyyen geb,” inyin. Be, wirin gobe goyare go po igin hiri.

Al garbam kurayen kurayen sope yirin

²⁹ Be, Yesu go nana goyen tubul ten mulgan hen Galili fe ala kurun feren kun kunbe dugu dabayinde kura gor hurkurin.

³⁰ Irkeb al budam wor po yen hitte wayamin. Wan henyabe al kahan nonbo hitin, din titmin, ulin albo yirtin, mohon kattinyabe garbam hoyan minyan marya goyen sope yirke igin henen yen

nurde yawan kahan minde yeramin. Irkeb sope yiriyin.

³¹ Al gabu iramin mar belen mohoŋ kattin mere tike yenamin. Ulin albok hitin goyen igin heŋ, kahan bulun hitin goyen huwarde kun wan ten, dilin titmin nankenen tike yenenbe hurkunƙat tenbe Israel marte Al Kurun go turun irde kasor iramin.

*Al 4,000 binƙe yunke namin
(Mak 8:1-10)*

³² Be, Yesu belen komatmin go yinke wakeb, “Al buda kurun gabe tumnande hiteke kun kun yerenƙe hihi. Goyenbe det go kura netek minmon hahan. Binƙe ma nene tiyunmin kunayinbe belenyan kamnayin geb, buninen yenen hime,” yinyin.

³³ Irkeb komatmin belen wol heŋbe, “Tiyun binde minmon nana gahade gab binƙe damde nin yade al buda kurun gahade gayen yunteke nenayin?” inamin.

³⁴ Irkeb, “Beretbe dahade han?” yinkeb, “Beretbe 7ya makan dapna muknen yadi kura goya po han,” inamin.

³⁵ Be, al buda gabu iramin go megen keprnan yinke keperde tukamin.

³⁶ Irkeb beretya dapnaya go yadeb Al Kurun igin nurde unenbe beretya dapnaya go yubala tenbe komatmin yago al yunƙun yunnan yen yun-yin. Irkeb gwaha po tiyamin.

³⁷ Al buda kurun gobe binƙe go nene ep wor po namin. Irkeb Yesuyen komat belen binƙe diknen

al belen ep nene yubul tiyamin goyen yade tiri 7 gwahade makin yirtek iramin.

³⁸ Bereya dirinya ma kapyan hen al parguwak po kapyan haminbe 4,000 hiri.

³⁹ Binge yunke neke gabe, “Tiyuntinyan tiyuntinyan kunayin,” yinyin. Irdeb komatminya hakwa hende hurkunbe nana kura Magadan taun binde belen gon kwamin.

16

*Mata tinen kura ira inen gusunen iramin
(Mak 8:11-13; Luk 12:54-56)*

¹ Be, Yesu go gon hikeb Farisi marya Sadusi marya belen Yesu hitte wanbe tunan urnin yen, “Mata tinen Al Kurun belen irtek goyen kura irke kinnin,” inamin.

² Irkeb Yesu belen, “Denbe wawunbana hen nana buk yekeb, ‘Kadila hewen tiya,’ yen hanyen.

³ Irde wampotbe, ‘Nana bulun hihi geb, kigarin katen tiya,’ yen hanyen. Denbe nan kin kenen gab kadila hewen tiya ma kigarin katen tiya goyen kenkela nurde hanyen. Goyenbe gayenter nin mar goke tenbe Al Kurun belen mata forok yirde hi goyen dani geb yenen bebak ma ten han?

⁴ Den gayenter nin marbe mata bulun ten Al Kurun harhoktin unen han geb, mata tinen kurayen kurayen goke po nan kenen han. Goyenbe kura kinnin yekeb Yona hitte mata forok yirin* go

* **16:4:** Yonabe wawun karwo makan dapna kurun milin gote bin bana henbe sopte sinare katyin. Gobe Yesu kamyinde mat yerenkek heke sopte huwaryin gote tunanen.

gwahade goyen po kame dikala diren,” yinenbe mel goyen yubul ten hoyande kurin.

*Farisi marya Sadusi maryat saba bulun
(Mak 8:14-21)*

⁵ Be, fe ala kurun go warde sinja kurhan kwaminja goyenbe komatmin go bin sir yekeb beret kura ma yade ga kwamin.

⁶ Be, Yesu belen Farisi marya Sadusi marya goke komatmin goyen, “Kenkela hen hinan ko. Mongo mel gote yis belen bulun diryen geb,” yinyin.

⁷ Gwaha yinkeb komatmin belen, “Beret kura ma yad wayhet geb, gogo dina,” yen yingen ulin kadam mere gird tiyamin.

⁸ Komatmin go mere kusa irde hike yenenbe, “Danin dindiken ulin beretninin minmon yen han? Denbe ne nin ma heken nurde han?

⁹ Mun kura ma po bebak ten han? Beret siptesonon al 5,000 namin gote diknenbe tiri dahade makin yirtek hamin?

¹⁰ Goyen mon kenem beret 7 goyen al 4,000 nan gote diknen yade tiri dahade makin yirtek han?

¹¹ Farisi marya Sadusi maryat sababe yis belen palawa bana hilyan kutin yara al hoyan kurun gote dufay bulun yirde hi goke dinen hime. Beret nin ma yen hime gayen danin geb bebak ma ten han? Ningeb sopte dinen hime, Farisi marya Sadusi maryat yis belen bulun diryenkek geb, kenkela hen hinayin,” yinyin.

¹² Be, gwaha yinke gab, “Yis beret bana irde hanyen goke ma dinen hi. Farisi marya Sadusi

maryat sababe yis yara goke hayhay dirde hi,”
yen nuramin.

Yesu, gebe Mesaia

(Mak 8:27-30; Luk 9:18-21)

¹³ Be, Yesu go komatminya nanɔ bana go tubul
ten kun Sisaria Filipai taun binde binde hen
henbe gusunɔn yirɔn. “Ne Al Urmin gayen gake
al hoyan belen ganun yen han?” yɔnɔn.

¹⁴ Irkeb wol henbe, “Al kura belen gebe Yon
Baptais yen han. Munan kura marbe Elaia ginen
han. Kurabe Yeremaia ma Al Kurunyen mere
basan mar hoyan kura goyen ginen han,” inamin.

¹⁵ Irkeb, “Munan den gayenbe nebe ganun yen
nurd nunen han?” yɔnɔn.

¹⁶ Irkeb Saimon Pita belen, “Gebe Mesaia, Al
Kurun gwahader hitin al gote Urmin,” inɔn.

¹⁷ Gwaha inkeb, “Mere gobe Nanne Al Kurun
sanin minyan al gore ginke gab gago yaha. Al
kura belen ma mere goyen momon gira. Ningeb
Al Kurun belen guram girde sanin girɔn.

¹⁸ Gebe ne nin dufayge hora yara tareɔ irha geb,
Pita ginen hime. Ningeb hora go hendebe nere
alya bereya yeren.

¹⁹ Irde Al Kurunyen alya bereya doyan yird
yird sanin goyen ge gunen. Ningeb ge belen
igin yawayinbe Al Kurun wor igin yiyyen. Irde
ge belen bulun yawayinbe Al Kurun wor bulun
yiyyen,” inɔn.

²⁰ Gwaha inenbe tumɔnde komatmin goyen,
“Al hoyan kura hitte ne nin yen, ‘Yenbe Mesaia,’
ma yinnayin,” yinen utan yirɔn.

Kamde kamde miŋ ge kawan tagalyiŋ
(Mak 8:31–9:1; Luk 9:22–27)

²¹ Be, goyenter mat komat miŋ yago goyen kawan po, “Nebe Yerusalem kweŋ. Kumekeb Yuda marte doyaŋ mar parguwakya Al Kurunŋ doloŋ ird ird mata doyaŋ marte karkuwaŋyabe Moseyen saba marya beleŋ bulunŋ bulunŋ nirde mununke kamenŋ. Goyenpoga kamenŋ goyen yerenke hekeb huwareŋ,” yinyiŋ.

²² Irkeb Pita beleŋ mere go nurdeb yeŋ mun po tapat irdeb inenŋ tenbe, “Doyaŋ Al Kurunŋ, gwaha ma tiyayiŋ. Mata gobe ge hitte ma po forok yiyyen geb,” inyiŋ.

²³ Irkeb fulgaŋ kaŋ Pita kenenbe, “Satan, hoyan kwa! Gebe beleŋne pet ten ha geb. Dufay gobe Al Kurunyen moŋ, alyen dufay po geb,” inyiŋ.

²⁴⁻²⁵ Gwaha tenbe komat miŋ yago goyen gaha yinyiŋ: “Al kura gama nirde kanduk yenen yingenŋ ge kafura hen harhok nunyen al gobe kame tonenbe kanduk kinyenŋ. Munanŋ al kura ne gama nirde kamde kamde niŋ ma kafura hen kanduk kurunŋ ten uliŋ misiŋ katenŋ hiyenŋ al gobe tonenbe igiŋ hiyenŋ. Niŋgeb al kura ne gama nire yenbe megen niŋ dufayya mataya harhok yunenŋ. Irdeb kanduk yenenŋ hiyenŋ gega, yingenŋ ge ma nurde gama po nirde hiyenŋ.

²⁶ Al kura megen niŋ samunŋ budam yade denem yaŋ hiyyenŋ gega, al gobe Al Kurunŋ diliŋdeb kamtiŋ yara hiyyenŋ gobe daha tiyyenŋ? Gobe igiŋ moŋ, bulunŋ wor po. Niŋgeb megen niŋ samunŋ kura ten gore Al Kurunyen bearar bana hiyenŋ al gob epte ma damu ten tumulgaŋ titek.

²⁷ Ne Al Urmin gab kamebe Nanne Al Kurunyen sanin turun yan goyen manan katen. Goya goyenbe miyonminya kattek. Irdeb alya bereyat matamin dahade dahade goyen gote murungembe gwahade po yunen.

²⁸ Goyenpoga den gar han gayen kurabe ma kamdeya ne Al Urmin gare Al Kurunyen tarende alya bereyamin doyan yirde hen goyen kennayin. Mere gabe fudinde wor po dinen hime,” yinyin.

17

Yesu ulin hoyan hirin
(Mak 9:2-13; Luk 9:28-36)

¹ Be, naŋa fay 6 kamereb Yesu belen Pita, Yemsyabe kulin Yonya po yade dugu kurunde kura gor hurkamin.

² Gor henbe Yesu go mel gote dilin mar po ulin hoyan hirin. Dinsokdebe naŋa timiytin yara hirin. Ulin umna kerde hinhin go wor faykek wor po hirin.

³ Gwaha tikeyab dilin mar po Moseya Elaiaya forok yen Yesuya mere ten hinhan.

⁴ Irkeb Pita belen Yesu goyen, “Doyan Al Kurun, gar gabe nen hitek gasun igin mun wor po. Ningeb ge belen ok yekeb den al karwo hitek hen hen gasun kura yiren. Kurabe ge nin, kurabe Mose nin, munan kurabe Elaia nin,” inyin.

⁵ Mere gwaha ten hikeyabe kigarin kin faykek wor po kura gore wan aw yuryin. Irkeb al melak kura gagap bana goreb, “Al gabe Urne. Yenbe bubulkunne wor po, yen ge bener mat amanen

wor po nurde hime. Ningeb yende mere po nurde gama irde hinayin,” yirin.

⁶ Be, Yesuyen komatmin belen mere go nurdeb kafura wor po hen bin tadam mat megen katamin.

⁷ Gega Yesu belen wan yanardeb, “Kafura hen ma, huwarnan!” yinyin.

⁸ Gwaha yinke nankenenbe Yesu unkenen po hike kenamin. Al hoyanbe hubu.

⁹ Be, dugure gor mat katen henyabe Yesu belen mel go saba yirde, “Hanka det kenhan gayen gake al hoyan kura momon ma yirnayin. Ne Al Urmin gayen kameinde mat sopte huwarmeke gab igin tagalnayin,” yinyin.

¹⁰ Irkeb mel gore, “Danin geb Moseyen saba mar belen Elaiia wa wake gab Mesaia kame wayyen yen hanjen?” yen gusunan iramin.

¹¹ Irkeb, “Elaiia wa mehen hen det sope irke gab Mesaia wayyen yen hanjen gobe fudinde.

¹² Ningeb Elaiabe bikken wayun. Goyenpoga alya bereyabe kenen bebek ma tiyan. Irde yingen de dufay po gama irde bulun bulun irde mayke kamun. Mel goreb yen iran gwahade goyen po ne Al Urmin gayen wor gwahade po nirnayin,” yinyin.

¹³ Irke gab, “Yon Baptais nin dinen hi,” yen bebek tiyamin.

*Dirin unguram yan sope iryin
(Mak 9:14-29; Luk 9:37-43a)*

¹⁴ Be, mel go dugure mat katen al gabu kurun iramin de gor forok yekeb al kura gore Yesu hitte wan dilin mar dokolhon yugulun tenbe,

15 “Doyaŋ Al Kurun, urne bunineŋ irde faran ura. Bu toneŋ minyaŋ geb, uliŋ misiŋ kurun kateŋ hiyen. Kurareb kak alare kateŋ hiyen. Kurareb fe alare kateŋ hiyen.

16 Komatge yago hitte tawayhem gega, sope ma irhan,” inyiŋ.

17 Irkeb, “Deŋ gayenter niŋ marbe dahade niŋgeb Al Kurun niŋ dufaytiŋ muŋ kura saŋiŋ ma irde han? Tonantiŋ saŋiŋ wor po, saba dirman dirmanen. Gayak ga ma denya hityen gega, hako po han. Diriŋ go tawanan,” yinyiŋ.

18 Irdeb diriŋ go ten wakeb ungura diriŋ bana hinhin go inen ten takira tike kat kuriŋ. Irkeb goyare po igiŋ hiriŋ.

19 Be, go kamereb yen yunkuren po hen gab komatmiŋ belen, “Daniŋ geb nenbe ungura go ma takira tihit?” inamiŋ.

20-21 Irkeb, “Deŋ ungura takira ma tahan gobe Al Kurun niŋ hekken nurde han gobe kurun mon. Niŋgeb fudinde wor po dinhem. Al Kurun niŋ dufaytiŋ hek irde han goyen mastet he bilmiŋ diriŋen muŋ gwahadebe megen gar det kura ir-nayinbe metenen ma diriŋen. Niŋgeb dugu gayen ‘Gar mat siŋgir ten iror kwa!’ inkeb gwahade po tiyyen,” yinyiŋ.*

22 Be, Yesuya komatmiŋya gabu henbe tumŋan Galili nana bana kwamiŋ. Irdeb Yesu belen, “Ne Al Urmiŋ gabe mununtek al haniŋde nernayiŋ.

* **17:20-21:** Asan hoyandebe gahade hi: 21 *Goyenbe ungura gwahade goke dindiken binje kutŋa irde Al Kurun gusunŋan irde takira tike gabe kat kuyen.*

²³ Irke mununkɛb kameŋ gega, yereŋkek hekeb Al Kurun belɛŋ sopte nisaŋ heke huwareŋ,” yinyin. Gwaha yinkeb komatminbe kandukneŋ wor po nuramin.

Al Kurunyen ya balem gote teks

²⁴ Be, gwaha teŋ kuŋ kuŋbe Kapeneam taunde forok yamin. Irkeb Al Kurunyen ya balem nin teŋ teks yad yad mar belɛŋ Pita hitte wanbe, “Tisage gayen Al Kurunyen ya balem nin teŋ teks kura yerde hiyen?” inamin.

²⁵ Irkeb, “Gwaha,” yinyin.

Be, gwaha yinenbe Yesu hinhin ya go binde hurkukeb goyare po Yesu belɛŋ, “Saimon, megen nin doyan mar karkuwan yuntek teks kurayen kurayen gobe ganun mar belɛŋ gab yerde hanjen? Urmin yago belɛŋ yerde hanjen ma al hoyan belɛŋ yerde hanjen? Gebe dahade nurde ha?” inɛŋ gusunɛŋ iryin.

²⁶ Irkeb Pita belɛŋ wol henbe, “Al hoyan belɛŋ yerde hanjen,” inyin. Irkeb, “Gwaha, doyan mar karkuwan gote dirneŋ wenbe nanin yagon teks ma yerde hanjen geb.

²⁷ Goyenpoga teks ma yertekeb dufaymin bulun henak geb fete kuŋ funal temeyayin. Irde dapɛa mehenɛde wor po tawayin gobe mohoŋ takila teŋ teks yertek hora kura kenayin. Hora go tukunbe neya geyat teks kerayin,” inyin.

18

*Ganunbe denem kurun wor po hiyyen?
(Mak 9:33-37; Luk 9:46-48)*

¹ Be, goya goyenbe komatmin hoyan belen Yesu hitte wanbe, “Ganunbe Al Kurun belen alya bereyamin doyan yirde hire gor nin denem yan wor po hiyyen?” yen gusunon iramin.

² Irkeb dirin dirnen kura inke komatmin yago hinhande gor wan huwaryin.

³ Irkeb Yesu belen, “Fudinde wor po dinen hime. Dirin gahade gayenbe yingen al denem yan hen hen nin ma nurde hanyen. Gwahade goyen po al kura yingen al denem yan hen hen nin ma nurde han marbe Al Kurun belen yende alya bereya doyan yirde hi bana gon igin hurkunayin.

⁴ Ningeb al kura dirin gahade ga hinayin marbe Al Kurun dilinde denem yan wor po yen yinyen.

⁵ Irde al kura denem mon dirin gahade gayen ne nin ten gargar iryenbe ne gayen niryen.

⁶ “Goyenbe al kura dirin sanin minmon gahade gayen ne nin dufaymin taren irtin goyen al kura belen mata bulun tike kenen gama irde bulun tiyyenbe mata bulun min uryen al gobe murungem bulun wor po tiyyen. Ningeb al hoyan gama ma irkeya mata bulun min uryen al gobe hora kurun kura ten bininde fen ten makan alare temeyke kamyen. Gogab gote murungem bulun wor po goyen ma tiyyen.

⁷ “Mata bulun titek dufaybe al binyan huginen forok yen tunan yurke katen hanyen. Ningeb megen nin mar dufay bulun go ten han gobe Al Kurunyen bearar bana han geb goke buninen nurde hime. Dufay bulun gobe huginen al binyan forok yen hiyen gega, al kura dufay go gama irde mata tinayin mar gobe Al Kurunyen bearar bana

hinayin geb goke buninjen nurde yunen hime.

⁸ Ningeb hange kura belen girke mata bulunde katayinbe hange go walde temeyayin. Monjo hange unkenen gore girkeb ulge tumnan kak huginen hitinde gor kutek goke tenbe hange gore bulunde gukutek go po walde temeyayin. Irdeb igin hange kurhan titmin manan gasun iginde kwayin. Irde kahanje wor gwaha girkeb go wor gwahade po irayin. Irdeb iginde kwayin.

⁹ Irde delge kurhan belen girke mata bulunde katayinbe delge go marde temeyayin. Monjo delge unkenen gore girkeb ulge tumnan kak alare kutek goke tenbe delge gore bulunde gukutek go po marde temeykeb igin delge kurhan titmin manan gasun iginde kwayin,” yinyin.

Sipsip duwi hitin gote maya mere
(Luk 15:3-7)

¹⁰⁻¹¹ Irde sopte po gaha yinyin: “Be, al kura denem mon dirin gahade gayenbe Al Kurunyen miyon belen doyan yirde han. Irde miyon gobe Al Kurun sanin minyan gote dilin mar huginen hanjen. Ningeb al gahade goyen denem mon yen ingogaha ma yirde hinayin.*

¹² Be, ga nurnan! Al kura sipsipmin 100 hinayin. Irke unkenen kura kadom yubul ten hoyande kuyen. Irkeb gonmin yen tubul tiyyen? Mon! Sipsipmin 99 go yuku dondonde kura gor yubul tenbe kun nankenyen.

* **18:10-11:** Asan hoyandebe gahade hi: ¹¹ *Ne Al Urmin gabe alya bereya Al Kurunyen dirnen wen gega, mere ma nurde duwi hitnen tiyan goyen yumulgan tiye yen waminen.*

¹³ Fudinde wor po dinen hime. Unkuren mun goke nankenen kun ken en tenbe aman wor po hiyyen. Munan 99 goke gwahade wor po ma nuryen.

¹⁴ Gwahade goyen po, Nanti Al Kurun sanin minyan al gobe al kura dirin gahade gayen unkenen kura Al Kurun tubul ten kanduk bana kun kun gokebigin ma nurde hi,” yinyin.

Kadge kura bulun girkeb daha tiyayin?

¹⁵ Irde sopte po, “Be, kadge kura bulun bulun girkeb kun yen po hikeya gabe mata bulunmin goke momon irayin. Irke mere go nuryenbe al gob sopte kadge Al Kurun urmin gigen yara hiyyen.

¹⁶ Goyenbe merege ma nurke kenem al hoyan unkenen ma iraw gwahade yade ga kwayin. Gogab al irawa ma karwo gore merege goyen tunnan fudinde yenayin.

¹⁷ Al hoyan yukayin gote mere wor ma nurke kenenbe mata bulunmin goyen Al Kurunyen dirinen wen hoyan goyen momon yirayin. Yende mere wor ma po nurkeb al gobe Al Kurunyen dirin mon, mata bulun al yen kenen hinayin.

¹⁸ Fudinde wor po dinen hime. Al Kurunyen alya bereya doyan yird yird sanin goyen den dunen. Ningeb den belinigin yenayinbe Al Kurun worigin yiyyen. Irde den belin bulun yenayinbe Al Kurun wor bulun yiyyen.

¹⁹ Sopte dinen hime. Der al iraw kura megen gar henya det kuran nurde dufaytirin unkenen po irde Nanne Al Kurun taren minyan al goyen gusunan iriryenbe yen belin epte irde dunyen.

²⁰ Gwahade ningeb al irawa ma karwo gwahade kura, ‘Nenbe Yesuyen alya bereya,’ yen wan gabu irnayinbe ne manan wan yenya hitek,” yinyin.

Meten al buninen minmonyen maya mere

²¹ Be, gwaha yinkeb Pita belen wanbe, “Doyan Al Kurun, kadne kura belen bulun nirkeb wawun dahadere mata bulunmin go halde unen? Wawun 7 ma dahade?” yen gusunan iryin.

²² Irkeb, “Wawun 7 po mon. Bulun girde hikeb huginen halde po unen hayin,” inenbe

²³ mata goke maya mere mat gaha yirin: “Ningeb Al Kurun belen yende alya bereya doyan yirde hi bana gon nin matabe gahade: doyan al kura belen meten marmin horamin yawaramin go wol hena yinyin.

²⁴ Irkeb al kura doyan almin hitte hora kurun wor po tirin al goyen doyan almin hitte tawayamin.

²⁵ Gega al gobe hora kurun go epte ma wol hetek hirin geb, doyan almin gore, ‘Al gote bere-mya dirinmin wenya detminya goyen tumnan yukun al hoyan yunke damu tina. Irkeb hora gobe ne tewen,’ yirin.

²⁶ Irkeb meten al go dilin mar gor po dokolhon yugulun tenbe, ‘Bemel nirde ma. Horage kurun gobe wol hen gunen geb,’ inen esen mere iryin.

²⁷ Irkeb buninen kenenbe, ‘Hora go wol hen hen ge ma nurayin,’ inen tubul tike kurin.

²⁸ Goyenbe kun meten al kadom hora dirnen mun kura unke ma wol hitin al goyen kinyin. Irde hapekde tenbe, ‘Aranen horane wol hawa!’ inyin.

²⁹ Irkeb kadam go kimiñ mar dokolhon yugulun tenbe, ‘Bemel nirde ma yo. Horage wol hen gunen geb,’ inyiñ.

³⁰ Goyenbe al go buninen ma irde kadam go tagal unenbe, ‘Horane wol heke gab ten sinã irnayiñ,’ yinke tukun koyare keramiñ.

³¹ “Be, meten mar kadam belen mata go kenenbe biñ ar yamiñ. Irdeb kun doyan almiñ go mata kurun al gore tiyyiñ goyen momon iramiñ.

³² Irkeb doyan al belen meten almiñ go hoy irke wakeb, ‘Geb meten al bulun. Horane epte ma wol hetek geb, esen mere nirkeb buninen girde gonmiñ ginmiñ.

³³ Ne belen buninen girde kandukge kurun go pasi irde gunmiñ gwahade goyen po, ge belen wor daniñ geb kadge gwaha ma iran?’ inyiñ.

³⁴ Doyan al go biñ ar wor po yekeb, ‘Al go koyare kernañ!’ yinyiñ. Irdeb, ‘Horane tumñan wol heke gab tubul tike kuyen,’ yinyiñ.

³⁵ Nanne Al Kurun sañiñ minyan gore den wor mata gwahade goyen po diryen. Niñgeb kadtin yago bulun dirnayiñ goyen bitinde mat wor po halde yunen hinayiñ. Mali hende hendem ma tinayiñ,” yinyiñ.

19

*Al belen bere yakira ten ten mata
(Mak 10:1-12)*

¹ Be, Yesu go mere gwahade mat al saba yirdeb Galili naña tubul ten Yodan fe gama irde Yudia nañare kuriñ.

² Kun hikeb al budam gama irde kun hinhan. Irke al garbam minyanbe sope yirke igin hen hinhan.

³ Gwaha ten hikeyabe Farisi mar kura belen tunan urnin yen wanbe, “Al kura min goke kuram mon berem takira tiyyen gobe Moseyen sabarebe igin yitin we?” inamin.

⁴ Irkeb wol henbe, “Hankapya wor po tikula kerdyabe Al Kurun belen al irde, bere irde iryin goyen Al Kurunyen asande katin hi gobe ma kapyan hen hanyen?”

⁵ Al Kurun belen gwaha yiryin geb, goke tenbe albe naninya milinya yubul ten kun beremya gabu hiriryen. Irke al belen yenenmin iraw goyen Al Kurun dilingdebe unkuren po yinyen.

⁶ Ningeb irem gobe hoyan hoyan ma hiriryen. Unkuren po hiriryen. Gwahade geb Al Kurun belen alya bereya yade gabu yiryen gobe al belen epte ma bur yirnayin,” yinyin.

⁷ Irkeb mel goreb, “Gwahade kenem danin geb Mose belen igin bere takira ten ten asan kan unenbe takira tiyayin yirin hi?” yen gusunan iramin.

⁸ Irkeb wol henbe, “Denbe tonantin sanin wor po, mere ma nurtek goke tenbe Mose belen gwaha dinyin. Goyenbe hankapya wor po minde matbe gwahade mon.

⁹ Ningeb al kura berem al hoyanya ma duwan ten hikeya takira ten bere hoyan tiyyenbe Al Kurun dilingde mata bulun tiya yen kinyen,” yinyin.

¹⁰ Irkeb komatmin belen, “Be, gwahade kenem bere ma ten dulin hen hen gobe igin,” yamin.

¹¹ Gwaha yekeb, “Al berem mon dulin hitek yahan gobe al tumnan gwahade hitek mon. Al yunkuren igin gwahade po hinayin yen yirtin mar gore po gab gwahade hinayin.

¹² Al kurabe bere nin ma wor po nurde hanjen. Goyen mar gobe kurab gwahade po kawan hitin. Munan kurabe al belen po min minyan gwahade yirtin. Munan kura marbe Al Kurun belen yende alya bereya doyan yirde hi gote meten po ten hiniyen yen bere ma yade hanjen. Ningeb al gwaha titek mar po gab igin gwaha ten hinayin,” yinyin.

Dirin muknenya Yesuya

(Mak 10:13-16; Luk 18:15-17)

¹³ Be, dirin muknen go Yesu belen hanin yerde Al Kurun gusunan irke guram yirde sanin yiri yen naninya milinya belen yawayamin. Irkeb komatmin yago belen yinen ten utan yiramin.

¹⁴ Goyenbe Yesu belenbe, “Utan yirde ma. Dirin muknen go yubul tike ne hitte yawanan. Al kura Al Kurunyen al hewe yenbe dirin belen naninya milinya hitte kun kun nin kama ma hen hanjen go gwahade hiyyen gab Al Kurun belen yende alya bereya doyan yird yird gobe yende hiyyen,” yinyin.

¹⁵ Gwaha yinenbe dirin muknen go guram yirde yubul tenbe hoyande kurin.

Al samunmin budam

(Mak 10:17-31; Luk 18:18-30)

¹⁶ Be, gon hikeb al kura gore Yesu hitte wanbe, “Tisa, da mata igin ten gab Al Kurunya huginen hiren?” inen gusunan iryin.

¹⁷ Irkeb, “Daniḡ geb det igiḡ niḡ gusuḡaḡ nirde ha? Al Kurun unḡkurenḡ po ga al igiḡ geb. Yenya hugiḡeḡ heḡ heḡ niḡ nurde ha kenem Moseyen saba goyen gama irde hayiḡ,” inyiḡ.

¹⁸ Irkeb al gore, “Saba damiḡ damiḡ niḡ yen ha?” inyiḡ. Irkeb, “Al ma gasa yirke kamnayiḡ, al berem yaḡbe bere hoyan duwan ma irde hiyeḡ, kawe ma tiyayiḡ, merere huwarde usi mat ma mere tiyayiḡ.

¹⁹ Irde momkeya nanakeya palap yirde meremiḡ nurde hayiḡ. Irde gigeḡ ge amaḡeḡ nurde hayen gwahade goyen po kadge hoyan niḡ wor amaḡeḡ nurde hayiḡ,” inyiḡ.

²⁰ Irkeb al gore, “Go ninha gobe tumḡaḡde nurde gama irde himyen. Da mata wor po soḡ heḡ himyen geb, goyen tiyayiḡ yen niniḡ ha?” yen gusuḡaḡ iryiḡ.

²¹ Irkeb, “Al Kurun diliḡde al huwak wor po hewe yenbe kuḡ samuḡge kurun goyen al yunke damu tikeb hora go yade yukuḡ al det niḡ amu heḡ haḡ mar goyen yunayiḡ. Irkeb Al Kurun belen nere hihi yen genke gab waḡ gama ni-rayiḡ,” inyiḡ.

²² Irkeb al foḡeḡ gobe samuḡya detmiḡya budam wor po geb, Yesuyen mere nurdeb biḡde kandukḡeḡ wor po nurdeya kuriḡ.

²³ Gwaha tikeb komatmiḡ yago goyen, “Fudiḡde wor po diḡeḡ hime. Al samuḡmiḡ budam wor pobe Al Kurun belen yende alya bereya doyaḡ yirde hi bana goḡ hurkuḡ hurkuḡ gobe meteneḡ wor po geb.

²⁴ Dapḡa kurun kamelbe det haran heḡ heḡ ku-

tum yamen dirnen mun wor po goyen bana epte ma hurkuyen. Gwahade goyen po, al samunmin budam wor Al Kurun belen alya bereyamin doyan yirde hi bana gon epte ma hurkunayin. Ningeb det irawa goyen tumnande metenen. Goyenbe daminbe metenen wor po yen nurde han? Al samunmin budam gobe metenen wor po geb,” yinyin.

²⁵ Irkeb komatmin yago belen mere go kukuwamnen wor po nurdeb, “Ningeb ganun mar po gab Al Kurun belen yawaryen?” inamin.

²⁶ Irkeb mel go yenenbe, “Mata gobe alyen tarenbebe epte mon. Goyenpoga Al Kurunyen tarenbebe det kura metenen minmon,” yinyin.

²⁷ Irkeb Pita belen, “Be, nenbe detninin tumnan yubul ten gama girtin. Ningeb kamebe da yawartek?” inyin.

²⁸ Irkeb gaha yinyin: “Fudinde wor po dinen hime. Nalu funande Al Kurun belen megenya naninya gergen yiryen nature goyenter ne Al Urmin gabe saninne turnun yanya maroro gasunner keperde alya bereyane doyan yiren. Irde den 12 gama nirde han mar gayen manan maroro gasuntinyan keperde nere alya bereya tumnan, al min 12 Israel yinen hinayin goyen doyan yirnayin.

²⁹ Irde al kura nere alya bereya nin ten yamin, haymin, babam, itin, kulin, nanin, milin, dirinminmyabe metenminya yubul tinayinbe gote murungembe budam wor po yawarnayin. Irde Al Kurunya huginen hen hen goyen manan yende hiyyen.

³⁰ Goyenpoga al kura yingen ge yen, ‘Nebe gwaha gwaha timin geb, gote murungem kurun al hoyande gote folek wor po tewen,’ yiyyen al gobe dirnen mun tiyyen. Munan al kura nebe hako hime yen nurde hiyen al gobe murungem kurun wor po al hoyande gote folek tiyyen. Ningeb al mehende hiyen al gobe kame hiyen. Munan kame hiyen al gobe mehende hiyen,” yinyin.

20

Wain meten marte siraw mere

¹ Be, meremin goke tenbe siraw mere matbe gaha yinyin: “Al Kurun belen alya bereya doyan yird yird mata kurabe gahade: al denem yan kura wain metenner al yawarmeke wan meten tinan yenbe wampot mun po kurin.

² Kunbe, ‘Hanka nan kahal meten tinayinbe denari* un kuren un kuren dunen,’ yinyin. Irkeb igin yen nurdeb metende kwamin.

³ Be, kun 9 kilok nana gwahade hekeb wain meten min al go gabu irde han yen gasunde gor kun al hoyan dulin meten min mon hinhan goyen yinyin.

⁴ Irdeb, ‘Den wor kun metenner meten tinan. Irkeb hora gwahade igin dunen yen nurde hime goyen dunen,’ yinyin.

⁵ Irkeb kwamin. Al go sopte po nana ban kahalya 3 kilok wawunbanaya wor kun meten mar yad yerke metenminde kun meten tiyamin.

* **20:2:** Denari: Al belen wampot mat meten tenbe wawunbana nana sul yeke bada henbe gote hora tiyyenbe denari un kuren tiyyen.

⁶ Be, 5 kilok wawunbana wor po kunbe al hoyan kura meten minmon dulin hike yinyin. Irdeb, 'Danin dulin meten minmon wor po hike nana hubu hewen tiya?' yinyin.

⁷ Irkeb, 'Mon, al kura belen meten kura ma dunkeb gago dulin hite,' inamin. Irkeb, 'Den manan kun wain metenner meten tina,' yinyin.

⁸ "Be, numtuk urkeb meten min al goreb metenmin doyan ird ird al goyen gaha inyin. 'Meten tahan mar goyen hoy yirde murungem yunayin. Funan wor po wan meten tahan mar go wa damu yirayin. Irde kun kun funanbe wampot mun yen wa wayhan mar goyen damu yirayin,' inyin.

⁹ Funan wor po wayamin mar gobe denari unjkuren unjkuren yawaramin.

¹⁰ Ningeb go yenenbe wampot mat meten tiyamin mar gobe hora hende wor po tinin tihit yen nuramin. Gega yen manan denari yunjkuren po yawaramin.

¹¹ Horamin go yadeb meten min al goke igin ma po nurde bin ar yamin.

¹² Irde, 'Al gayamun ga wan metenge tahanbe nen hora tihit gahade po tahan. Nenbe wampot mat nana misin ma yen meten kurun wor po tihit,' inamin.

¹³ Gega meten min al gore huwarde kuramin kura goyen, 'Kadne, al hoyan po igin yirde, denbe bulun ma dirhem. Denbe igin denari unjkuren goke meten titek ma yahan?

¹⁴ Dufaynerbe al kamere meten ten nunhanya denyabe murungem tunjande dunen yen nurhem.

Niṅgeb horatiṅ yade kunaṅ.

¹⁵ Horabe nigen geb daha wet kura ire yeṅbe gwahade po ireṅ. Gega daniṅ geb al bunineṅ yirde faran yurhem goke iḡiṅ ma nurhan?’ yinyiṅ.

¹⁶ Al Kurun belen yende alya bereya doyaṅ yird yird matabe gwahade geb, al kame hiyeṅ al gobe meheṅde hiyeṅ. Munan meheṅde hiyeṅ al gobe kame hiyeṅ,” yinyiṅ.

*Yesu belen kamde kamdemin ge sopte tagalyiṅ
(Mak 10:32-34; Luk 18:31-34)*

¹⁷ Be, Yesu go Yerusalem kun henyaḡe komat-min 12 goyen po yapat yiryiṅ.

¹⁸ Irdeb, “Neṅbe Yerusalem kun hite gago. Irde ne Al Urmin gayen al kura belen tagal nunkeb Al Kurun doloṅ ird ird mata doyaṅ marte karkuwanya Moseyen saba marya belen nade fere nirnayiṅ.

¹⁹ Yeṅ belen mayke kami yeṅbe al min hoyan Yuda mar moṅ hitte nad nerke kweṅ. Irkeb yeṅ belenbe giwgiw nirde nusulak teṅbe kuruse hende mununke kameṅ. Gega kameṅde mat kun yerenkek hekeb sopte huwareṅ,” yinyiṅ.

*Sebedi beremde gusunṅ
(Mak 10:35-45)*

²⁰ Be, Sebedi berembe urmin waran yade Yesu hitte wayamin. Wanbe dokolhon yugulun teṅbe gwaha nirwoṅ yeṅ Yesu gusunṅ iryiṅ.

²¹ Irkeb, “Daniṅ wor po nurde ha?” inyiṅ. Irkeb bere gore, “Iḡiṅ yeṅ kenenbe ge belen alya bereya doyaṅ yirde hayiṅde gorbe urne waran

gayen ketalger hen tumnande al doyan yirde hinayin,” yirin.

²² Irkeb Yesu belen, “Min gwahade nin gusunan hihit yen nurdeya ma gusunan hahan geb. Kanduk kurun tewen ten hime gayen epte tenayin?” yinyin. Irkeb, “Epte tetek,” inamin.

²³ Irkeb Yesu belen, “Fudinde kandukbe tiriryen gega, neya hen al doyan yird yird nin gusunan nirhan gobe ne belen igin ma bulun ma dinen. Ne ketalner kurhan kurhan hen denem yan hen hen gobe Nanne belen hakot al basina yirtin han gore yawarnayin,” yinyin.

²⁴ Be, komatmin hoyan 10 gore mere go nurdeb ire itinya goke bin ar yamin.

²⁵ Irkeb Yesu belen tumnan hoy yirdeb gaha yinyin: “Megen nin doyan mar karkuwanbe al kafura yirkeb yen yufukde po hanjen. Irde yende meten marmen manan deninin yan hihit yen nurdeya al kanduk yunen hanjen.

²⁶ Gega denbe gwahade mon. Al kura den kahal bana gayen al kurun hewe yen nuryen gobe yingen ge ma nurde dende meten al po hiyyen.

²⁷ Ningeb den bana al kura doyan al hewe yenbe yingen ge ma nuryen. Irde den ge po dufay hen dende meten al po hiyyen.

²⁸ Gwahade ningeb, ne Al Urmin gayen wor al belen igin igin nirnan yen ma katmirin. Ne belen po al igin yire yen katmirin. Irdeb alya bereya budam gote mata bulunmin gote murungem yingen yawartek goyen ne belen yawaren goke ten darine wok irde kamen yen katmirin,” yinyin.

*Al irawa diliŋ titmiŋ naŋkenaryum
(Mak 10:46-52; Luk 18:35-43)*

²⁹ Be, Yesuya komatminya goya Yeriko taun tubul ten kuŋ hikeyabe al buda kurun gama irde kuŋ hinhan.

³⁰ Goya goyenbe al irawa diliŋ titmiŋ kura belen sinare keperde hinaryum. Irde Yesu gago wan kuŋ hi yinke nurdeb, “Doyan Al Kurun, Dewit Urmin, buninen nurd dunen faran dura be!” yen hokde po gwaha inaryum.

³¹ Irkeb al buda gore nurde yinen tenbe, “Balmin hiri!” yinamin gega, ug po, “Doyan Al Kurun, Dewit Urmin, buninen nurd dunen faran dura be!” inaryum.

³² Irkeb Yesu go tek yen huwarde hoy yirdeb, “Daha dirwon yen nurde har?” yinyin.

³³ “Doyan Al Kurun, naŋkenyewon yen nurde har.” inaryum.

³⁴ Be, Yesu gob buninen wor po yenenbe diliŋyan sisan yurkeb goyare po naŋkenen gama irde yen kuŋ hinhin belen gon kwaryum.

21

*Yesu Al Kurunyen ya balem bana hurkurin
(Mak 11:1-11; Luk 19:28-40; Yon 12:12-19)*

¹ Be, Yesuya komatminya go Yerusalem binde binde hamin. Tiyun kura denem Betfage gobe Olip dugu dabayin belen hinhin. Be, Yesube gor forok yenbe komatmin irawa kura hulyan yirdeb,

² “Kuri. Kuŋ tiyun iroyenter forok yenbe donki al dirin fonen kura gor milinya yen titin yenenbe yugu ten yade wayiryen.

³ Al kura belen goke daha wet kura dinkeb, 'Doyan Al Kurun belen goke yihi,' inkeb yubul ten dunkeb yade wayiryen," yinyin.

⁴ Yesu go tiyyin gobe bikken Al Kurunyen mere basan hen hen al belen yirin goyen fudinde forok yen yen ge tiyyin. Merebe gahade:

⁵ "Yerusalem* nin mar goyen gaha yinnan.

'Doyan Al Kuruntin den hitte wan hi.

Al gobe yingen ge turun turun ma ten hi.

Ningeb al gobe donki hende wan hi.

Donki gobe fonen,' yinnayin," yitin hi.

Aisaia 62:11; Sekaraia 9:9

⁶ Be, Yesu komatmin go kunbe yinyin gwahade po tiyaryum.

⁷ Donki fonenya milinya go yawakeb komatmin belen ulinhormin yugu ten go hende ugamkeb hurkun kipiryin.

⁸ Al budam Doyan Al Kuruninin waya yen ulinhormin yugu ten belen yan ugamamin. Kurabe patila hanin yufun tiyamin goyen belenyan sar irde tukamin.

⁹ Al kurabe mehen hekeb kurabe kame hamin. Irdeb tumnan ala turun iramin.

"Dewit Urmin turun irnin ko."

"Doyan Al Kurunyen denemde wan hi gobe Al Kurun belen guram irde sanin iryen!" *Tikin*

118:25-26

"Al Kurun turun irnin ko."

¹⁰ Be, Yesu go kun Yerusalem forok yekeb taunde gor nin mar gob tumnan hurkun'kat wor po tenbe, "Al gab ganun?" yamin.

* 21:5: Denjem hoyanbe Saion.

¹¹ Irkeb al buda goreb, “Al gabe Yesu Al Kurunyen mere basan al. Yenbe Galili nanja bana gon nin tiyun Nasaret nin al,” yinamin.

*Yesu belen Al Kurunyen ya balem haran hirin
(Mak 11:15-19; Luk 19:45-48; Yon 2:13-22)*

¹² Be, Yesu go Al Kurunyen ya balem koya belen po milgu irtin bana gon gabu gasun kurunde hurkunbe al buda gor det damu ten hinhan go kwep kwep yirde yakira tiyyin. Irde hora kapyan hen hen mar belen hora yirtin gasunya damure nin kalyingi yawan yerdeb keperde hanyen gasunya goyen yade yabolon ten yunyin.[†]

¹³ irdeb, “Al Kurunyen mere asande katinbe gahade: ‘Ya gabe ne mere nird nird gasun. Gar wan gabu irde mere nird nird ya hiyyen,’ gwahade yitin hi. Goyenbe den belenbe ten ‘kawe marte gasun’ irde han,” yinyin.

¹⁴ Be, Yesu go ya balem bana gon po hikeya al dilin titminya kahan simsimanya goyen yen hitte wake sope yiryin.

¹⁵ Irkeb dirinbe bana gon, “Dewit Urmin turun irnin ko!” yen hewhow ten hinhan. Irkeb Al Kurun dolon ird ird mata doyan mar pris buda gote karkuwanminya Moseyen saba maryabe Yesu belen mata tinen forok yiryin goyen kenamin, irde dirin belen Yesu goyen Dewit Urmin yen turun iramin goyen nurdeb bin ar wor po yamin.

[†] **21:12:** Hora kapyan hen hen marbe Roma gabmanyen horaya Yuda marte hora goyen al belen yen yunke Al Kurunyen ya balemde nin hora ten wolminen al go yunke gab Al Kurun galak irnin yen ya bana gon yerde hanyen.

¹⁶ Irdeb waɗ Yesu gusuɗaɗ iramiɗ. “Gebe diriɗ mere teɗ haɗ gayen nurde ha?” inkeɓ wol heɗbe, “Gwaha, nurde hime. Deɗbe diriɗ beɗe mata teɗ haɗ goke Al Kurunyen asandeɓ, ‘Diriɗ kahaɗyaɗ hitiɗya diriɗ mamure niɗya beɗe turuɗ nird nird niɗ gitik yirtiɗ,’ yitiɗ gobe kapiyaɗ ma heɗ haɗyen?” yiniɗ.

¹⁷ Gwaha yineɗbe yubul teɗ Betani taunde kuɗ go wawuɗ gobe gor hinhin.

*Yesu beɗe fiɓ he karan uryiɗ
(Mak 11:12-14,20-24)*

¹⁸ Be, fay urkeɓ wampot muɗ Yesu go mulgaɗ heɗ Yerusalem kuɗ heɗyabe beɗe biɗe iryiɗ.

¹⁹ Irkeɓ fiɓ he yuwaɗheɗ digula urtiɗ goyen beɗe siɗare hike keneɗbe igineɗ miɗyaɗ daw yeɗ kuɗ kinyiɗ. Kuɗ miɗde mat kinyiɗbe igineɗ miɗmoɗ, yuwaɗheɗ beɗe po aw urtiɗ. Gwahade keneɗbe Yesu beɗe he goyen, “Tebaɗ igineɗ ma hawayiɗ,” iney karan uryiɗ. Irkeɓ goyaɗe po gwilgwal iryiɗ.

²⁰ Be, Yesuyen komatmiɗ go fiɓ he goyen goyaɗe po kamtiɗ heke keneɗbe diliɗ fot yamiɗ. Irdeb, “Dahade geb he gob bemel po gwilgwal ira?” yamiɗ.

²¹ Irkeɓ Yesu beɗe wol heɗbe, “Fudinde wor po diɗeɗ hime. Al Kurun niɗ hekkeɗ nurde dufay irawam ma irnayeɗbe ne beɗe fiɓ he irhem gwahade igiɗ tinayiɗ. Irdeb dugu wor, ‘Kuɗ makaɗ alare kurka,’ inkeɓ gwaha po tiyyeɗ.

²² Al Kurun niɗ hekkeɗ nurde det kuran gusuɗaɗ irkeɓ tumɗaɗ dunyeɗ,” yiniɗ.

*Yesu tareɗminj ge gusunɗan iraminj
(Mak 11:27-33; Luk 20:1-8)*

²³ Be, Yesu go Al Kurunyen ya balem koya belɗ po milgu irtin bana sawsawa al gabu irde hanyende gor hurkun al saba yirde hinhin. Irkeb pris buda gote karkuwanminya Yuda marte doyan mar parguwakya belɗ Yesu hitte wanbe, “Mata ten ha kurun gayenbe da tarende ten ha? Ganun belɗ igin gwaha ten hayin ginun?” inamin.

²⁴ Irkeb, “Ne wor gusunɗan kura diren tihim gayen wol henayin. Irke gab nebe goyen sanjinde ten hime yen momon diren,” yinenbe gaha yinyin.

²⁵ “Yon Baptais belɗ al baptais yirde hinhin gobe Al Kurunyen tarende ma alyen tarende? Momon nirnan,” yinyin. Irkeb mel goyen yingen ulin mere sege irdeb, “Daha intek? Al Kurunyen sanjinde intek gob, ‘Munan dani sabaminbe fudinde yen gama ma irde hinhan?’ dinyen.

²⁶ Munan alyen sanjinde yetek gob al buda kurun gabe Yon Baptaisbe Al Kurunyen mere basan al yen nurde han geb, bin ar yeke mudunnayin,” yamin.

²⁷ Irdeb mel goreb, “Go ma nurde hite,” inamin. Irkeb Yesu belɗbe, “Ne wor al gore ok ninke ten hime ma dinen,” yinyin.

Al kurat urminj waran gote maya mere

²⁸ Irdeb Yesu belɗbe, “Ga dinen tihim gayen dahade nurnayin goyen tagalke nuren. Be, al kura urmin irawam yan hinhin. Kurarebe urmin

kurun hitte kunbe gaha inyin. ‘Eke, han̄kabe kun wain meten̄de meten̄ tiyayin̄,’ inyin.

²⁹ Irkeb urmin̄ kurun̄ goreb, ‘Badne,’ inyin. Goyenbe kamebe dufaymin̄ mulgan̄ hekeb kun meten̄ tiyyin̄.

³⁰ Be, al gob urmin̄ dirnen̄ hitte wor kunbe urmin̄ kurun̄ inyin̄ gwahade po inyin̄. Irkeb urmin̄ dirnen̄ goreb, ‘Be, doyan̄ al, gwaha tiyen̄ geb,’ inyin̄. Goyenbe kun̄ meten̄ ma tiyyin̄.

³¹⁻³² Niṅgeb dirin̄ damin̄be naniṅde mere nurde gama iryin̄?” yinyin̄. Irkeb mel gore wol hen̄be, “Urmin̄ kurun̄ gore,” inamin̄. Irkeb Yesu belen̄ wol hen̄be, “Den̄be Yon Baptais belen̄ wan̄ Al Kurun̄ dilin̄de huwak hen̄ hen̄ nin̄ yekeb meremin̄ ma nuran̄. Irde matamin̄ goyen yenan̄ gega, meremin̄ fudin̄de yen̄ ma nurdeb Al Kurun̄ nin̄ bitin̄ mulgan̄ ma hiyun̄. Goyenbe teks yad yad marya bere belen̄ nin̄yabe fudin̄de yen̄ nuran̄. Niṅgeb fudin̄de wor po dinhem. Teks yad yad marya bere belen̄ nin̄yabe den̄ fole dirde yen̄ wa Al Kurun̄ belen̄ alya bereyamin̄ doyan̄ yirde hi bana goṅ hurkunayin̄,” yinyin̄.

Wain meten̄ doyan̄ irde hinhan̄ mar gote maya mere

(Mak 12:1-12; Luk 20:9-19)

³³ Irdeb Yesu gobe teban̄ gaha yinyin̄: “Maya mere hoyan̄ ga nurnan̄. Al kura wain meten̄ harde koya kerde milgu irdeb wain fimin̄ gilyan̄ hen̄ hen̄ nin̄ mete talde det gitik yiryin̄. Irdeb ya kawan kura al gor hen̄ wain meten̄ go doyan̄ ird ird nin̄ iryin̄. Irdeb meten̄ gobe meten̄ mar hoyan̄ haniṅde kerdeb nan̄a gisaw kurin̄.

³⁴ Be, wain iginen yad yad nalu hekeb min al gore meten marmin karwo hulyan yirkeb wain iginen kura yawarnin yen kwamin.

³⁵ Goyenbe mel goreb gasa yiramin. Unkuren maydeb kurabe mayke kamin. Irdeb funanbe horare mayamin.

³⁶ Be, al gob teban po meten marmin kura budam hulyan yirke kwamin. Kukeb mehenbe yiramin gwahade po yiramin.

³⁷ Irkeb funan wor pobe, 'Urne hulyan ire. Gogab palap irde meremin nurnayin geb,' yenbe urmin ten kerke kurin.

³⁸ Gega wain meten doyan irde hinhan mar gobe kadom momon gird tenbe, 'Meten gate min al gote urminbe gago geb, mayteke kami. Gogab meten gayen nanin minmon hekeb nende hiyyen,' yamin.

³⁹ Irdeb meten min alyen urmin go ten tukun meten sinare mayke kamin.

⁴⁰ Gwaha tikeb meten min al gore wanbe daha yiryen yen nurde han?" yinyin.

⁴¹ Irkeb Al Kurun dolon ird ird mata doyan marya Yuda marte doyan mar parguwakya belen wol henbe, "Mata bulun tinayin mar go gasa yirke kamnayin. Irde metenmin go ten al hoyan haninde kiryen. Irkeb mel gore gab wain iginen yad yad nalurebe yen untekebe unen hinayin," inamin.

⁴² Irkeb Yesu belen wol henbe, "Denbe Al Kurunen mere gahade katinbe ma kenen hanyen? Merebe gahade:

'Ya yird yird mar belen igin mon yen nurde pel

iramın hora goyen al hoyan belen ten go hende ya sanın wor po iryın.

Go iryın gobe Doyan Al Kurun belen iryın.

Nıngeb Al Kurun belen iryın gob dılınınıdebe igin wor po yen kenen hite,' yitin hi. *Tikin*
118:22-23

⁴³ “Nıngeb fudinde wor po dinen hime. Denbe Al Kurun belen alya bereyamin doyan yirde hi bana gon hitek gega, dakira tenbe Al Kurun dilinde mata igin ten hinayın mar goyen po gab yunyen.

⁴⁴ Nıngeb Al Kurunyen asande hora nin yitin gobe ne gago. Nıngeb al kura hora go hende takten mayyenbe mugol niyyen. Irde hora gore katen hika tiyyen al gobe umetek tiyyen. Nıngeb al kura nenen bebek ma tinayın mar hittebe kame mata gwahade forok yiyyen,” yinyin.

⁴⁵ Be, pris buda gote karkuwanminya Farisi marya go Yesuyen maya mere go nurdeb, “Nen ga po dinen hi,” yen nuramin.

⁴⁶ Irdeb daha mat kura ten fere titewon yen nuramin. Irdeb Yesube al buda gore yenbe Al Kurunyen mere basan al yen nurde hinhan geb, al buda goke kafura hamin.

22

Bere ten tende nin dula mata gote maya mere
(Luk 14:15-24)

¹ Be, Yesu go teban po maya mere mat al gaha yinyin:

² “Al Kurun belen alya bereyamin doyan yird yird goyen kurabe gahade: doyan al kurun kura

urmin bere tewe yekeb dula mata kurun gitik tiyyin.

³ Irdeb meten marmin hulyan yirdeb, 'Kun dula mata gake al hoy yirmin mar goyen yinke wanan,' yinyin. Goyenbe kun yinkeb bada hamin.

⁴ Irkeb meten marmin hoyan wor sopte hulyan yirdeb gaha yinyin. 'Kunbe, "Doyan al kuruninin belen bulmakaw firfurnen gasa yirde det tumnan gitik ten ep ira. Irdeb wanayin yen den ge keya hihi geb wake kunin," yinnayin,' yinyin.

⁵ "Be, meten marmin gore kun al hoy yiryin mar goyen yenenbe doyan almin belen yinyin gwahade po yinamin. Goyenpoga yende mere go ma nuramin. Irdeb dufayminde dufayminde kwamin. Al kurabe binde metenminde kurin. Munan kurabe hora metenminde kurin.

⁶ Al kura marbe doyan al kurunde meten mar buda goyen yade bulun bulun yirde gasa yirke kamamin.

⁷ Gwaha tikeb doyan al kurun go bin ar yekeb fulen marmin yad yerke kwamin. Kunbe al buda meten marmin gasa yiramin goyen gasa yirke kamkeb tiyunmin go manan kunga tiyamin.

⁸ "Gwaha tenbe doyan al kurun go meten marmin yenya hinhan go hoy yiryin. Irdeb gaha yinyin. 'Dawetbe tumnan gitik ten ep irtin gega, al watek mar wor pobe wan wan nin bada hahan.

⁹ Ningeb kun belenyan alya bereya kura yenenbe mali po yinkeb dula mata tiyen tihimde

gar wanayin, 'yinyin.

¹⁰ Gwaha yinkeb meten marmin gobe taun bana gon nin belen hanin hanin gama yirdeb kun al bulunya iginya goyen yenenbe mali po yinke wayamin. Be, al go wan keperaminbe yabe makin wor po hirin.

¹¹ "Irkeb doyan al kurun belen al gabu iramin go yene yen wanbe al kura dula matare nin umna ma titin goyen kinyin.

¹² Kenenbe, 'Dula matare nin umna ma taha gega, daha mat bana gan wayha?' inkeb al gob mere ma po tiyyin.

¹³ Irkeb doyan al kurun goreb, 'Ten kahanya haninya fere ten sinare kidoma bana temeynan. Gorbe esen misin isen bana gon hiyen,' yen meten marmin hulan yirin.

¹⁴ Be, maya mere ga nurhan gwahade goyen po, Al Kurun belenbe al budam hoy yirde hi gega, yunkuren yunkuren po gab nigen yen basina yirtin han," yinyin.

Farisi mar belen teks kerd kerd nin Yesu gusunan iramin

(Mak 12:13-17; Luk 20:20-26)

¹⁵ Be, Farisi mar go meremin nurde bin ar yekeb sinare katenbe Yesu go son hekeb merere kertek yen yingen ulin mere sege iramin.

¹⁶ Irdeb yingende komatmin yad yerke Yesu hitte kwamin. Herot gama irde hanen mar manan yanya tumnan kwamin. Kunbe Yesu goyen, "Tisa, gebe mata fudinde po ga ten hayen. Irdeb Al Kurunyen merebe fudinde mat po saba

tenj hayen. Gebe al denjem yanya denjem monya goyen mereya matayabe tunjande po yirde hayen.

¹⁷ Ningeb gebe dahade nurde ha? Nen Moseyen saba gama irde hite mar gayen Roma gabmanyen doyan al kurun Sisar nin teks kertek gobe igin ma dahade? Igin momon dirayin?" inamin.

¹⁸ Goyenpoga Yesu gob dufaymin bulun gob bikken yenen bebak tenbe, "Usi mar wor wor, danin tunan nirde han?

¹⁹ Teks yerde hanjen hora go nikala nirke kene," yinyin. Irkeb denari unjukan tawayamin.

²⁰ Irkeb al tonen hora hende gor kenenbe, "Gabe ganun tonenya denemya?" yinyin.

²¹ Irkeb mel gore wol henbe, "Sisaryen," inamin. Irkeb wol henbe, "Gwahade ningeb, det kura nin Sisar belen dinyen gobe Sisar unnayin. Munan Al Kurun belen det kura nin dinyen gobe Al Kurun unnayin," yinyin.

²² Be, Yesu belen mere tiyyin go nurdeb dinon kok yekeb tubul tenj kwamin.

Sadusi mar belen al kamtin huward huward nin Yesu gusunan iramin

(Mak 12:18-27; Luk 20:27-40)

²³ Be, nana fay goyare goyen po Sadusi mar belen Yesu hitte wayamin. Go mar gobe al kamtinde mat epte ma huwarnayin yen hanjen. Be, mel go Yesu hitte wanbe gusunan iramin.

²⁴ "Tisa, Moseyen sabarebe, 'Al kura dirin minjon henya berem tubul tenj kamkeb kulin kura hiyyen gore itinde beretap go tenbe itin nin dirin forok irde unyen,' gwahade yitin hi.

²⁵ Be, al kura kulin 6 minyan goyen nenya hityen. Al gobe bere tirin gega dirin minmon henya kamyin. Irkeb kulin belen beretap go tirin.

²⁶ Goyenbe yen wor gwahade po dirin minmon henya kamyin. Irkeb yen kamekken gore wor beretap go tamin goyen dirin kura ma forok irdeya kamamin.

²⁷ Irke funanbe bere go wor kamyin.

²⁸ Be, al goya kulin wenya gote berembe unkuren gogo po hinhin geb, kame al kamtin huward huward naturebe bere gobe ganunde berem wor po hiyyen?" inamin.

²⁹ Gwaha inkeb Yesu belen wol henbe, "Denbe Al Kurunyen tarenya meremya asande katin goyen kenen wuk ma yen hanjen. Gwahade geb son hen go ma kenen han.

³⁰ Al kamtin huwarnayin natureb al belen bere yade bere belen al ma kunayin. Yenbe Al Kurunyen miyon yara po henayin.

³¹ Al kamtin huward huward matabe Al Kurun belen asaminde,

³² 'Nebe Abraham, Aisakyabe Yekopyat Al Kurun,' yirin goyen gobe kapyan ma hen hanjen? Mel gobe kamtin gega, tonenbe yenya han geb, gogo yirin. Ningeb Al Kurunbe al dilin gergen han gote Al Kurun, al kamtin gote mon," yinyin.

³³ Be, al buda gobe meremin nurdeb dinon kok wor po yamin.

Moseyen saba gote min wor pobe da?

(Mak 12:28-34; Luk 10:25-28)

³⁴ Be, Yesu belen Sadusi marte gusunon go kenkela po wol hekeb gwaha mat kura mere titek

mon hamin. Irkeb Farisi mar belen go nurdeb wan Yesu hinhide gor gabu iramin.

³⁵ Irdeb unurenmin kura Moseyen saba kenkela nurde hitin al gore wanbe tunan ure yen gaha inyin:

³⁶ “Tisa, saba kurun gabe nurde hite. Goyenbe daminbe saba kurun gote folek wor po?” inyin.

³⁷ Gwaha inkeb Yesu belen wol henbe, “Bubulkunge, tonge, dufaygeya tarengaya tumnan Doyan Al Kurunge, Al Kurun hitte po huginen kun hiyen.

³⁸ Gabe Moseyen saba kurun gote folek wor po.

³⁹ Gote kurhanbe gigen ge amanen nurde hayen gwahade goyen po kadge hoyan nin wor amanen nurde hayin.

⁴⁰ Moseyen sabaya Al Kurunyen mere basan marya belen saba kayamin kurun gote minbe irawa gago po,” inyin.

Yesu belen Farisi mar go Mesaia nin gusunan yirin

(Mak 12:35-37; Luk 20:41-44)

⁴¹ Be, Farisi mar go gabu irde hikeb Yesu belenbe gusunan yirin.

⁴² “Den gayen Mesaiaabe ganunde urmin yen nurde han?” Gwaha yinkeb Farisi mar gore wol henbe, “Yenbe Dewit urmin,” inamin.

⁴³ Irkeb Yesu belenbe, “Dewit urmin yen han gega, dahade ningeb Holi Spirit belen Dewit ketal urkeb urmin goyen, ‘Gebe Kurunne,’ inyin? Dewit belen Mesaia nin gaha yirin:

⁴⁴ ‘Al Kurun belen Doyan Al Kurunne gaha inyin: “Wan ketalner hen al denjem yan wor po hawayin.

Irkeb asogo girde han mar goyen bul yirde yawameke gasa yirde yufurka tiyayin,” in-
yinj, yitin hi. *Tikin*
110:1

⁴⁵ Ningeb kapyan hen hanjen gwahade po, Dewit belen Mesaia goyen ‘Doyan Al Kurunne’ inyin. Ningeb dahade geb Mesaia gobe Dewityen urmin hiyyen? Gobe epte mon geb!” yinyin.

⁴⁶ Be, gwaha yinkeb al kura belen mun kura wol ma hirin. Irde goyenter matbe al kura wan Yesu tunan urde merem yan irnin yen gusunan irde hinhan gobe bada po hamin.

23

Yesu belen Farisi marya Moseyen saba maryat sikken tagalin

(Mak 12:38-39; Luk 11:43,46; 20:45-46)

¹ Be, Yesu gob komatminya al buda kurunya goyen saba yirde henyabe gaha yinyin:

² “Moseyen saba gote min tagal tagal metenbe Moseyen saba marya Farisi marya belen ten hanjen.

³ Ningeb mel gore saba dirkeb kenkela gama irde hinayin. Goyenpoga yingenbe saba ten hanjen goyen ma gama irde han geb, matamin po gab gama ma yirde hinayin.

⁴ Mel gobe mata gama irtek metenen wor po goyen budam forok yirdeb gama yirnayin yen tagalde hanjen. Irkeb albe kanduknen wor po nurde hanjen. Goyenpoga bindebe mun kura gama irtek ma yirde hiyen.

⁵ Mata ten hanjen kurun gobe al belen dennan yen mata ten hanjen. Al Kurun dolon ird irdde nin bisi pelyen wor po kura Moseyen mere go hende katin goyen tonande yerde hanjen. Irde Al Kurun dolon ird irdde nin ulin umna murun belen nin sinjanen goyen ulyan wor po yirdeb hor yirde hanjen.

⁶ Yenbe dula mata karkuwanya gabu yayan kun henbe al denem yande gasunyan po kepertek nurde hanjen.

⁷ Irdeb gabu gasunyan kunbe al belen yenen palap yirde ‘Tisa’ yinen yinen nin amanen nurde hanjen.

⁸ “Goyenbe Doyan Al Kuruntinbe unken po, irde denbe tumnan yende dirnen wen ningeb, denbe danin ‘tisa’ ma dinhan yen ma nurde hinayin.

⁹ Nantinbe Al Kurun sanin minyan yen unken gog po geb al kura ‘Ado’ ma inen hinayin.

¹⁰ Tisatinbe Mesaia yen unken po geb, denbe danin ma ‘Tisa’ dinen han yen ma nurde hinayin.

¹¹⁻¹² Ningeb al kura yingen turun turun irde hiyen al gobe Al Kurun belen yenbe denem mon iryen. Irde al kura yingen nebe denem mon yen hiyen al gobe Al Kurun belenbe denem yan iryen. Ningeb den bana gayen al kura doyan al hewe yiyyen al gobe dende meten al hiyyen,” yinyin.

Farisi marya Moseyen saba marte mata bulun goke yirin

(Mak 12:40; Luk 11:39-42,44,52; 20:47)

¹³⁻¹⁴ Irdeb al buda gor gabu irde hinhan goyen gaha yinyin: “Be, den Moseyen saba marya Farisi

maryabe usi mar wor po. Denbe Al Kurunyen bearar bana han goke buninen wor po nurd dunen hime. Den belenbe Al Kurun belen alya bereyamin doyan yirde hire gor kun kun belenmin pet ten han. Dindikenbe bana gon ma hurkun han. Irde al hoyan goyen bana gon hurkunin yen kurut yen han mar wor belenmin pet ten han.*

¹⁵ Den Moseyen saba marya Farisi maryabe usi mar wor po. Denbe Al Kurunyen bearar bana han goke buninen wor po nurd dunen hime. Denbe, 'Al yawarteke mataninin gama irnan,' yenbe al unkenen mun kura goke wor kahaninde kurab hakwa hende kun nana kurun gayen pasi hen han. Irkeb al gore matatin gama irkeb Al Kurunyen saba bulun irde han. Irkeb al gote mata bulunminbe dende folek wor po kak alare kutek po yirde han.

¹⁶ "Denbe al dilin titmin belen al kadam belen ikala irde tukuyen go gwahade goyen ten han. Ningeb denbe Al Kurunyen bearar bana han goke buninen wor po nurd dunen hime. Denbe al saba gahade yirde han: 'Al kura Al Kurunyen ya balem den urde bin tiyyen goyen ma gama iryen goke kanduknen ma nuryen. Goyenpoga al kura ya bana gol hora hiyen goyen den urde bin tiyyen gobe gama po iryen,' gwaha yen

* **23:13-14:** Asan hoyandebe gahade hi: ¹⁴ Den Moseyen saba marya Farisi maryabe usi mar wor po. Denbe beretapen samunya horaya komkom hen han. Goyenbe al hoyan belen den turun dirnan yen Al Kurun mere irhet yenbe mere ulan wor po tulun ten han. Ningeb denbe gote murungem bulun wor po Al Kurun belen yunen.

hanyen.

¹⁷ Dulin kukuwa! Diltin titmin buda! Dabe det kurun? Gol hora ma ya goyen? Gol hora yen ulinbe det himam mon. Goyenbe ya goyen bana hi goke tenbe himam hiyyen. Ningeb ya gobe det kurun.

¹⁸ Sabatin kurabe gaha yen hanyen: 'Al kura alta denge urde binja tiyyen goyen ma gama iryen goke kanduknen ma nuryen. Goyenpoga Al Kurun galak ire yen alta hende kirtin goyen denge urde binja tiyyen gobe gama po iryen,' yen hanyen.

¹⁹ Diltin titmin buda! Dabe det kurun? Alta ma det go hende hi goyen? Det go yen ulinbe himam mon gega, alta hende kerkeb himam hiyyen. Ningeb altabe det kurun.

²⁰ Ningeb al kura alta denge urde binja tiyyenbe alta go mun po mon, det go hende Al Kurun galak irtin go manan denge uryen.

²¹ Irde al kura Al Kurunyen ya balem denge urde binja tiyyenbe ya go mun po mon, det ya go bana hinayin kurun goyen manan gog po denge yuryen.

²² Irde nanjinbe Al Kurunyen maroro gasun. Ningeb al kura nanjin denge urde binja tiyyenbe maroro gasun go po mon, go hende keperde hi Al goyen manan gog po denge uryen. Ningeb binja tinayinbe go po gama irde hinayin.

²³ "Be, den Moseyen saba marya Farisi maryabe usi mar wor po. Denbe Al Kurunyen bearar bana han goke buninen wor po nurd dunen hime. Denbe binge hapek yird yird det harde hanyen goyen yade buda 10 yirdeb

unƙurenƙe Al Kurun unen hanyen. Goyenbe denƙe Moseyen saba kurun wor po goyen pel irde hanyen. Al kura den nurd yunen han mar po ga igin igin yirde, go ma nurd yunen han marbe gwaha ma yirde hanyen. Kadtin buninen nurd yuntek goyen buninen ma yirde hanyen. Irde Al Kurun nin hekken nurtek goyen go ma po gwaha ten hanyen. Goyenbe Al Kurun galak ird ird mataya kadtin buninen nurd yunen yunen mataya gobe tumnan gama po irde hinayin.

²⁴ Goyenpoga denƙe Moseyen saba karkuwan karkuwanƙe pel yirde muknen muknen goke po gabe ug po yen hanyen. Goke tenƙe denƙe fe ninin yen det muknen mun kirkida gwahade goyen goke kenkela yakkelayan ten yade sin a yirde gab nene han gega, dapna kurun kamel netek mon wor go ma nurde henya yohogo ten han yara denen hime. Denƙe al kura dila tin titmin gore al kadam belen ikala irde tukuyen go gwahade ten han.

²⁵ “Be, den Moseyen saba marya Farisi maryabe usi mar wor po. Denƙe Al Kurunen bearar bana han goke buninen wor po nurd dunen hime. Denƙe al hoyan belen ultin sinare po denenƙe al wukkeken yen denen han. Goyenpoga bitin banabe kudin mataya megen nin mata bulun hapekayan ten ten ninya belen po makin hitin. Ningeb denƙe gisuya koron ya sinare po haldebindebe tiki ya yubul ten hanyen yara denen hime.

²⁶ Ningeb den dila tin titmin Farisi mar, mehenƙe bitin bana mata bulun han go wa

yade siŋa yirnayin. Irke gab siŋare wor wuk yiyyen.

²⁷ “Be, den Moseyen saba marya Farisi maryabe usi mar wor po. Denbe Al Kurunyen bearar bana haŋ goke buninɛn wor po nurd dunɛn hime. Denbe bembaba kura siŋarebe umɲa irtin haŋ. Gega bin banabe al kinƙininɲa det mormokya belɛn po makin hitin haŋ go gwahade goyen.

²⁸ Ningeb al belɛnbe al huwak yɛn denɛn hanɛn. Goyenpoga bitin banabe usiya mata bulun ten ten dufayya belɛn po makin hitin haŋ.

²⁹ “Be, den Moseyen saba marya Farisi maryabe usi mar wor po. Denbe Al Kurunyen bearar bana haŋ goke buninɛn wor po nurd dunɛn hime. Denbe Al Kurunyen mere basan mar asetin yago belɛn gasa yirke kamamin gote bembaba gergen yirde haran hen hanɛn. Irde Al Kurun dilinde al huwak hinhan mar gote bembaba umɲa yirde hanɛn.

³⁰ Irdeb, ‘Nen gayen asininin yago hinhan nalu goyenter hinhet manhan asininin yago belɛn Al Kurunyen mere basan mar gasa yirke kamde hinhan matamin goyen yilwa yirtewon,’ yɛn hanɛn.

³¹ Gwaha yɛn hanɛn gobe den gayenbe Al Kurunyen mere basan mar gasa yiramin mar gote fonɛnmin goyen dindiken sikkɛntin forok yirde haŋ geb.

³² Ningeb asetin yago mata bulun go min uramin goyen den belɛn tukunbe sol irnayin.

³³ “Denbe kunere duwi wor po! Al Kurunyen beararbe daha mat busahartek yɛn nurde haŋ? Kak alare po ga kunayin geb.

³⁴ Ningeb Al Kurunyen mere basan marya al dufay wukkek minyanya saba marya yad yer-meke den hitte wanayin. Goyenbe go mar goyen kurabe gasa yirke kamnayin, kurabe kuruse hende gasa yirke kamnayin. Munan kurabe gabu yatinyan yukun yusulak ten, kurabe gasa yirnin yen taun kurar mat kurar gama yirde yukun hinayin.

³⁵ Ningeb al huwak kurun megen gar hike gasa yirke kamnayin gote kanduk goyenbe den gayenter nin manan tenayin. Gobe Abel mayke kamyinde mat wan wan Berekia urmin Sekaraia goyen Al Kurunyen ya balem bana gasun hi-manya altaya kahalte asetin yago belen mayke kamin gote kanduk.

³⁶ Ningeb fudinde wor po dinen hime. Kanduk kurun dinen hime gabe tumnan den gayenter nin mar gare tenayin,” yinyin.

*Yerusalem nin mar goke buniyen nuryin
(Luk 13:34-35)*

³⁷ Irdeb sopte po, “Awo, Yerusalem nin mar, buniyen wor po nurd dunen hime. Al Kurun belen den ge nurde mere basan marmen yad yerke wan hanyen. Goyenbe den belenbe kurab hora po gasa yirde, kurabe mali gasa yirde hike kamde hanyen. Tatirok milin belen dirnen yawan tapen belen po aw yurde hiyen go gwa-hade goyen po, ne belen den goyen dade doyan dirde himewon yen huginen dufay hen himyen. Goyenbe dindiken po merene pel irde yilwa nirde hanyen.

³⁸ Ningeb ga nurnan. Al Kurun belen tauntin tubul tiyyen. Irkeb nanja hoyande nin mar belen wan tauntin goyen gwamun urkeb det kura bana gon ma hinayin.

³⁹ Nebe dubul ten kumekeb epte ma nennayin. Irde kun kun kame sopte wayen. Irkeb ne nenenbe dindiken mohonjinde wor wor, 'Doyan Al Kurunyen denemde waya al gabe Doyan Al Kurun belen guram irde igin wor po iryen,' yen turun nirnayin," yinyin.

24

*Al Kurunyen ya balem bulun hen hen nin yirin
(Mak 13:1-13; Luk 21:5-19)*

¹ Be, Yesu gob Al Kurunyen ya balem goyen tubul ten hoyande kun hikeyab komatmin yago belen wanbe, "Ya balem ga kena," inamin.

² Irkeb Yesu belen, "Ya kenhan kurun gayenbe fudinde wor po dinen hime. Hora ya irtin yenen han gabe unken mun kura epte ma gasunden hiyen. Tumnan pir irnayin," yinyin.

³ Yesu go gwaha yinenbe kun Olip dondonde kipiriyin. Irkeb yen yunken po henyabe komatmin yago belen, "Da mata forok yeke yenen gabe nalu funan go wan wan nalube forok yewen tiya yen bebak titek?" inamin.

⁴⁻⁵ Irkeb wol henbe, "Nalu funan binde hekeb al budam wan, 'Mesaiabe ne gago,' yinen al budam wor po usi yirnayin. Ningeb kenkela hen hinan ko. Monjo al kura belen usi dirnayin geb.

⁶ Kurabe fulen karkuwan forok yeke nurde hinayin. Irde fulen forok yenayin mere momon

wor nurde hinayin. Goyenbe goke kafura hen hurkunƙat ma tinayin. Mata gwahade gobe forok yen hinayin gega, nalu funanbe kame ga wayyen.

⁷ Goyenterbe al min kura belen huwarde al min hoyanya fulen ten hinayin. Gabman kura belen gabman hoyanya fulen gird ten hinayin. Albe binƙe nin kamde hinayin. Niniƙa karkuwan nana kurar kurar forok yen hinayin.

⁸ Kanduk kurun gob bere kura dirin kawan kere yen mehenƙe wor po ulin misin katyen go gwahade goyen po, nalu funan binde hen hikeb mata goyen forok yenayin.

⁹ “Goyenterbe al belen merem yan dirde bulun bulun dirde mudunke kamnayin. Irde al min kurayen kurayen kurun gore ne nin igin ma nurde den haram dirde hinayin.

¹⁰ Goyarebe al budam ne nin dufaymin sanin irde hinayin goyen yubul tinayin. Irdeb kadam haram gird ten asogom haniƙe yerde hinayin.

¹¹ Irde al budam belen, ‘Nenbe Al Kurunyen mere basan mar,’ usi tenbe wan al budam usi yirde hinayin.

¹² Mata bulun belen po nana tiyyen. Irkeb al kadam nin amanen nurd nurd mata gobe hubu hiyyen.

¹³ Goyenbe al kura sanin hen kanduk go fole irde kun kun funanbe Al Kurun belen al go tiyyen.

¹⁴ Mere igin Al Kurun belen doyan dird dird goyen go wa megen kurun ga tagalde tukuke al nurde hinayin. Irke gab nalu funan go forok yiyyen,” yinyin.

*Kanduk kurun wor po forok yiyyen
(Mak 13:14-27; Luk 21:20-28)*

¹⁵ Irdeb sopte yinyin. “Al Kurunyen mere basan al Daniel beley asande, ‘Det kura Al Kurunyen ya balem bulun wor po irtek goyen ya bana gon forok yiyyen,’ yitin goyen forok yiyyen. (Mere kayhem gayen kapyan hen han marbe kenkela dufay hen gab bebak tina.)

¹⁶ Be, mata goyen forok yekeb Yudia nanare hinayin marbe busaharde dugure kun bana kunayin.

¹⁷ Goyenterbe al kura ya hende hiyen goyen katen yamin bana hurkun detne kura yade ga busahare ma yiyyen.

¹⁸ Al kura metenmin tubul ten kun amilne ten ga ma yiyyen.

¹⁹ Goyen nalurebe bere bin yanya bere dirin besare nin minyanyabe metenen wor po yiryen.

²⁰ Ningeb kanduk kurun goyen nana nalu bulunde, ma Sabat nalure forok ma yewon yen goke Al Kurun gusunan irde hinayin.

²¹ Goyen nalureb megen ga kanduk kurun wor po tiyyen. Hankapya Al Kurun beley tikula kiryin de mat wan ga hitere, irde kame wor kanduk gwahade kura ma kentek. Go kanduk goyenbe baran wor po duryen.

²² Ningeb Al Kurun beley nalu goyen sobamde po tubul tike manhan al tumnan kamwon. Goyenbe al nigen yirin goke tenbe nalu go wer irde dolfon iryen.

²³ Goyen nalure al kura beley, ‘Mesaiabe gago hi,’ dinnayin, irde hoyan beley, ‘Mon, iror hi,’

dinenj ingogaha dirke goya go ma nurde gama yirnayinj.

²⁴ Mesaia falkukya Al Kurunyen mere basanj mar falkukya belenj alya bereya Al Kurun belenj basinja yirtinj goyen usi yirteke katwon yenj mata tinenj karkuwanj kurayen kurayen forok yirde hinayinj.

²⁵ Mere gabe nalu go ma forok yenj hikeya gago momonj dirde hime geb, kenkela henj hinarj ko.

²⁶ “Ningeb Al kura belenj, ‘Mesaia be sawsawa po kurun nanare hi,’ dinke ga kunj kinninj kinninj ma tinayinj. Irdeb, ‘Mesaia be ganj banare hi,’ dinke goya fudinde yenj ma nurnayinj.

²⁷ Dagamel tikeb al nanja wanj wanya nanja kurkurya belenj tumnande kenenj hanjen gwa-hade po, ne Al Urminj gayen wamekeb wawun unjkurende po megen ninj mar kurun gayen tumnande nennayinj.

²⁸ Det kamtinj hinayindebe det bidak nen nen nu belenj wanj hanjen gobe bebakkenj wor po geb, goke epte ma kadom mohonje titek gwahade goyen po, ne Al Urminj gayen wamekeb tumnanj nenenj nalu funanbe gago yenj bebak tinayinj.

²⁹ “Kanduk kurun goyen kamere po, ‘Nanja kidoma hiyyenj, irde gagasi ma timiyyenj. Nanjinde mat dinambe suk yenj katnayinj. Irdeb det kurun hende hanj gobe hambor yiryen,’ yitinj *Aisaia 13:10; 34:4*

gwahade po forok yenayinj.

³⁰ “Goyenterbe ne Al Urminj wayenj timekeb mata kura nanjinde forok yiyyenj. Irkeb ne Al Urminj gabe tarejne turnun yanj goya kigarinjin

faykek hende katen. Irkeb megen nin mar ne nin ma nurde han mar tumnan nenenbe bin misin nurde esinayin.

³¹ Miyonne yad yermeko belen mehen hen ne wan wan nin bigul fu irkeb al tumnan nurnayin. Irde katenbe alya bereya nana kurun hike kwa bana gon nin basina yirtin goyen gabu yirnayin.

³² “Fik hebe yenen hanjen gogo. Fik he go beda urke yenenbe kadila hewen tiya yen hanjen.

³³ Gwahade goyen po, mere dirhem kurun gayen forok yeke yenenbe nalu funanbe binde gag po wer ira yen nurnayin.

³⁴ Fudinde wor po dinen hime. Mata gobe forok yenayin geb. Irde mata go forok yenayin nalure al hinayin mar gobe mata goyen yennayin.

³⁵ Irdeb megenya naninyinabe hubu hiriryen. Goyenbe merenebe sanin minyan geb, hubu ma hiyyen. Huginen alya bereya nurde fudinde wor po yen gama irde hinayin,” yinyin.

Nalu funanbe bebakken mon

(Mak 13:32-37; Luk 17:26-30,34-36)

³⁶ Irdeb sopte yinyin. “Nalu funan goyen al kura bebakken ma nurde hi. Hubu wor po. Adone po ga nurde hi. Urminya miyominya wor ma po nurde han.

³⁷ Ne Al Urmin gayen wan wan nalurebe alya bereya bikken Noa hinhin nalure mata ten hinhin gwahade ten hinayin.

³⁸ Go mar gobe dula nin po ten, kukuwa fe nene, al belen bere yade, dirnen wen yade al yertek nin po ten Al Kurun nin ma nurde hinhin.

Irde kuɲ kuɲ nalu forok yekeb Noa hakwa biɲde hurkuriɲ.

³⁹ Mel gobe kame mata gwahade forok yiyyeɲ yeɲ ma nurde hinhan. Irkeb fe ala kurun forok yeɲ gwamuɲ yuryiɲ. Niɲgeb ne Al Urmiɲ gayen wor al beleɲ gwaha naɲa wayyeɲ yeɲ ma nurde hikeya wayeɲ.

⁴⁰ Goyen nalurebe mata gahade forok yiyyeɲ: al iraw kura metenminde meten ten hiriryen. Irke Al Kurun beleɲ unkuɲen tenbe kurabe tubul tiyyeɲ.

⁴¹ Irde bere irawa palawa irye yeɲ wit bilmin hora po karka ten hikeya bere unkuɲenbe Al Kurun beleɲ tenbe kurab tubul tiyyeɲ.

⁴² Goke tenbe kenkela heɲ ga hinaɲ ko! Doyaɲ Al Kurunɲin waɲ waɲ nalube bebakken moɲ geb.

⁴³ Be, ga nurde ga hinaɲ ko. Ya min al kura wawun kurare kawɛ al beleɲ waɲ yane upew uryeɲ yeɲ nurde hiyeɲdebe yamin kenkela doyaɲ irde hike kawɛ al beleɲ epte ma waɲ yamin upew uryeɲ.

⁴⁴ Niɲgeb gwahade goyen po, ne Al Urmiɲ gare wor nalu goyare wayeɲ tiya yeɲ ma nurde hikeya wayeɲ geb, hugiɲen ne niɲ pet ten doyaɲ nirde hinayiɲ,” yinyiɲ.

*Meten al igiɲya bulunyat maya mere
(Luk 12:42-46)*

⁴⁵ Irdeb maya mere mat gaha yinyiɲ: “Be, ganun meten albe dufaymin wukken, irde gore doyaɲ almin ge fudinde wor po meten ten unen hiyeɲ? Meten al gwahade gobe doyaɲ almin beleɲ naɲa gisaw kwe yeɲbe meten almin goyen,

‘Meteri mar kadge doyan yirde binje yuntek nalu hekeb yunen hayi,’ inen kuyen.

⁴⁶ Be, doyan almin go mulgan hen wanbe meteri al gore meremin po gama irde meteri ten hike kenenbe igin igin irkeb meteri al gobe aman wor po hiyyen.

⁴⁷ Fudinde wor po dinen hime. Meteri al gobe doyan almin belen, ‘Samunne kurun gayen wor doyan irde hayi,’ inyen.

⁴⁸ Goyenbe daha wet kura ten meteri al goreb, ‘Doyan alnebe naja gisaw po kun ningeb, aranen ma wan hi,’ yenbe

⁴⁹ meteri mar kadom alya bereya goyen, ‘Merene ma nurde han,’ yinen gasa yirde dulan po ten wain nene kukuwa hen hanjen marya wain nene hinayin.

⁵⁰ Irkeb doyan almin go nalu goyenter wayyen yen ma nurde hiyende gor mulgan hiyyen.

⁵¹ Irdeb mata bulunmin gote murungem kurun wor po unyen. Irdeb meteri al go tukun kak ala bana esen misin yisen hanyende gor tukukeb usi marya gor hinayinm,” yinyin.

25

Bere 10 gote maya mere

¹ Be, Yesu go sopte maya mere mat saba gahade yirin: “Nalu funan goyenterbe Al Kurun belen alya bereyamin doyan yird yird goyen kurabe gahade: meteri bere fonen 10 belen, ‘Doyan alnininde urmin belen berem ten wayyen tiya go,’ yen, ‘Kun belen tupi ten wanin,’ yen hulsimin yusun yurde kwamin.

² Bere siptesononbe dufaymin wukkek mon. Munan kurabe dufaymin wukkek.

³ Bere siptesonon dufaymin wukkek mon gobe hulsiminbe yawaramin gega, femin pet yeke sopte yunen yunenbe kura ma yadeya kwamin.

⁴ Munan bere siptesonon dufaymin wukkek gobe hulsimin yade femin kame yuntek manan yalin bana goya yade kwamin.

⁵ “Be, bere ten mulgan hen watek al gobe aran ma wakeb bere 10 gobe dukpu yirke tumnan feramin.

⁶ Irke kun wawun binde heke gab al kura gore kuware, ‘Bere tihi albe wan hi! Ningeb wan tupi tinan!’ yirin.

⁷ Be, bere 10 gore go nurdeb huwarde hulsimin ommok hinhan goyen sope yirke melak sanjin hamin.

⁸ Goyenbe bere dufaymin igin mon goreb bere dufaymin wukken goyen, ‘Hulsininin kamnin tahan geb, femin kura dunnan,’ yinamin.

⁹ Irkeb, ‘Mon geb, fe gabe denya nenya tumnande epte ma diryen geb, dindiken kun al hitte damu tinayin,’ yinamin.

¹⁰ Irkeb bere siptesonon dufaymin wukkek mon goyen fe damu nin kukeb goyarebe bere tirin al go wayyin. Irkeb bere siptesonon gitik ten hinhan goyen al go wakeb tupi ten yare dula mata kurun tinin tiyaminde gor kwamin. Irkeb yamebe tayamin.

¹¹ “Be, goyen kamereb bere siptesonon hulsire nin fe damu tinin yen kwamin go mulgan henbe,

‘Doyan al, Doyan al, yame hol irde dunke hurkuniñ,’ inaminj.

¹² Goyenbe al bere tirinj gore wol henbe, ‘Fudinde wor po dinenj hime. Denbe ma nurde dunenj hime,’ yinyinj.

¹³ Be, maya mere dirhem gwahade goyen po ne Al Urminj wanj wanj nalu funanbe ma nurde hanj geb, gitik tenj hinayinj,” yinyinj.

Al karwoyen siraw mere

(Luk 19:11-27)

¹⁴ Irde sopte maya mere mat yinyinj. “Be, Al Kurun belen alya bereya doyan yird yird goyen kurabe gahade: al kura nanja gisaw kwe yenbe detne doyan yirde hinayinj yen metenj marminj hayhay yiryinj.

¹⁵ Irdeb metenj al unjkurenbe hora siptesononj unyinj. Kurabe hora irawa, irde kurabe unjkurenj unyinj. Metenj mar gobe al gwahade mat iginj metenj tinayinj yen nurdeya gab hora goyen yunyinj. Irdeb yubul tenj kurinj.

¹⁶ Metenj al hora siptesononj tirinj al gobe goyare po tukunj metenj unenbe go hende hora siptesononj iryinj.

¹⁷ Metenj al hora irawa tirinj al goyen wor gwahade po, tukunj metenj unenbe go hende hora irawa iryinj.

¹⁸ Goyenbe metenj al hora unjkurenj tirinj al gobe kunj mete taldebe doyan alminjde hora goyen gonj bana kiriyinj.

¹⁹ “Be, doyan al go nanja gisaw kunj gonj sobamde po henj henj gab wayyinj. Irdeb wanj

meten marmin hora yunin goyen daha yiramin yen gusunan yirin.

²⁰ Irkeb meten al hora siptesonon unyin gobe sopte hora siptesonon yawanbe doyan almin gaha inyin: 'Hora siptesonon goyen doyan irayin yen nunen kwarin geb, gore sopte 5 irmin gago,' inyin.

²¹ Irkeb doyan almin belen wol henbe, 'Gebe meten igin wor po tiyan. Gebe meten al igin, merene nuran. Det ug ma gunmirin gega, kenkela doyan yiran ningeb, det budam wor gunmeke doyan yirayin. Irdeb wake tumnan neya dula ten aman hen hiren,' inyin.

²² "Be, al hora irawa unyin al gore wor wanbe gaha inyin: 'Hora irawa doyan irayin yen nunen kwarin gobe gore po meten unenbe hora irawa teban irmin gago,' inyin.

²³ Irkeb doyan almin belen wol henbe, 'Gebe meten al igin, merene po nuran. Det ug ma gunmirin gega, kenkela doyan yiran. Ningeb det budam gunmeke doyan yirayin. Irdeb wake neya dula ten aman hen hiren,' inyin.

²⁴ "Be, meten al hora unjkuren unyin gore wanbe gaha inyin: 'Doyan al, gebe al misinen yan wor po nurde gunen himyen. Binge ge ma hartin goyen yawarde hayen. Irde ge ma tur irtin wor kun wasen hanen.

²⁵ Goke tenbe kafura hen horagebe tukun mete talde gon bana kirmirin. Ningeb hora gebe gago,' inyin.

²⁶ Gwaha inkeb doyan almin belen wol henbe, 'Gebe kumhaka al, meten al bulun wor po. Gebe

detne belen ma hartin goyen yawarde himyen, irde detne belen ma tur irtin goyen wasen himyen yen nurde ha?

²⁷ Gebe ne gwahade yen nurdeb horanebe hora yerde hanyen yare kerarin manhan horane tolok hitinde ga temewon,' inenbe meten mar buda hoyan hoy yirke wakeb,

²⁸ 'Hora go goran irde ten meten al hora 10 minyan al go unnan.

²⁹ Al det unke kenkela doyan irde iginen kurun forok iryen al gobe teban det yawaryen. Irkeb detmin budam wor po henayin. Munan det unke kumhaka hen iginen ma forok yiryen al gobe yende det mun kura hiyen goyen wor goran irke det minmon wor po hiyen.

³⁰ Ningeb meten al bulun gobe tukun sinare kidoma bana esen misin yisen hanyende gor temeynan,' yinyin geb," gwaha yirin.

Doyan Al Kurun belen alya bereya matamde pota yiryen

³¹ Be, Yesu go sopte gaha yirin: "Ne Al Ur-min gabe tarejne turnun yan henbe miyonneya tumnan katted. Goyenterbe Doyan Al Kurunyen maroro gasunde keperen.

³² Irkeb al megen nin kurun gayen ne hitte po gabu irnayin. Irkeb sipsipya memeya yewek belen pota yirde hiyen go gwahade yiren.

³³ Ne belenbe sipsip yadeb hanne yase belen mat yerdeb memebe yade tapa belen yeren.

³⁴⁻³⁶ Irkeb ne Doyan Al Kurun gare al hanne yase belen mat hinayin goyen gaha yinen: 'Ne

binge nirkeyabe bingge nunamin. Fe nin kam-mekeyab fe nunamin. Albak hen kun himekeb gargar niram. Ulinhornem mon himekeb ulinhor nunamin. Garbam hemekeyab doyan nirde faran nurde hinhan. Koyare himekeb wan nenen hinhan. Goke tenbe Nanne belan guram dira. Ningeb Al Kurun belan alya bereyamin doyan yird yird bana gon hurkun hurkun gobe tikula kiriyin den gake gitik irtin hiyen geb wan tenan, yinen.

³⁷ Gwaha yinkeb Al Kurun dilinde al huwak goreb, 'Daha nana bingge kamke genen bingge guntirin? Irde daha nanabe fe nin kamke genen fe guntirin?

³⁸ Daha nana albak hen kun hike gargar girtirin? Irde daha nana ulinhorgem mon hike genenbe ulinhor guntirin?

³⁹ Daha nana garbam heke doyan girde faran gurtirin? Irde daha nana koyare hike kun gintirin?' ninnayin.

⁴⁰ Irkeb ne Doyan Al Kurun gare wol henbe gaha yinen: 'Fudinde wor po dinen hime. Nere al denem mon gayen kura gwaha iramin kenenbe ne gayen niram,' gwaha yinen.

⁴¹⁻⁴³ Irdeb tapa belan mat hinayin mar gobe gaha yinen: 'Denbe bingge nirkeb bingge kura ma nunamin. Irde fe nin kammeke fe kura ma nunamin. Albak hen kun himeke gargar ma niram. Ulinhornem mon himekeb kura ma nunamin. Garbam himekeb faran ma nuramin. Irde koyare himekeya wor wan ma nenen hinhan. Goke tenbe denbe Al Kurunyen bearar bana

haŋ. Niŋgeb nubul teŋ kuŋ kak ala Satanya miyoŋmiŋya niŋ gitik irtiŋ bana goŋ kunaŋ,’ yineŋ.

⁴⁴ Gwaha yinmekeb al buda gore wol heŋbe, ‘Doyaŋ Al Kuruŋ, daha naŋa biŋgeya feya niŋ kamke geneŋ wasak titiriŋ? Irde daha naŋa uliŋhorgem moŋ hike kura ma guntiriŋ? Irde daha naŋa garbam heke doyaŋ ma girdeb faran ma gurtiriŋ? Irde daha naŋa albak geneŋ gargar ma girtiriŋ? Irde daha naŋa koyare hike go ma kuŋ gintiriŋ?’ ninayiŋ.

⁴⁵ Irkeb ne Doyaŋ Al Kuruŋ gare wol heŋbe gaha yineŋ: ‘Fudinde wor po diŋeŋ hime. Nere al deŋem moŋ gayen kura gwaha ma iramiŋ keneŋbe ne gayen faran ma nuramiŋ,’ gwaha yineŋ.

⁴⁶ Mel gobe mata buluŋmiŋ gote muruŋgem hugiŋeŋ kanduk kuruŋ teŋ hinayiŋ. Munaŋ Al Kuruŋ diliŋde al huwak gobe Al Kurunya hugiŋeŋ hinayiŋ,” yinyiŋ.

26

*Yesu mayniŋ yeŋ mere sege iramiŋ
(Mak 14:1-2; Luk 22:1-2; Yon 11:45-53)*

¹ Be, Yesu gob sabamiŋ kuruŋ goyen pasi irdeb tigiri teŋ komatmiŋ yago gaha yinyiŋ:

² “Pasoba dula nalu kuruŋ gobe molye go yeŋ nurde haŋ gogo. Go nalurebe ne Al Urmiŋ gayen

kuruse hende mununen mununen nin asogo haniñde nernayin,* yirin.

³ Be, goyenterbe pris buda gote karkuwanminya Yuda marte doyan mar parguwak yagoya belen pris buda gote kurunmin Kaiafasyen yare gabu iramin.

⁴ Irdeb daha mat kura Yesu go usi irde ten mayteke kamyen yen mere sege iramin.

⁵ Goyenbe yingen mere maydeb, “Dula nalu kurun gayenter ma gwaha titek. Monjo goke igin ma nurde al belen fulen dirnayin geb,” yamin.

Bere kura belen det fimin haminen igin wor po goyen Yesu tonande wok iryin

(Mak 14:3-9; Yon 12:1-8)

⁶ Be, Yesu go komatmin yagoya Betani taunde Saimonyen yare hinhan. Saimonbe bikken busuka manan hinhin.

⁷ Be, Yesu go keperde hikeyab bere kura gore det fimin haminen igin wor po alabasta hora belen po irtin yalin kusamun goyen bana hitin go tawan tonande wok iryin.

⁸ Det fimin damum hende wor po goyen bere gore Yesu tonande wok irke kenenbe komatmin yago belenbe bin ar hende danin bulun ira yen gusunan hamin.

* **26:2:** Bikken Israel mar Isip naja tubul ten Kenan kunin tiyamin yabe Al Kurun belen sipsip al dirin dirnen gasa yirde darim yade yame kantayan sam yirnayin yinyin. Munan al kura gwaha ma tiyamin marbe Al Kurunen miyon belen wanbe mel gote urmin matalinja dapnamin matalinja goyen tumnan gasa yirke kamamin. Gega meremin gama iramin marbe miyonmin belen yubul tiyamin goke dufay hen hen ge dula mata ten hinhan.

⁹ “Go tukun al yunke manhan hora kurunde po damu tike hora go ten al buniñen faran yurwon,” inamin.

¹⁰ Be, Yesu go mere ten hinhan goyen nurdeb, “Denbe danin bere go tagal unen bulun irhan? Yenbe mata igin wor po nira.

¹¹ Al buniñenbe denya hugiñen hinayin. Goyenbe nebe denya hugiñen ma hitek.

¹² Bere gare det fimiñ ulner wok ira gabe ne kammeke mete nirnayin goke gitik nira.

¹³ Ningeb fudinde wor po dinen hime. Kame al belen ne nin nanan kurun ga tagalde tukun henyabe bere gare mata tiya gake wor tagalde hinayin, irde matamin goke dufay hen hinayin,” yinyin.

*Yudas Iskariot belen Yesu asogo haniñde kiryin
(Mak 14:10-11; Luk 22:3-6)*

¹⁴ Be, Yesu komatmin 12 bana goyen al denem Yudas Iskariot inen hanen gore pris buda gote karkuwanmin hitte kurin.

¹⁵ Kunbe, “Yesu hantiñde kermekéb murungembe dahade nunnayin?” yinyin. Irkeb silwa hora kapyan heke kun 30 hekeb unamin.

¹⁶ Go kamereb Yudas go Yesu goyen daha mat kura asogom haniñde keren yen belen nin nankenen hinhin.

*Dula funan
(Mak 14:12-21; Luk 22:7-13,21-23; Yon 13:21-30)*

¹⁷ Be, Yesuyen komatmin go hanaka wawunbe beret yis minmon nen nen nalu hewen tiya yenbe

Yesu gusun̄an iramin̄. “Damde kun̄be Pasoba bin̄ge gitik irde netek yeñ nurde ha?” inamin̄.

¹⁸ Irkeb Yesu belen̄ wol hen̄be, “Yerusalem taun bana kun̄be al kura gor kenen̄be gaha inayin̄. ‘Tisa belen̄be, “Nalunebe binde hihi. Niñgeb neya komatneyabe gere yare Pasoba bin̄ge netek,” yihi,’ gwaha innayin̄,” yinyin̄.

¹⁹ Irkeb komatmin̄ yago goyen Yesu yinyin̄ go po gama irde kun̄be Pasoba bin̄ge nen nen gitik tiyamin̄.

²⁰ Be, wawun̄bana wor po hekeb Yesuya komatmin̄ 12 goya Pasoba bin̄ge niniñ yeñ keperamin̄.

²¹ Bin̄ge nene hen̄yabe Yesu belen̄be, “Fudinde wor po dinen̄ hime. Deñ gayen kuratin̄ kura belen̄ asogoner hanin̄de niryen̄,” yinyin̄.

²² Irkeb komatmin̄ yago gobe kanduknen̄ wor po nuramin̄. Irdeb kura kame yun̄kuren̄ yun̄kuren̄, “Doyan̄ Al Kurun̄, ne niñ wet yeñ ha?” yeñ gusun̄an iramin̄.

²³ Irkeb wol hen̄be, “Al kura neya tum̄nan̄ hanin̄ ten̄ fe koron̄ bana kera gore asogo hanin̄de niryen̄.

²⁴ Ne Al Urmin̄ gabe Al Kurun̄yen mere basan̄ mar belen̄ bikken̄ asan̄de kayamin̄ goyen po gama irde kamen̄. Goyenbe al kura asogoner hanin̄de niryen̄ al goke bunin̄en̄ wor po nurde unen̄ hime. Al go kawan̄ ma hirin̄ manhan̄ kanduk bulun̄ goyen go ma kenwon̄,” yinyin̄.

²⁵ Irkeb Yesu asogomin̄ hanin̄de kertek al Yudas belen̄, “Tisa, ne niñ daw yeñ ha?” inyin̄. Irkeb wol hen̄be, “Gwaha, gobe ge po geb,” inyin̄.

*Yesu belen beretya wainya komatmin yunin
(Mak 14:22-26; Luk 22:14-20; 1 Korin 11:23-25)*

²⁶ Be, bingge nene henryabe Yesu belen beret tenbe Nanin turun irdeb ubala tenbe, “Beret dunhem gahade gayen po nebe den ge ten kamen. Ningeb goke tenbe beret gabe gasonne geb, ten nenan,” yinyin.

²⁷ Irdeb wain finin gisu bana hitin go tenbe sopte Al Kurun turun irde, “Den tumnan ga ten nenan.

²⁸ Al megen han kurun gote mata bulun halde yunen yunen nin ten Al Kurun belen bin tiyyin goke ten darine wok irde kamen. Ningeb wain ga ten nenan.

²⁹ Fudinde dinen hime. Wain finin gayen teban ma newen. Kun kun Nanne belen alya bereyamin doyan yiryenya goyenter gab denya tumnan wain finin gergen sopte netek,” yinyin.

³⁰ Be, go kamereb Yesuya komatmin yagoya goyen tikin henbe Olip dondonde hurkamin.

*Pita helwan hiyyen goke tagalyin
(Mak 14:27-31; Luk 22:31-34; Yon 13:36-38)*

³¹ Be, hurkun gor henbe Yesu belen gaha yinyin: “Han ka wawunbe ne mununni yey fere nirkeb denbe tumnan nubul ten busaharnayin. Mata goke Al Kurunyen asande gahade katin hi:

‘Sipsip doyan al maymeke sipsipminbe burgagaw kernayin,’ yitin. *Sekaraia 13:7*

³² Goyenbe kame sopte huwardebe ne wa mehen hen Galili nanare kwen,” yinyin.

³³ Irkeb Pita belenbe, “Al hoyanbe tumñan gubul tinayin. Goyenbe nebe epte ma wor po gubul tiyen,” inyin.

³⁴ Irkeb Yesu belen wol henbe, “Fudinde wor po ginen hime. Han̄ka wawunbe tatirok ma mere tikeyabe ge belen wawun karwore ne nin yen, ‘Al gobe go ma nurde unen hime,’ yawayin geb,” inyin.

³⁵ Goyenpoga Pita belenbe, “Nebe al belen mununnayin gega, ge nin yen, ‘Yen ma nurd unhem,’ ma wor po yewen,” inyin. Irkeb kadam yago manan tumñan gwaha ala inamin.

*Yesu Getsemani hen̄ Al Kurun̄ mere iryin̄
(Mak 14:32-42; Luk 22:39-46)*

³⁶ Be, gor mat kun̄ nan̄a den̄e Getsemani gor forok yenbe komatmin̄ yago, “Gar keperde doyan̄ nirde hike neb irar ira kun̄ Al Kurun̄ mere iren̄,” yinyin.

³⁷ Irdeb Pitaya Sebedi urmin̄ waran̄ Yonya Yemsya yadeb gasun̄ hoyande kwamin̄. Goyareb Yesube dufaymin̄ya bin̄yabe kanduk wor po hirin̄.

³⁸ Irdeb mel karwo go yinyin. “Kanduk kurun̄ wor po mununke kamtek nurhem geb, neya gar henbe Al Kurun̄ mere irdeya ga hinayin!” yinyin.

³⁹ Gwaha yinenbe gor mat mun̄ kura singir ten̄ kunbe bin̄ tadam mat wulgurut yenbe, “Ado, igin̄ kenem kanduk kurun̄ gayen ten̄ sin̄a irayin. Goyenbe nere dufay ma gama irayin. Gere dufay po gama irayin,” inyin.

⁴⁰ Gwaha tenbe mulgan̄ hen̄ kunbe komatmin̄ karwo gob firtin̄ yinyin. Irdeb Pita isan̄ henbe,

“Mel, denbe neya mun kura hitnen ten Al Kurun mere irde ga ma fernayin?” yinyin.

⁴¹ Irdeb, “Ferde ma Al Kurun mere irde hinayin. Gogab ungura wan tunan durkeb epte ma katnayin. Tontinbe Al Kurun mere ird ird nin wilaknen nurde han. Gega ultinbe pinen hen han,” yinyin.

⁴² Irdeb sopte yubul ten kun Al Kurun mere irdeb, “Ado, kanduk ga ne belen ma tewenbe kanduk gayen pasi irtek belen minmon hiyen kenem nebe dufayge po gama irdeb tewen,” yirin.

⁴³ Be, Al Kurun mere irde pasi henbe sopte mulgan hen kun komatmin karwo gob dilin kanduk hekeb firтинde hike yinyin.

⁴⁴ Yenenbe yubul ten sopte mulgan hen kunbe Al Kurun mere iryin gwahade po sopte mere iryin.

⁴⁵ Be, mulgan hen kunbe komatmin yago goyen, “Denbe usan hen firтинde po han? Ga kennan! Ne Al Urmin gayen mata bulun mar haniнде nerd nerd nalu gobe bikken gago forok yihi.

⁴⁶ Huwarke kunin! Asogo haniнде nertek albe bikken gago waya geb,” yinyin.

Yesu ten fere tiyamin

(Mak 14:43-50; Luk 22:47-53; Yon 18:3-12)

⁴⁷ Be, Yesu gobe gwaha yen hikeyabe komatmin kura Yudas gobe al yade wayamin. Al buda gobe fulenare nin bidilaya nukwaya yade wayamin. Mel gobe pris buda gote karkuwanminya Yuda marte doyan mar parguwakya belen yad yerke wayamin.

⁴⁸ Yesu go asogom haniṇde kertek al goreb tetek mar go gaha yinyiṇ: “Kuṇ forok yeṇbe mata kura tiyeṇ geb. Al kura amanṇ amanṇ irde ulunde u irmeke keneṇbe al gobe gog po yeṇbe kuṇ tenayiṇ,” yinyiṇ.

⁴⁹ Be, Yudas go bikkeṇ mere gwahade yinyiṇde geb, kuṇ forok yeṇ Yesu hitte kuṇbe, “Wawuṇ, Tisa,” inenṇbe ulunde u iryiṇ.

⁵⁰ Irkeb Yesu belenṇ wol henṇbe, “Kadne, gwaha tiye yeṇ wayha go gwaha tiya,” inyiṇ. Irkeb al wayamiṇ mar goreb waṇ teṇ fere tiyamiṇ.

⁵¹ Irkeb Yesu komatmiṇ kura yeṇ binde hinhin goreb fulenṇare niṇ bidilamiṇ marde pris buda gote kurunṇminṇde metenṇ almiṇ kura kirmiṇ sapa iryiṇ.

⁵² Irkeb Yesu belenṇ, “Bidilage go gasuṇenṇde kera! Al kura bidila belenṇ al gasa yiryenṇ gob haniṇ wol hekeb gwaha mat po mayke kamyenṇ.

⁵³ Adone gusuṇaṇ irmekeb goyare po miyoṇmiṇ budam wor po yad yerke katenṇ faranṇ nurnayiṇ gobe ma nurde ha?

⁵⁴ Goyenbe mata gwahade tiyeṇbe Al Kurunṇyen asanṇde mata gwahade gwahade forok yiyyenṇ yitiṇ goyen daha mat forok yiyyenṇ? Epte moṇ,” inyiṇ.

⁵⁵ Gwaha inenṇbe Yesu go yeṇ teṇ fere titek mar goyen, “Ne gayen kawe mar yad kuṇ hime geb, gago fulenṇare niṇ bidilaya nukwaya mananṇ waṇ nawarniṇ teṇ haṇ? Nebe naṇkahalmiṇ naṇkahalmiṇ Al Kurunṇyen ya bana saba tagalde himekeyabe ma nade hanyen.

⁵⁶ Goyenbe Al Kurunṇyen asanṇde mere basanṇ

marminj belenj kame mata gwahade forok yiiyen yenj kayaminj goyen denj belenj gago tenj hanj,” yinyinj. Be, komatminj yagobe tumnanj Yesu tubul tenj busaharaminj.

Yesu pris buda gote kurunminj dilinj mar huwaryinj

(Mak 14:53-65; Luk 22:54-55,63-71; Yon 18:13-14,19-24)

⁵⁷ Be, Yesube pris buda gote kurunminj Kaiafas hitte tukaminj. Gorbe Moseyen saba marya Yuda marte doyanj mar parguwak yagoya gabu iraminj.

⁵⁸ Be, Pita go mel gore Yesu tenj kunj hikeya gisaw yarham po henj gama irde kurinj. Kunj kunbe pris buda gote kurunminj Kaiafasyen ya koya belenj po milgu irtinj bana gonj al gabu irde hanjen sawsaware hurkurinj. Hurkunbe daha kura tike kenenj yenj ya go doyanj irde hanjen mar keperde hinhande gor kunj kipirinj.

⁵⁹ Be, pris buda gote karkuwanminja Yuda marte doyanj marya goyen tumnanj gabu irde da misinde wor po Yesu go mayteke kamyenj yenj mere sege iraminj. Goyenbe minj kura ma kenenbe goke nankenaminj.

⁶⁰ Irkeb al budam wanj Yesu tagal unenj unenj ninj usi mere budam yad forok yiraminj. Gega Yesu maytek mereminj iginj kura ma kenaminj. Irkeb kunj kunj funanj al irawa kura wanbe,

⁶¹ “Al gareb, ‘Al Kurunyen ya balem goyen upew urde sopte gergenj irde nanja fay karwore pasi irenj,’ yeke nurarunj,” yaryum.

⁶² Be, pris buda gote kurunmin Kaiafas belen huwarden Yesu goyen, “Mere kurun ulger irhar gabe wol ma hawayin?” inyin.

⁶³ Goyenbe Yesu go meremin ma wol hen balmin po hinhin. Irkeb sopte, “Ne belen Al Kurun gwahader hitin gote saninde ginhem geb, gebe Mesaia Al Kurun Urmin ma dahade goyen momon dira,” inyin.

⁶⁴ Gwaha inkeb Yesu belen wol henbe, “Dindiken gog po yahan. Goyenbe ne belenbe den kurun gayen gaha dinen. Kame ne Al Urmin gabe Al Kurun sanin minyan Al gote hanin yase belen mat keperde naninde gagap hende katen himeke nennayin,” yinyin.

⁶⁵ Irkeb pris buda gote kurunmin gore mere goyen nurdeb, “Al gabe Al Kurun sukal ira,” yen bin ar yeke ulinhormin erek irdeb, “Ningeb danin mere hoyan nin nan kentek? Al Kurun sukal ira gobe den tumnan nurhan gago.

⁶⁶ Ningeb denbe dahade nurde han?” yinen gusunan yiriyin. Irkeb wol henbe, “Kamyen po!” inamin.

⁶⁷ Irdeb al gor hinhan goreb Yesu kiminde meyan iramin.

⁶⁸ Irdeb kimin mala tenbe hanin mupi irde mayamin. Kura belenbe palasi irdeb, “Mesaia, ganun belen muguna? Momon dira!” inamin.

Pita belen Yesu nin helwan hirin

(Mak 14:66-72; Luk 22:56-62; Yon 18:15-18,25-27)

⁶⁹ Be, goyarebe Pita go ya go bin bana saw-saware gor keperde hinhin. Irkeb meten bere

kura gore wanbe, “Ge manan Yesu Galili nin al goya kun hinaryum,” inyin.

⁷⁰ Irkeb Pita belenbe al tumnan gor hinhan gote dilin mar helwan henbe, “Neb goke kura yen ha yen ma nurde hime,” inyin.

⁷¹ Irdeb gasun hinhin go tubul tenbe kun yamere huwarde hikeb bere kura gore wan kenenbe al buda gor hinhan goyen, “Al gabe Nasaret nin al Yesuya kun haryen,” yirin.

⁷² Irkeb Pita gore teban po helwan henbe, “Fudinde wor po, nebe al gobe ma nurde unen hime,” yirin.

⁷³ Be, hitnen mun kura tenbe al gor hinhan goreb Pita goyen, “Mere tike melakge nurhet gobe Yesu gama irde hanzen mar al kurabe ge gago yen nurhet,” inamin.

⁷⁴ Irkeb Pita belenbe mere fudinde po tihim yen bin tenbe, “Fudinde wor po dinen hime. Neb al goke yen han yen ma nurde hime,” yinyin. Irkeb goyare po tatirok mere tiyyin.

⁷⁵ Irkeb Pita go Yesu belen, “Tatirok ma mere tikeyabe ne nin yen wawun karwore, ‘Al gob ma nurde unen hime,’ yawayin,” inyin goke bin bak yirin. Irkeb sinare katen kun mata tiyyin goke binde misin wor po nurdeb esirin.

27

*Yesu go Pailat hitte ten kwamin
(Mak 15:1; Luk 23:1-2; Yon 18:28-32)*

¹ Be, wampot mun wor pobe pris buda gote karkuwanminya Yuda marte doyan mar par-guwakya belen mere maydeb, “Yesube mayteke kamyen,” yamin.

² Irdeb hani fere tenbe Pailat hitte tukamin. Pailatbe Roma gabman al Yudia nana doyan irde hiyen.

*Yudas kamyin
(Aposel 1:18-19)*

³ Be, asogo haniinde kiryin al Yudasbe Yesu go merem yan irde mayke kamtek heke kenenbe mata bulun tiyyin goke buniyen nuryin. Irdeb silwa hora 30 damu iramin goyen pris buda gote karkuwanminya Yuda marte doyan mar par-guwakya hitte yumulgan tiyyin.

⁴ “Mata bulun minmon al goyen kami yen hantiinde kirmin. Ningeb mata bulun timin,” yinyin. Irkeb wol henbe, “Gobe nende samun mon be. Gere kanduk geb,” inamin.

⁵ Gwaha inkeb bin ar yekeb hora go Al Kurunyen ya balem bana gon yemeyde kurin. Kunbe bene ten kamyin.

⁶ Be, hora yimiyyin gobe pris buda gote karkuwanmin belen pilgan henbe, “Hora gabe al kami yen damu titin. Moseyen sabarebe hora gahade gayen epte ma Al Kurun nin unnayin yitin.

⁷ Ningeb hora ga yade nana hoyande nin mar Yerusalem wan kamke mete ten hitek yen kuwe ird ird alyen megen goyen damu titek,” yen mere sege iramin.

⁸ Goke tenbe naŋa tapum gobe “Al Kamtinde” inamin. Gayenter wor gwahade po inen han.

⁹ Ningeb Al Kurunyen mere basan al Yeremaia belen mere kayyin gobe gwaha mat iginen kawan hirin. Merebe gahade:

“Israel marbe yen mayteke kami yenbe silwa hora 30 gore al damu tiyamin.

¹⁰ Irde Doyan Al Kurun belen gwaha gwaha tiyayin ninyin gwahade po, mel gobe hora go tenbe kuwe ird ird alyen megen damu tiyamin,” yitin hi. *Sekaraia 11:12-13; Yeremaia 32:6-9*

Gebe Yuda marte doyan al kurun we?

(Mak 15:2-5; Luk 23:3-5; Yon 18:33-38)

¹¹ Be, mel go gon gwaha ten hikeyabe Yesu gobe Roma gabman al Yudia naŋa doyan irde hiyen al Pailat dilin mar huwaryin. Irkeb, “Ge gayenbe Yuda marte doyan al kurun we?” inyin. Irkeb, “Gwaha, gigen yaha gog po,” inyin.

¹² Be, pris buda gote karkuwanminya Yuda marte doyan mar parguwakya belen tagal unamin. Gega Yesube meremin wol ma hirin.

¹³ Irkeb Pailat belen, “Mel gare minge girde tagal gunen han gabe kura ma wol hawayin?” inyin.

¹⁴ Goyenpoga Yesu belen mel gote mere go mun kura ma po wol hirin. Irkeb Pailat belen go kenenbe dilin fot yirin.

Pailat belen Yesu tubul timeke kwi yirin

(Mak 15:6-15; Luk 23:13-25; Yon 18:39-19:16)

¹⁵ Be, goyenterbe damam damam Pasoba dula nalurebe Pailat belen koyare hinhan mar goyen

al kura ten sinja irde hiyen. Al gobe Yuda mar belen al gwahade inke gab gwaha ten hiyen.

¹⁶ Be, goyenterbe al bulun wor po yen nurd unen hanjen al Barabas goyen koyare hinhin.

¹⁷⁻¹⁸ Be, Pailatbe yingen dufaymindeb, ‘Yuda marte doyan mar gabe al budam Yesu gayen gama irde hike yenenbe danin nen gwahade mon yen nurdeb yen ge igin ma nurde mayke kami yen gago tawayhan,’ yen nuryin. Ningeb al buda kurun goyen gabu irkeb, “Al damin tubul timeke kuyen? Barabas ma Mesaia inen han Yesu gayen?” yen gusunan yiryin.

¹⁹ Be, Pailat go mere nurd nurd gasunde keperde hikeyabe berem belen mere gahade asande kan ten kerke wayyin: “Al go daha wet kura ire ire ma tiyayin. Yenbe merem mon. Han ka mite tihim. Ningeb bener ga yen ge kan-duknen wor po nurde hime. Tubul po tiyayin,” inyin.

²⁰ Goyenbe pris buda gote karkuwanminya Yuda marte doyan mar parguwakya belen al buda kurun gabu iramin goyen hakot bin yawaramin. Irde, “‘Barabas tubul tike kwi. Munan Yesube mayke kami,’ innayin,” yinamin.

²¹ Be, Pailat belen al buda go, “Al irawa gayen ganunbe tubul timeke kuyen?” yinen gusunan yiryin. Irkeb, “Barabas,” yamin.

²² Irkeb wol henbe, “Ningeb Mesaia inen han al gab daha iren?” yinyin. Irkeb al buda kurun goreb, “Kuruse hende mayke kami!” yamin.

²³ Irkeb Pailat belen, “Danin? Al gabe da mata bulun kura tiyun?” yinyin. Gega ugun po,

“Kurse hende mayke kami ko!” yamin.

²⁴ Be, Pailat go gwaha kura titek ma hiriñ. Irde al buda kurun go fulenja forok irnin tike yenenbe fe ten mel gote diliñ mar haniñ halyiñ. Irdeb, “Al ga kamen tiya gabe neya neya mon. Gabe dende samun po geb,” yinyiñ.

²⁵ Irkeb, “Igiñ, yen kamyen gote merembe nenya diriñniniñ yago kame forok yenayin gore tetek,” inamiñ.

²⁶ Irkeb Barabas go mel gote mere nurdeb tubul tike kuriñ. Goyenbe Yesu go usulak ten kuruse hende maynan yenbe fulenja marmin haniñde tubul tiyyiñ.

*Fulenja mar belen Yesu giwgiw iramiñ
(Mak 15:16-20; Yon 19:2-3)*

²⁷ Be, Roma gabmanyen fulenja mar go Yesu ten Pailatyen ya kurun bana gon tukamiñ. Irdeb fulenja mar kadom goya tumñan Yesu milgu iramiñ.

²⁸ Irdeb uliñhormiñ tumñan yugu ten gab doyan marte uliñhor bukken yara goyen kerd unamiñ.

²⁹ Irdeb kan hirwanen yan goyen bili bili irde doyan al kurunyen tonan umña irhet usi ten tonanðe keramiñ. Irde doyan alyen kutum kura ten haniñ yase belen kerde fulenja mar gore Yesu diliñde wan dokolhon yugulun tenbe, “Fudiñde wor po, Yuda marte doyan al kurun,” inen giwgiw irdeb bak mayde iramiñ.

³⁰ Irde meyan irde kutum tanarde hinhin goyen po goran irde tonanðe mayde teban irde hinhan.

³¹ Gwaha irde giwgiw irdeb uliñhor bukken yara go tugu tenbe yende uliñhor wor po goyen

yerde unamin. Irdeb tukun kuruse hende maytek yen ten kwamin.

Kuruse hende mayke kamin

(Mak 15:21-32; Luk 23:26-43; Yon 19:17-27)

³² Be, belenyan hako kun henyabe al kura Sairini taunde nin al denem Saimon kenenbe Yesuyen kuruse tawa inen pakku irke tirin.

³³ Be, kun kun nana den kura Golgota gor forok yamin. Golgota gote minbe “al tonan kinikininde”.

³⁴ Gorbe wainya he finin urekya suluk irtin goyen unke ninam uyin gega, nen nen nin bada hirin.

³⁵ Yesu go kuruse hende kerde hikeb ulin umnamin ganun belen yawaryen yen yende matare tilin tanardeb pota yiramin.

³⁶ Gwaha tenbe daha kura tike kente kenepende kenen hinhan.

³⁷ Irde da misinde Yesu mayamin goyen he parwek hende katin goyen kuruse tonan belen keramin. Merebe gahade:

AL GABE YESU. YUDA MARTE DOYAN AL KURUN

³⁸ Be, kawo al irawa kura goyen wor kuruse hende yeramin. Kurabe Yesuyen kuruse yase belen mat, munan kurabe tapa belen mat keramin.

³⁹ Al kun wan ten kenenbe birun birun ten giwgiw irdeb,

⁴⁰ “Ge gayen Al Kurunyen ya balem upew urde sopte gergen irde nana fay karworeb pasi iren yawan al gobe ge gago? Irde geb Al Kurun

Urmin kenenbe tarenger kuruse hende mat kata,” inamin.

⁴¹ Irde pris buda gote karkuwanminya Moseyen saba marya Yuda marte doyan mar parguwakya belen wor gwahade po inen ayan keramin.

⁴² “Al gabe al hoyanbe faran yurde hinhin gega, yingenbe epte ma faran uryen. Yenbe Israel marte doyan al kurun go. Kuruse hende mat katke kenen gabe dufayninin yen ge sanin irnin be!

⁴³ Yenbe Al Kurun nin hekken nurde hiyen, irde ‘Neb Al Kurun Urmin,’ yen hiyen geb, tubul tike Al Kurun belen faran urenbe faran uri,” inamin.

⁴⁴ Irkeb kawe al irawa kuruse hende hinaryum go wor gwahade po sukal iraryum.

Yesu kamyin

(Mak 15:33-41; Luk 23:44-49; Yon 19:28-30)

⁴⁵ Be, nana bankahal wor po hekeyabe nana bana kurun gob tumnan kidoma belen aw urtinde hike kun kunbe wawunbana 3 kilok hewen tiyyin.

⁴⁶ Be, 3 kilok binde hekeb Yesu go ug po, “Eloi, Eloi, lama sabaktani!” yirin. Mere gote minbe, “Al Kurunne, Al Kurunne, dani nubul taha!”

⁴⁷ Be, mere go al kura gor huwarde hinhan gore nurdeb, “Elaia denje urde hi,” yamin.

⁴⁸ Irdeb aran po al kura kup yen kun amil erek irde wain fimin mukkuwen bana gon kerke ulin hekeb ten kutum ulyande giti irdeb Yesu unyin.

⁴⁹ Goyenbe al hoyan goreb, “Elaia wet wan faran urke kentek geb, tubul tike gwaha kura tiya yen kinnin,” yamin.

⁵⁰ Be, sopte po Yesu go ugun po mere tenbe bin sul yirin.

⁵¹ Goya goyenbe Al Kurunyen ya balem bana amil gasun himam wor po diba irtin hinhin goyen kahalte po hem belen mat erek yen bam belen katyin. Megen manan diririt yen hora karkuwan karkuwanbe gilgalan iramin.

⁵² Al hakwam yirtin bamba goyen hol yen tukamin. Irkeb Al Kurun dilinde al wukken hen kamamin goyen budam sopte huwaramin.

⁵³ Irde bamba sinare katenbe kame Yesu sopte huwaryin nalureb Yerusalem taun kurunde kun al budam hitte forok yeke yenamin.

⁵⁴ Be, Roma gabmanyen fulenja marte doyan alya fulenja marminya Yesu doyan irde hinhan goyen niniyaya mata gor forok yirin kurun go kenen kafura henbe, “Fudinde wor po, yenbe Al Kurun Urmin,” yamin.

⁵⁵ Bere budam Galili nanare mat Yesu gama irde faran urde kun hanjen goyen wor gor hen gisaw mat kenen hinhan.

⁵⁶ Bere goyen kurabe Makdala nin Maria, Yem-sya Yosepyat milin Maria, irde Sebedi urmin waran Yem-sya Yonyat milin.

Yesu mete tiyamin

(Mak 15:42-47; Luk 23:50-55; Yon 19:38-42)

⁵⁷ Be, Yesu kamyin goyen kun wawunbana wor po hewen tikeb Arimatea taunde nin al samunmin budam kura goyen wayyin. Denembe Yosep. Yen wor Yesu gama irde hiyen.

⁵⁸ Be, al gore kunbe, “Yesu hakwam nunke mete tiye,” inen Pailat gusunen iryin. Irkeb Pailat belen, “Igin, gwaha tiyayin,” inyin.

⁵⁹ Irkeb Yosep belen Yesu hakwam goyen ten amil faykek gergen belen po mala ten

⁶⁰ tukunbe yingen, “Kammeke nernayin,” yirin bembu goyen bana kiryin. Irde hora kurun milin kura goyen yenna kwamin marya gore gilongilon irde tukun bembu gote yamem pet tenbe kwamin.

⁶¹ Irkeb bere iraw kura horabok gote dilin mar sinu hoyan belen mat hinaryum. Makdala nin Mariayabe Maria hoyan kura goya belen gwaha tiyaryum.

Bembu doyan irde hinhan mar

⁶² Be, Sabat nalu fay urkeb pris buda gote karkuwaminnya Farisi marya belen Pailat hitte kwamin.

⁶³ Kunbe, “Doyan al, usi al gar go hinhinyabe, ‘Kamende mat kun yerenkek hekeb huwaren,’ yen hinhin goyen bininin bak yekeb gago wayhet.

⁶⁴ Ningeb fulena marge hulyan yirke hanke mat kun molye bana goyen bembu go doyan irde hinayin. Monko komatmin yago belen wan hakwam goyen hoyande tukunbe, ‘Kamtinde mat huwarun,’ yenayin geb. Irkeb al budam usi mere go nurde dufaymin bulun henayin. Gote kandukbe hankepaya, ‘Nebe Mesaia,’ yinen al usi yirde hinhin gote kanduk fole iryen,” inamin.

⁶⁵ Irkeb Pailat belen, “Fulena marne kura yukun den nurhan gwahade po kenkela yinke bembu go doyan irde hinayin,” yinyin.

⁶⁶ Irkeb mel go kuŋ bembam yamere niŋ hora kurun goyen al kura belen ma fegelnayin yen bisam irde go hende diba iramin. Irdeb fulenamar goyen, “Gar hen kenkela doyan irde hinan ko!” yinamin.

28

Yesu kamyin de mat huwaryin

(Mak 16:1-10; Luk 24:1-12; Yon 20:1-10)

¹ Be, Sabat nalu hubu hen kuŋ wawun hen fay ureŋ tiyyin. Irkeb Makdala niŋ Mariaya Maria hoyan kura goya gore Yesu hakwam keramin gasun goyen kenye yen kwaryum.

² Be, bembare gorbe niniŋa kurun forok yirin. Gobe Doyan Al Kurun hitte mat miyonmin kura katen bembam gote yame hora kurun go kan kan irde hol irde go hende keperde hinhin geb, gogo tiyyin.

³ Yenbe ulinya dinsokyabe dagamel go gwahade epte ma kenkela kente k hinhin. Ulinhormin manan faykek wor po.

⁴ Be, fulenamar gor hinhin gobe miyon go kenenbe kafura wor po hen barbar yen kamtin hakwam yara hamin.

⁵ Be, miyon gore bere irawa go yenenbe, “Kafura hen ma. Yesu kuruse hende mayke kamun al goke nankenen har yen nurde hime.

⁶ Gega yenbe gar ma hi. Huwaren yen hinhin go gwahade po huwara. Iginge wan hakwam keran gasun ga kinyi.

⁷ Irde aranen kuŋ komatmin yago goyen, ‘Yesube kamunde mat huwara geb, yen wa

mehen hen Galili nanare kwen tiya. Gon gab kun kennayin,' yiniryen. Mere gayen momon dire yen gago wayhem geb," yinyin.

⁸ Be, bere iraw gob kafura haryum. Goyenbe mere go nurdeb aman haryum. Irdeb bembaga aran po tubul ten Yesuyen komatmin yago momon yirye yen kup yen kwaryum.

⁹ Be, bere go mata gwahade forok yewen tiya yen ma nurde kun hikeya Yesu belen forok yenbe, "Wampot," yinyin. Irkeb irem gobe kenen beba tenbe kun kahan de tanarde dolo iraryum.

¹⁰ Irkeb, "Kafura hen ma. Kun dine yago yinke Galili nanare kun gab nennayin," yinyin.

Fuleña mar belen usi ten hinhan

¹¹ Be, bere irawa go hako ga mulgan hen hikeyabe fuleña mar bembaga doyan irde hinhan mar goyen kura belen taunde kunbe mata forok yeke yenamin kurun goyen pris buda gote karkuwanmin momon yiramin.

¹² Irkeb Yuda marte doyan mar parguwak hitte kun momon yirdeb mere kura sege iramin. Irdeb fuleña mar go hora kurun yunenbe gaha yinamin.

¹³ "Sinare kunbe mere gahade al momon yirde tukun hinayin: 'Nenbe wawun ferde ug hetkeya komatmin yago belen wan hakwam goyen kawem ten kwan,' gwaha yen hinayin.

¹⁴ Munan mere momon gayen kun doyan al tin Pailat hitte forok yekeb nen belen kun kenenbe igin mat mere irtek geb, denbe merem yan ma diryen," yinamin.

¹⁵ Gwaha yinkeb fulenja mar gobe horamin go yadeb mel gore yinamin gwahade po tiyamin. Ningeb goyen mere gobe tagalkeb wan wan gayenter nin Yuda mar wor tagalde han.

Komatmin meten kurun yunyin
(Mak 16:14-18; Luk 24:36-49; Yon 20:19-23; Aposel 1:6-8)

¹⁶ Be, Yesu yirin gwahade po komatmin 11 go Galili nana bana gon nin dugu kura gor kunayin yinyinde gor kwamin.

¹⁷ Kun kenenbe dolon irde turun iramin. Munan kurabe dufay kura kura hamin.

¹⁸ Irkeb Yesu go bindere wanbe, "Nanjinja megenya kurun gayen doyan yird yird tarenbe ne nuntin hi.

¹⁹ Ningeb den belen kun al megen hike kwa kurun gayen merene basan hen tagalde tuku-nayin. Irde merene nurnayin marbe Al Kurunya Urminyabe Holi Spiritiyat denemde baptais yirde komatne yirde hinayin.

²⁰ Irde mata gwaha gwaha ten hinayin dinen hinhem kurun goyen mel go wor gama yirnan yen saba yirde hinayin. Fudinde wor po, nebe dubul ma wor po tiyen. Denya tumnan hiteke kun kun nalu funan forok yiyyen," yinyin.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 18 Mar 2025 from source files dated 31 Aug 2023

dbba218f-41f3-5f08-b0b6-2a7c919093ab